

ПЕТӖ 1926 ВОСЯНЬ

ЛЭДЗӖНЫ: ПЕЧАТЬ ДА ЮӖР СЕТАН КОМИ РЕСПУБЛИКАСА АГЕНТСТВО,
КОМИ РЕСПУБЛИКАСА ГИЖЫСЬ КОТЫР

ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

5

ОДА-КОРА (МАЙ)

2015

ТАЙӖ НОМЕРЫН:

Чолӧмалам!	3
Алексей ПОЛУТРУДОВ, Александр ШЕБЫРЕВ.	
Чужин кӧ, ло мортӧн. Ёрта сёрни	4
Александр ШЕБЫРЕВ. Вӧрса ловъяс. Висьтъяс	12
Евгений ВАЛЕРИАН. Ю Джын. Кывбуръяс	22

ЫДЖЫД ПОБЕДАЛЫ — 70

Николай МАЛЫЦЕВ. Турӧб. Висьт	28
Александр ЛЫЮРОВ. Менам другъяс йылысь повесть	31
Никон ХАТАНЗЕЙСКИЙ. Ловйӧн тай сэки коли... ..	54
Гений ГОРЧАКОВ. Мемориальной пӧв вылысь ним	72

12+

Обложка вылын снимокыс Дмитрий Напалковӧн.

© «Войвыв кодзув» («Северная звезда»), 2015 г.

СЫКТЫВКАР

СЕВЕРНАЯ ЗВЕЗДА



**Ежемесячный
литературно-художественный
журнал**



Учредители:

**АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ**

**«СОЮЗ ПИСАТЕЛЕЙ РЕСПУБЛИКИ КОМИ» - РЕГИОНАЛЬНОЕ
ОТДЕЛЕНИЕ ОБЩЕРОССИЙСКОЙ ОРГАНИЗАЦИИ
«СОЮЗ ПИСАТЕЛЕЙ РОССИИ»**



Издатель:

АУ РК «ИЗДАТЕЛЬСКИЙ ДОМ КОМИ»

ДИРЕКТОР: ПОПОВ В.В.



РЕДАКЦИОННАЯ КОЛЛЕГИЯ:

Главный редактор

ПОЛУТРУДОВ А.В.

Ответственный
секретарь

КИЧИГИН И.Н.

УЛЬЯНОВ А.В.

УЛЯШЕВ О.И.

ЛИМЕРОВА В.А.

ТИМИН В.В.



Чолөмалам!

Миян кык бур ёрт тавося майын пасйёны 55 арёса юбилей. Ёти тёлысьё чужёмаёсь кык коми гижысь: Александр Васильевич Шебырев да Евгений Валерианович Козлов. Кыкнанныс Эжва ю дорын, А.В.Шебырев Эжва катыдас, Пожог сиктын; Е.В.Козлов Эжва кывтыдас, Важ Эжва ты дорын, Эжов сиктын.

Тырмёма Эжва-матушкайслон да парма-вёрыслон мичлуныс да шаньлуныс ловзьодны коми гижысьяслысь енбисё, кыкнанныс найö и кывбурьяс, и проза гижёны.

Александр Шебырев бөръя кадас ёнджыка философскöй висьтъясон петкөдчö, быдтö-лелькуйтö, литература туйвизьö индö Помöсдиньс енбиа челядьöс. А Евгений Козлов нюмъялö-шмонитö «Чушканзи» журналын, комиодö роч да суйёрсайса поэзия да драматургия.



Кыкнанныс найö вöліны «Войвыв кодзув» журналын «Эзысь борд» конкурсса лауреатъясон, кыкнанныслы таво Коми республикаса гижысьяслон XIII съезд вылын Культура министерство сетіс аттьöалана письмö.

Став сёлöмсянь чолөмалам Александр Васильевичöс да Евгений Валериановичöс чужан лунön! Мед шондйыс век лоö Тіянлы бана, мед мойвиас творчествоаныд и олöмад. Кузь нэм да бур шуд!



Гижысь ёртъясид.



Александр Васильевич Шебырев чужис 1960 вося май 28 лунö Кулөмдін районса Пожөг сиктын.

1977 воын пырис велөдчыны Коми государственной педагогической институтö, но мөд курсын босьтисны армияö. Служитөм бөрас, 1981 воын, пырис велөдчыны Сыктывкарса госуниверситетысь экономика факультетö. 1986 воын помалис университет. Уджалис «Пожегодской» совхозын экономистөн, ВЛКСМ-лөн Кулөмдін райкомса первой секретарөн. 1988 восянь корреспонденталис Кулөмдін районса «Ленин туйөд» (өнi «Парма гор») газетын, быдмис редакторос вежысьöдз.

Вуджис овны Помөсдін сиктö, босьтчис веськөдлыны школа-са краеведческой да Тима Веньлы сiм музейясөн.

Гижан уджö пыдисянь пырөдчис 1988 восянь. Гижөдгясыс петавлисны «Сьөлмөй бөрдö и сьылö», «Мелілуныс пыдöстөм и помтөм», «Сикöти», «Вечерний звон», «Лöсас» да мукöд öтувгя небөггясын. «Олөм туйтi» кывбургяса ашиөр небөг петис 2001 воын. Уджалö поэзияын, прозаын да публицистикаын. Уна кывбур вылö лöсьöдöма сьыланкыв. Веськөдлö челядьлөн «Петас» литература котырөн.

Россияса гижысь котырö пырысь.

Алексей ПОЛУГРУДОВ
Александр ШЕБЫРЕВ

Чужин кө, ло мортөн

ЁРТА СЁРНИ

— Чолөм-здоровье, Александр Васильевич! Тэныд тырö ветымын вит. Чужан лун водзад окота неуна сёрнитыштны-юасыштны. Коми йöз первой юасьöны: кодлөн тэ да кытысь?

— Мортлөн медтöдчана олөм тшупöдыс — тайö му вылас сьлөн чужöмыс, воöмыс. Чужли кө ме Африкаын, гашкö, öнөдз на крокодилгяс бөрся шыөн вöтлыси (кыйсян көрыс ичöтсянь пырöма). Но пыр аслым шуа: мен везитис. Чужи-быдми му вылас медся мича да медся дона Коми муын, гөгйөн йитчи вөр-ваыскöд. И сы вöсна шуда. Нöшта тöдчанатор: кодгяс тэнö чужтисны? Бать-мамтö öд он бөрйы... И тан бара жö Енмыс юрöд малыштис. Батьлы да мамылы юркопыр. Батьöй, Василий Михайлович Шебырев, нэмсö совхозын стрöйтчис (рабочöйсянь техник-строительöдз воöдчис), а мамöй, Вера Прокопьевна Оплеснина, нэм чöжыс уджалис медицинаын, фельдшер-акушерөн. Оз öти сё морт сийöс талун «гөгиньон» шуны... Батьöй — Пожөгдін грездысь (Кулөмдін район), мамöй — Гаргя грездысь (Сыктывдін район). Енэжсянныс шуöма паныдасыны — со и паныдасьöмаöсь. Кыкнанныс — «ва коми», и ме «ва коми». Чужли Пожөг сиктын, ыджыд ва дырйи батьö мамöс Пожөгöдз пелыса пыжөн сэк лэччöдöма, менам муртса пыжас абу чужсьöма. Йöткасян пö вöли, тэрмасын ывла югыдас. Ме — семьяын коймöд кага. Ыджыдджык чойяс — Надежда да Любовь, слабог,

олёны-вылёны на, ставыслён котыръяс. Матыссаёсь, бура ёрта-сям. Жугыль, мый и бать, и мам абу нин ловъяёсь. Кор кув-сисны — быттё менсьым гөгйёс орөдісны. Ёнөдз сёлөм улын деливё, мый эг удит ас кадё налы став бур кывсё шуны. Кыт-чөкө пыр тэрмасын, мөвпалан: удитан... Но, чайта, эг лёк пиён вөв, ме вөсна мам да бать олөмас эз гөрдөдлыны. Сёлөмсяньыс радуйтчисны, кор мен вөлі бур, ышөдісны, кор вөлі сёёкыд. Ёні ме, Ёнтип Ёсип Көсьта Педөр Микайлө Вась Ёльөксан,— ачым нин дед, куим внук-внучка быдмөны. Сідзкө — олөма абу прөста...

— *Александр Васильевич, кодёс Тэ эськө пасйин Тэно велө-дысьсө, бур мортёс — кодлы верман шуны аттьё да муёдз копыртчывыны? Мыйысь?*

— Став олөмыд — помся велөдчөм. Некор оз ков повны мөд мортлысь сйёс юавны, мый ачyd он төд. Вомад оз вачкы-ны, мөдарё, бурысь примитасны. Ме ичөтсянь кужи чуймавыны да гөгөрбок дзөргыны. Юркопыр — менам медводдза велөдысь-лы, Юлия Владимировна Рогожниковалы (Савиналы). Ме шко-лаё пыри квайт арөсөн (пыр тэрмаси), и... куим лун мысти сй-йёс шыбиті. Эз кажитчы ни школаыс, ни велөдысьыс. А сэсья мөд вонас локті, и — веськалі Юлия Владимировна сойборд улө (мортыс сөмын на локтіс велөдны, босьтис олөмас медводдза класс). Мен и школаыс югзис, и велөдчөм кутіс сёлөм вылө воны. Унатор тай морт сайын... Пу көлуйөн ноксьыны велөдчи батылысь. Вөравны да лэчкасьны велөдчи гырысьджык ёртъяс-лысь да пөрнөй мужичөйяслысь. Институтын да университетын велөдчигөн төдөмлун шедөді татчөс велөдысьяс отсөгөн. Сөмын мыйлакө музыкаын пыр ачым тільси, некод дінө эг и матыстчыв. А гижан творчество кузя кө... Бара жө — кызды выліас шуөма. 1988 воын локті уджавны Кулөмдін районса «Ленин туйөд»



газетө. Кызд он пыр творчествоё, кор сэн — «гижан поз»? Кор сэн нималана нин гижысь Василий Григорьевич Лодыгин аслас «Эжва» литературнөй котырөн, кор сэн сэк кадся мукөд енбия том гижысь — Вячеслав Бабин, Эдуард Тимушев, Иван

Тарабукин? Найо кызкө и ышодисны мено, кыткө быттё ловшыёс вөрзёдисны. Дерт, дуригмозыд ме таодз гижасьлі нин, ар дас нельсянь, но — рочон. Рочнад кокныдджык гижны, кывйыс паськыдджык. А тан видлі комион. Сідзи вочасон и пыри художественной гижан уджас. Котъ журналистика да художественной гижом óta-модсö оз ёна радейтны, пыксёны. Но кыкнансö кө вожжи улын кутан — ёртасясны, некытчö оз воштысьны.

— *Тэ гижан кывбуръяс, проза, публицистика. Эн видлы драматургияö кутчысьлыны? Эм-ö медрадейтана жанр?*

— Менам артмис тадз: медводз гижы кывбуръяс, өттшөтш пыри публицистикаö (сійö йитчöма журналистикакөд), а сәсся бöрынджык пырöдчи прозаö. Надейнö, тадз и колö. Томдырся «романтикаыд» кыскö кывбуръяс дінö. А верстыамман да, колö юксьыштны йöзыскөд проза отсөгөн. И талун менам сійö збыльысь медся матысса жанр. Сідз шусяна «ичöt» проза. Некор эз кажитчывлыны ыджыд романъяс. Терпеннö абү лыддыны помöдзыс. Мый сәсся вöчан, сэтшöм мортыс. Ичötсянь быдми куим «кит» — Чехов, Шукшин да Зощенко вылын. Стöчджыка кө — налөн висьтъяс вылын. Öнөдз лыддя, котъ, кызди шуласны, сёысь нин лыддывли. Быттё ог и пöтлы. Серавла и бөрда ичötик висьтъяс вылас. Наысь бурджыка он нин гиж. Ме век ачымöс шуа «прöстöй ремесленникон», кодлы вылісянныс мыйкö сетыштöма. И гижан уджсö примита прöстöя, рочыштны кө — «самоиронияон». И таысь век кокни. Гижöмыд — абү мыр бертлана удж. Он кө көсйы — мырдөн эн гиж, муыс таысь мöдарö юрөн оз бергöдчы. Драматургия кузя... Гижлі жö интерес ради гоз-мöд пьеса, ёнджыкасö — миян Помöсдинса йöзкост театр корис да. Петкөдчисны татчöс енбиа артистъяс сцена вылын «Жöник» да «Дöмаса халат» пьесаясөн — ветлісны район пасьта, волісны и Абъячойö да мукöдлаö. Драматургия кузя юрын войлалö уна мöвп, но... «дышистъяс» партияö, буракö, пыра. «Дыш» кывйысь. Видзöдлам, олöмыс петкөдлас, Енмыс кө кадсö сетыштас.

— *Проза йылысь кө сёрнитны, аслад гижöдъясын геройöс Тэ век испытывайтан. Торъя — вөр-ваён. Мыйлакö?*

— Тайö сідз. Висьтъясын ме ог ёна радейт сідз шусяна «действие»: сійö муніс, сійö локтіс, сійö котöртис... Менсьым интересöс чужтö геройлөн характерыс. Стöчмöда — коми характер. Ме найöс, «коньöръясöс», тшöкыда шыблала сэтшöм «олöм гуясö», мый аслым жалъöсь лолöны. «Менам туй... Мед кө вильыд да мед кө тэ няйт... Мед кө гураныс сизимдас квайт... Менам олöмын». Кызди петас геройыс артмöм мытшöдсьыс, уна-ö вын воштас? Ёна-ö повзис, ёна-ö ловгöныс сувтіс? Кутшöм мöвпъяс юрас юрсигусьясөн лэбалöны? Аддзас оз петан туйсö? Менам кызвын шөр геройыс — пөрнöй мужичöй, ас коддьöм. Дерт жö, сійö вужнас йитчöма талунъя вөр-ваыскөд. Сійөн вөр-ванас и испытывайта. Тэ пыдди пукты вөр-васö, тэ абү «фараон», эн ыджыдав тан, вөр-ваыслы öткодъ — гут тэ либö морт, сійö тәнö чужтыліс. И век жö тэ — морт. Сідзкө, ло мортон! Ме ог босьт исторической персонаж, ог гиж важ йылысь. Öнія лун, öнія морт — со мый менö кыскö. Мортлөн



пытшкөсса мирыс — торъя енкола. Сәні сәтшөмтор вермас сюрны, мый юрсиыд сувтас. Но төдчөда: менам висътьяс век бура помасъоны и петан туйыс геройлөн пыр эм.

— *А кывбуръясад мыйон кыскöны тайö темаясыс?*

— Менö он веж. Интереснö кө мен буретш мортлөн пытшкөс-са мирыс, гижа сы йылысь кызди прозаын, сідз и поэзияын. Сöмын эм торъялөм. Кывбур — сійö «топöдöм мөвп». Проза — «личöдöм мөвп». Поэзияын лыддысьысьлы должен лоны неуна гөгөрвотөмтор. Поэзияын оз позь велöдны мортөс, оз позь индавыны, мый вöчны, кыз овны... Мед лыддысьысьыс ачыс водзö мөвпалö. Главнöй — мед кывбурыс чуймөдіс, мед чуткис, мед пытшкад мыйкө топавліс-вөрзыліс. Прозаын — дзик мөд ног. Колö висътавыны збыльсö, оз позь ылöдчыны.

— *Коркө Тэ шулін нин, мый гижөдъясад ставыс дзик збыль. Мыйла гижан сöмын збыльсö?*

— Шуи тай — оз позь ылöдчыны. Ме мыйлакö тадз думайта. Гижöдыд артмас сэк, кор тэ бура төдан, мый йылысь гижан. Фантастика — мөд жанр... Ме гижа сöмын сійöс, мый синмөн аддза да пельөн кыла. Ме ачым — «вöрса», чужöмсянь йитчöма зумыш парма-вöрыскöд. Кыла на ас пытшкын коми укладсö. «Ми — вöрсаяс... Ми вöрын олысь йöз... Но мыйлакö тай разöдам да пазöдам да вöчам сылы грöз...». Воысь воö кыптö гордитчöм, мый — коми. Збыль. Гижа öнiя йöз йылысь, аслам «современникъяс» йылысь. Быд герой сайын — ловъя морт. Кызвыныс öнi на олöны тайö му вылас. И төдöны, мый буретш на йылысь гижöма менам прозаын. Некод öбидаö оз уськөдчы. Унатор нöшта босьтöма аслам олöмысь. Колö мыйсюрö удитöдчыны на гижны ас поколение йылысь. Öнiя том йöзлөн олöмыс да мөвпъясыс лоасны мөд пөлөсөн. Мед сэсся гижöны, мый найö аддзöны да кылöны.

— *Бара жö, Тэнсьыд шуöмтö казътышта. «Сиктса психологической проза» гижöмьд, кызди тайöс ачид гөгөрвоан?*

— Чайта, менам сёрни сетіс нин та вылө вочакывсö. Гижа сöмын сикт-грездса коми морт йылысь (öня карса олөм ог тöд, и нинöмла мем сэтчö пырны). Современник йылысь. Но медводз петкöдла ог сылысь уска-тошка чужöмсö да шердын пасьта пельпомсö, а пытшкөсса мирсö. Ловшысö. Характерсö. Майшöдлөмсö, тöжд-могъяссö. Вынсö. Слаблунсö. Бурсö да лөксö. И, медбөр,— сөвестьсö. Сиктса мортыд — зэв ыджыд сөвестя. Лабутнöй. Шань. Абу ёна сёрнитысь, абу быргандаръя. И ме збыль радейта тайö мортсö, ассым геройöс. И сэк жö вися сы вöсна. Мед эськö эз мун олөмсьыс, эз вош асъя руөн коми грездын олысьыс.

— *Александр Васильевич, Тэ бура ворсан гитараөн, сылан, вель уна сыланкыв гижин, и нöшта уналы найö ёна воöны сьöлөм вылас. Мый чуйдiс да мый Тэн тайö сетö?*

— Мый чуйдiс... Помнита, ар дас кык-дас куим вöли. Локтiс-ны чужанiнö, Пожöгдiн грездö, Ленинградысь студентъяс, би сюръяс вежлалiсны. Быд рыт лэчöны Öзын дi дорö, бипур öзтöны, сералöны-варовитöны, и — гитараөн ворсöны. Ми на дорын кöлтыкайтчам, дзöргам-видзöдам. Интереснö. Бокöвöй йöз, рочьяс, но быттö важ тöдсаяс. Ме гитаратö таöдз синмөн эг аддзывлы. Грездын медшөр инструментыс — гудöк. Менам рöдын став мужичöйыс гудöкасны, весиг ас кинас ворсансö



вöчавлiсны. Батö гудöкнас чачаөн моз ворсiс. Мам мем öтарö шулiс: «Давай велöдчы öдйöджык гудöкнас, батöтö эн янöд. Шуасны: гудöкасьысьлөн пиыс оз гудöкась! Йöз сьмек!» А ме öтарö пыкся, ачым ог тöд, мыйла. Мися, гудöкнад ставыс ку-жöны, абу интереснö... И вот гитаратö аддзи. Шензя: кыдзи ворсöны? Коркö мамлы шуа: вай, кристаради, мем öти гитара ньöб! Мам быдсөн шемöсмис: кутшöм гитара, мый тэ сöран? Гудöк босьт, ворс! Но менам характер эм. Öтарö сина: гитара колö! Коркö сэсся, кад мысти, мам шуö: «На тэныд нель шайт,

мун Пожӧгӧ да босьт ассьыд гитаратӧ, сэтшӧма кӧ колӧ! Хозма-гӧ нель гитара вайӧмаӧсь...» Чечыштӧ радӧйла, кватитӧ велосипедӧс, да... ёртъяс дорӧ котӧртӧ. Мися, корӧй мамъясыдлысь нель шайтӧн, гитараяс ньӧбам. И сетӧсны мамъясыд! Мунӧм нельӧн велосипедъясӧн, да ставным и ньӧбим. Но нинӧм ог кужӧй... Дзик асьным и велӧдчим, некод эз отсав, ӧнӧ на ачым чуймала! Сидзкӧ — колӧ вӧлӧ. Сидзкӧ — ловшыӧй корӧмӧн корис. Унаӧн юавлӧны: а мыйла гитара? Вочавидза: ме эськӧ рояльӧн кӧсья ворсны, но... сьӧкыд инструментис, гӧрб вылын кыскавны ог вермы! Мӧд делӧ — гитара. Кокныдик, универсальной ворсантор. И абу инструментын делӧйс. Главной — кодӧ ворсӧ да кызди ворсӧ. Гитара — менам нэмӧвӧйся ёрт. Кор ловшыӧй усьӧ — киӧ босьта сийӧс, кор кыпыд — бара жӧ босьта. Некор оз ылӧдлы. Оз предайт. Сира гезйӧн коркӧ кортавлӧсны. И ме тайӧ гӧрӧдсӧ некор ог разь.

— Александр Васильевич, Тэ топыда уджалан том войтыркӧд: и гижны босьтчысьяскӧд, и том музыкантъяскӧд, да и «Ва бердыд»* тэнад мӧвп. Мый велӧдысьлӧн могыс? Мый велӧдыся-велӧдчыся кост йитӧдыс?

— Кор 2003 воын локтӧ уджавны В.Т.Чисталёв нима Помӧсдинса шӧр школаӧ (краеведческой музейӧн веськӧдлысьӧн), гижы шыӧдчӧм: «Кодӧ кӧсйӧ видлыны асьсӧ литературной творчествоын, локтӧй выльысь восьтӧм «Петас» литературной котырӧ». Лун мысти локтис... комын сайӧ морт. Весь шемӧсми: кызд та мындаыскӧд уджавны? Юала: «А тӧ ылӧссӧ кӧть тӧданныд, мый ми тан кутам вӧчны, кызд уджавны?» Челядь юрнас довкйӧдлӧны: тӧдам. А сесся содтӧны: «Тӧ мянӧс кутанныд диктант бура гижны велӧдны, а то озджык артмы...» Да, мися... Юрӧс гыжъяла. Сесся и висьталӧ, мый ме насянь виччыся. Коймӧд лунас колис... квайт морт. Но ӧнӧдз найӧс казътыла, ставыс рӧднӧй челядь кодӧ! Збыльысь творческой йӧз. Мед кӧ эз лоны ставныс гижысьясӧн (кӧть и кодсюрӧ ӧнӧ на гижӧны), но мортӧн лоисны, олӧмас ставныс инасисны. А сидзсӧ «Петас» пыр 300 гӧгӧр морт мунис, творческой «пӧртйыс» ёнакодӧ пуис. Но воысь воӧ сьӧкыдджык... Компьютерыд кӧ эм, юр вемтӧ уджӧдны оз ков. Но да ми ӧнӧ мӧдтор йылысь сёрнитам. Мыйла ме сӧк гижы шыӧдчӧмсӧ? Кысянькӧ пыдисянь гӧгӧрвои: воис кад, кор верма мыйкӧ мукӧдыслы сетны, мыйӧнкӧ отсыштны... Вӧлӧ кӧ плӧтник либӧ столяр — велӧдӧ эськӧ пуӧн вӧдитчыны. Но менӧ кыскис творчество. Та понда и заводитӧ томуловкӧд уджавны, сибӧдны найӧс литературной удж дорӧ, музыка дорӧ... Медся ыджыд козин, медся ыджыд дон — кор аддзан, кызд кыпалӧ-сӧвмӧ мортыс. Сылы олӧмас кокниджык лоас! Сийӧс ме мырдди «уличыслысь», мед эз кӧвтчы да эз таргайт ассьыс олӧмсӧ нинӧм абуас! Сесся нинӧм оз ков. Сӧмын радлан, кор тэнад челядьлӧн гижӧмторъясыс петалӧны быдсяма газет-журналын, небӧгъясын, босьтӧны призьяс. Но тайӧ абу главнойыс. Медшӧрыс — мый бур йӧзӧн лоисны. Сидзкӧ, и тэнад тан кушӧмкӧ пайтор эм. Вот тайӧ — тӧдчанатор.

— Ог, дерт, тӧд, кодлӧн кызди, но эм кӧ «вдохновение», кысь юан сийӧ васӧ? И эм-ӧ?

* «Ва берд» — Помӧсдинын мунысь авторской сыланкывъяслӧн фестиваль.

— Кыв шутӧг, быд гижысь «вдохновение» вежӧртассӧ гӧгӧр-воӧ. Коркӧ гижсьӧ, коркӧ — оз. Бытьтӧ керыштӧны, бытьтӧ вежӧрыд асья руӧн тырӧ. Заводитан нимкодпырысь кывбур гижны и... джӧмдан. Оз лок колана мӧвпыс, оз сюр колана кывйыс — и пом. Шыбит сӧк джынъя кывбуртӧ бокӧ, и... ве-жон мысти сійӧс тыр-бура помалан. Мый лоис, мый тӧнад юрын вежсис? А код тӧдас... Бара вот гижсьӧ, бара вот мӧвпав-сьӧ! Мем кокни вӧрын. Сӧні кывъясыд и шыладыд юрад бура воӧны. Но кутны найӧс сьӧкыд! Дас минут мысти выль мӧвпъяс нин чужӧны, а важыс — тшӧкыда вунлӧ. Татшӧм здукъясас диктофон оз мешайт. Но ме сійӧс ог новлӧдлы...

— *Эм-ӧ гижысьлӧн кутшӧмкӧ призвание? А эм кӧ, мыйын сійӧ? Мыйла мортислы колӧ гижны? Пырӧдчыны быдсикас творчествас?*

— Эм, кӧнкӧ. Но тшап, ыкша кывъясӧн тан оз ков сӧр-нитны. Прӧстӧ шуам, мый олӧмас гижысьыс — колӧ. Век жӧ ми ставным быдмылӧм кутшӧмкӧ небӧгъяс вылын, тӧдмалӧм на отсӧгӧн олӧмсӧ. Водзын небӧгыд медшӧр велӧдысьӧн вӧлі. А кодкӧ ӧд найӧс гижис? Сідзкӧ гижӧдыс — коланатор. И ги-жысьыс колӧ. А творчество кузя... Ме век шула: мортлӧн эм лы-йй, но эм и пытшкӧс лов, рочӧн — душа. Мортислы, мед овны, колӧ сынӧд. Кулас сытӧг. А лолыслы мый колӧ, мед овны? Ме чайта, мый лолыслы сынӧднас лоӧ творчество. Кӧсь-ян сойвужтӧ ӧнмӧдны — босьтан гира. А кызд сӧвмӧдны-ӧнмӧд-ны юр вежӧртӧ? Пырӧдчы кутшӧмкӧ творчествоӧ. Вот татшӧм серпас.

— *А мыйла да кодлы колӧ лыддъысьны?*

— Лыддъысьны колӧ ставлы. Дерт — мый сьӧлӧм вылад воӧ. Компьютер оз веж небӧгтӧ. Сійӧ коркӧ вермас и «нитшсьӧд-ны» юр вемтӧ. Мыйла? Компьютер сетӧ синмад сідз шусяна «веськыд» информация. Монитор вылӧ видзӧдлӧн — ставыс ясыд. Вывті ӧдйӧ ставыс юр вемад вӧчсьӧ. А небӧгыд тшӧктӧ юр вежӧртӧ дырджык уджӧдыштны. Медпервой видзӧдлан буква-яс вылӧ, лыддьян кыв да сӧрникузя, чужтан вежӧрад образ, сӧсся водзӧ мӧвпыштан... Юрыд сӧк ӧнджыка уджалӧ. А тайӧ олӧмад сгӧдитчас.

— *Александр Васильевич, мый эн вевъяв, эн удит водзджык, мый окота на вӧчны? Кызди важӧн шулісны — колӧ?*

— Некор эг овлы аския лунӧн. И ог тӧд, мый аски лоӧ. Но и талунъя лунсӧ унаыс эг жӧ помӧдз донъяв. Сы вӧсна талун кежлӧ ӧтша на удиті вӧчны (сӧрни мунӧ творчество йылысь). Век жӧ ме «дышистскӧй» партияысь... Колӧкӧ, ӧтнам и эм та-йӧ котырас? Сідзкӧ, ачым — камандирыс? Юрын мӧвпыс уна, но мый пӧртеся олӧмӧ — ог тӧд. И ог гадайт.

— *Мый эськӧ сиин «Войвыв кодзув» журнал лыддъысьяслы, став коми йӧзыслы?*

— Лыддъысьыслы — выль гижӧдъяс. Журналлы — выль гижысьясӧс. Коми йӧзлы — кольны комиӧн. Пыдди пуктыны, сӧвмӧдны чужан кыв. Ас кывтӧгыд быд народ кулӧ. Коми мортлы колӧ ӧтитор гӧгӧрвоны: кӧть сійӧ да сылӧн челядыс кутасны сӧрнитны рочӧн, найӧ рочъясӧн некор оз лоны. Весиг дасӧд поколениеас. Шӧракостӧ вошӧм йӧз артмасны. Кызд шу-

ласны, генетикакөд он вензы. Радлөй, мый чужомсянныс комияс кык культура босьтёны: коми да роч. И век жё комиыс наын — вирё суйом культураыс, подулыс. Эн шеныштчөй сыысь. А то историяыс сконйыштас, дзободас, сийö — медся стрөг учительыс.

— *Аттьö сёрниссьид! Сиам уджын вермёмъяс! Кузь нэм да бур шуд!*

— И тiянлы сiдз жö.



Снимокъяс вылын:

1. «Ленин туйöд» газет редакцияын уджалігөн. Шуйгаладорсянь: Василий Лодыгин, Иван Тарабукин, Александр Шебырев, Вячеслав Бабин.

2. Вöралігөн.

3. «Эзысь борд» литература конкурсын «Проза» номинацияын вермысь, 2008 во.

4. Гöтырыскöд, Ольга Владимировнакөд.

Снимокъясыс А.Шебыревлөн гортса архивысь.



Вөрса ловъяс

ВИСЬТЪЯС

Ласича

Өндрей боквыв кыйкнитліс, орчча рassaлөминас брызгыс чери сювтор... Рөмдыштө нин, та вөсна вөр керка дорас бара ком черисө вөчис-керис, эз тай юбердса нейджыд лыа көса вылас, кыз пырджык овлө. Бара кыйкнитліс. Мыйкө талун сылөн вертляв ёртыс оз тыдав...

Кык во чөж нин төдсаёсь, да кызкө весиг велаліс сы дорө Өндрей. Керка дорын орчча куйлысь нэмөвөйся энөвтөм бунтын вит во сайын овмөдчыліс ласича семья, и со өти кольччис... Съөлөм вылас, буракө, чужан местаыс воис. А гашкө, позсө видзны мөдысь кешлө кольөдісны... Колян во сэсся төдмасисны зывер да морт. Өндрей сэк чери жө весаліс, сювсө шыблаліс раскын петөм посныыдик да нэриник кыззяслань. Казяліс: пуяс костас кодкө кышкө, мошкоритчө. «Шыр али мый?»— первойсө веськодя мөвпыштіс Өндрей. Но абу шыр вөлөма. Кор ныр йывсө да скөр синъяссө мыччис, Өндрей төдмаліс — ласича.

— Мый, дармөвөй вылө локтін, мошкоритчан сэн?— сераліс зывер вылын морт.— Та ыджада вөрас сёяныд нин оз тырмы? Давай нятшкы, мен чери сювйыд абу жаль!

Унаысь сэсся вердліс Өндрей тайө ласичасө. А төрыт вот зыкө-венө сыкөд воисны, да Өндрей ласичасө джагнитны дась вөлі. Нёровтчан рытланьыс нин керкаас воис, пусиг-пражитчиг-кості сэсся пемыдыс суөдіс. Сёрөн водіс (а чеччыны коліс водз асылын). Куим час асылын мортөс кутшөмкө гольгөм шы пальөдіс, синсө восьтмөн. Керка вевт улас быттьөкө тыш муніс. Ува-ава... Гиль-голь! Кодкө чушкис, кодкө вөсни гөлөсөн чилзіс... Гөгөрвоис Өндрей: тайө ласичаыд «дурө», шыръясөс зэвтөма, джагйөдлө... Колснитіс йиркас тшайподнас, унзильвывсьыс горөдіс:

— Дутды! Узыны лэдз, мутивөй!

Но ласичалы пөсь ни көдзыд. Водзө воюйтө шыръяскөд. Дзикөдз паляліс Өндрей. Пысаліс юрас «шахтёрскөй пөнар», кокнас скөрысь чужийс өдзөсас, ывлаө петіс. Пөварняын сулаліс кык ведра. Өтиыс — ва тыра, мөдыс — куш. Аддзө Өндрей, куш ведраас — шыръяс. Ставыс гырда да кольбсь, шойясыс нин. Татшөм ыджыд шыръяссө Өндрей водзті синнас эз адзывлы. Кытысь кыскалөма мутивөйыс? Но гөгөрвоис — ласичаыс сылы шыръяссө татчө гольөдөма, козин пыдди, бур вөчөмсьыс, чери сювйөн номсөдлөмсьыс... Сөй пө, мортөй, ме буртө помнита! Но Өндрей өні эз донъяв ласичаыслысь бур вөчөмсө.

— Лөнь!— пыр на горзіс, повзёдліс войсө да вөр-васө.— Узыны лэдз! На чөрта тэнад шыръясыд мен? Ачыд сөй, мед

виньдан! Калауш кодъ, а додь тыр джагнитомыд! Вот и сёй, колёкё! А мен эн мешайтчы! Шковга, сідз и тёд!

Кум-кам бөр пырис керкаас. А ласичаыд... лөнис. Шыч ни рач. Чилзём ни чушкём сэсся эз кыв.

Куйлө Ёндрей, унмыс вошис, думайтө: «Ёбидитчис... Меным думсыс бур вөчис, а карза сы вылө, грөзитча... Абу делө... Но немтор, бурасяс на...»

...Но талун ласичаыд оз тыдав. Шыблалём сювъяс дінас некод оз нюсась. Збыльысь, колёкё, ёбидитчис Ёндрей вылө, аслас «карас», бунт улас, пырис, нырсө оз мыччы. Колө жө, кутшөм вылын ныра, дарөм зьвер! Но и ми вылын ныраось, копрасьны ог жө кужой, ог көсйой!

Весаліс ёні Ёндрей черисө, нэмөвөйся ыргөн яндөваысь кисө мыськис. Колө сэсся керка пачсө ломтыштны, көть өти ведра ва юысь вайны, нөшта на и ывлаө бипурасьлыны. Бара пемыдыс суас...

Бөр керкасянь юөдз — сё кызь воськов. Ёндрей коркө нинөм вөчигмоз лыддыліс, төдө. Шашаритіс киас өти куш ведра, тэрмасьомөн лёнчикайтіс юлань. Гумовтіс пинь поткөдан көдзыд васө, бергөдчис, и... төкөтё эз чермун! Сьөлөмыс кок пыдөсланьыс усыліс, а тушасө быттё сөніка ваө сюйлісны. Вөлі мыйысь: керкаө нуысь ордым шөрын, дас воськов сайын, дуввидзис... ош. Абу арөс-мөдся кодзувкоткар пузалалысь да вильшасьысь зьвер... Мөд. Верстё. Лют. Нөшта ранитчөм, шуйга бөр кокыс — вируля. Капканө, буди, веськавлөма, либө сідзи вөрас дойдөма... Сувтса синмөн зьверыс видзөдіс Ёндрей вылө. Повтөг, и сэк жө быттё веськодпырысь... Ошкыс мортысь нинөм эз дзеб, синнас веськыда висьталіс сылы: ме тэла локті... И некытчө меысь он воштысь. Гөгөрвоис тайөс Ёндрей, сьөлөмөдзыс гөгөрвоөмыс йиджис.

«Сё лешак! — көритіс асьсө морт. — Дзикөдз дурми, керка дорсыс ошсө водзджык эг казяв? Тыпу, кыйсысь! Ме бөрся сійө, колёкё, локтөмсянь нин кыйкъяліс, виччысис? Сідзи и колө меным, мөмөтлы! Вөралысьөн шусян! Эк, Туган кө тан вөлі... Но грек вылад коксө дойдіс, лешакыд, гортө кольны лоис, көть ёна никсіс, аскөд корис босьтны. Быттё мыйкө кылөма, төдөма... Вот ёні и сюри, веськалі... Ва ведранад сэсся и водзсась. Пурт ни чер сьөрысь абу, пищальой керка пөварняын стенас өшөдөма. Быттё ставсө артыштөма зьверыс. Ёні сійө — кыйсысыс, а ме — зьверыс. Увлань юрөн бергөдчим. Абу дивө. Бөр оломсө тайө ошкыс бура төдө. Куим кокнад йөра да мукөд нель кока кыйдөс бөрсяыд он вөтчы, он суөд, тшыг нисьө пөтөн гуө он жө вод, а морт яйыд ёні сылы — буретш... Окота на гуас куткыртчывны, лючки төвсө колявны, но чөжөм гостөгыд — сьөкыд. Вын колө. Медпервой — яй. Вот и морт вылө... А татшөмыд — зырөдас! Воштысьны некытчө. Кыдз и меным. И ме зьверсө отарсянь гөгөрвоа. Но и аслым окота жө на олыштны! Думайт, юртө уджөд... Веськыда синмас эн видзөд, неуна горулөджык, но син увсьыд эн вошты... Колёкё, вешъяс на. Кинад эн шенась, лэчыд гөлөсөн эн чилзы, мышнад эн бергөдчы... Видзөд, видзөд... Сюся видзөд. Ёти воськов ньөжйөник бөрлань вөч... Сулалө... Сулалө? Гашкө, оз и уськөдчы? Ме — морт, а сійө — зьвер, пузчужөмсянныс мамыс велөдө: пов мор-

тысь, пов... Ёні мѡд воськов бѡрлань вѡчышт... Сулалѡ... Сулалѡ!? Вай мун, бѡкѡ вешйышт, орчча усьѡм коз саяс вош... Мый таджгын, дуввидзан? Морт яйыд абу чѡскыд! Вѡрзѡдан, асьтѡ изьведитасны. Мѡд мортгяс. Локтасны, виасны, начкасны. Колѡ тѡд? Мун! Оз мун... Тшѡтгыс нин сылі вывсьыс сувтис... Ёні зырѡдас. Чеччыштас... Ва ведранас юрас лыя да ачым юас, кѡдзыд ваас, чеччышта. Ваас кокныдджык... Колѡкѡ, оз и чеччышт, повзяс. Но бурѡн ме ог жѡ сетчы! Скѡрмѡдіс. Куим ошлысь ловсѡ босытлі нин, мед кѡть и пон улысь да капкан вылысь...»

А зыверыс и збыльысь вот-вот зырѡдас. Синмыс гырдемис, тшѡтгыс «ирокез» моз сулалѡ. Пельсѡ со топѡдіс, дзоньвидза бѡргья коксѡ зѡвтис...

Мый лоис водзѡ, Ёндрей эз и гѡгѡрво. Сылы кажитчис, мый ошкыслы юрас кодкѡ... плетьѡн швачкис! Шву-у-ч! Кутшѡмкѡ чушнитѡм кывліс, вѡсна чилѡстѡм... Лѡкысь равѡстис ярмѡм зывер, мыйлакѡ шуйга пеляс лапанас кутчысис, юнас ѡтарѡмѡдарѡ пондіс шенасьны, да и тупыльтчис, тупыльтчис ошкыс... Юлань лѡчысь ордымѡд, веськыда кынмѡм Ёндрей вылѡ... А сѡсся — Ёндрей дорті, швач орчѡн, сѡмын китѡ нюжѡд... И — юлань, валань... Мыр моз сулалысь Ёндрей весиг ва ведрасѡ кысьыс эз уськѡд (кутшѡм нин ведрѡн лыйѡм!), сѡтшѡма шемѡсмис. Бѡрлань видзѡдліс. Вируля кока ош бузѡдчис вѡрса ю шѡрын, кѡдзыд ваас, пыр на равзис, пеляс шлопкѡдіс, быттѡ не-тшыштны ассьыс пельсѡ кѡсйис...

А сѡсся равзѡмыс бырис. Ошкыс буз-баз келіс юсѡ да неуна эргигтырйи саяліс вѡрас. И тайѡ жѡ здукас Ёндрей кок увті швичнитис-луйыштіс кутшѡмкѡ пелькиник зывер. Ласича...

Пукаліс Ёндрей берег дорас, ведрасѡ сывйыштѡмѡн, кыдзкѡ веськодпырысь видзѡдіс саялгысь ва вылас. Лов пытшкыс ѡні сылѡн вѡлі кѡдзыд да куш, быттѡ мыйѡнкѡ кимльѡскивив шыбитисны сѡсь став шоныдсѡ. Лигышмуніс мортыд, нинѡм и шуны. Эбѡсыс быри. А сѡсся кыскѡ и тирѡм висьѡм локтис. Сыркьяліс Ёндрей. Став тушанас. Эз бѡрд, эз омляв кѡин моз, а сыркъяліс... Тушанас...

А томиник кыдз пу сайсянь морт вылѡ сюся видзѡдіс визув да повтѡм зывер. Ласича. Колѡкѡ, ичѡт вежѡрнас тшѡтш жѡ мѡвпаліс да кѡсйис ѡні Ёндрейлы шуны: «Но мый, кык кока, садьтѡгыд повзылін? Медся сюсьѡн да ѡнѡн асьтѡ лыдьян, а збыльвылас... Сѡмын пищальѡн посйисян. Ёні тѡныд весиг и черыд эськѡ эз отсав, ошкыдлы черыд — тшаква... И ме сйѡс гѡгѡрвоа. Ранитчѡма, тшыг нисьѡ пѡт олѡ, сьѡкыд... Яйтѡгыд не-кыдз, чѡд да тшак вылад госыд оз сод. Ошкыс мен нинѡм лѡксѡ эз вѡч, но... И тѡ эн вѡч, кык кока! Корсюрѡ весиг номсѡдлін на менѡ чери да пѡтка сювнад, кѡть тшебритігмоз шыблалін, помнита... Артмѡ, мый бур вѡчин. И пищаль помнад первойсянныс эн ыршась. Ме буралі жѡ тѡд, медгоса шыръяссѡ сѡк ведрѡад лѡді... Сѡй да чѡсмась, нимкодьясь да жыкруйт. А тѡ артачитчан, ыршасьны, горзыны мѡдін, пищальѡн грѡзитчин! Узьны пѡ он лѡдз, вой шѡра войнас гольѡдчан, камѡдчан... А мый меным луныс? Миян кодь зыверыд войнас и олѡ, сылы пемыдыс — ѡрт. Тиян ног — ставыс мѡдарѡ. А тѡ сѡтшѡм жѡ, кутшѡм став кык кокаыс. Тѡкѡд ѡртасьны сьѡкыд, а вот скѡрмѡдны

кокни. И сэк нюмъялігмоз ме коддьомтё виан. Син лапниттөг. Он дрөгнит, быттё сідзи и колё. А ошкёс аддзан, да сёлёмыд коклябөрөдзыд усьё. И сёмын сэки гөгөрволян, кутшөм тэ збыль-вылас слаб... Но ме тэысь пола жё. Став васаыс да вёрсаыс полёны. Чери сювъястё меным сэсса эн шыблав, дарёвёйыд оз ков... Ог сэсса лок... Ми тэкөд абу нин ёртъяс. Отчыд дорйи, мёдысь ог... А ошкыс мед оло. Прощайт...» И лыйыштис-вошис, аслас «карё» тювкнитис.

...А вежон мысти Ёндрей ошла локтис. Изъевитны колё, а то мёд морт выло коркё чеччыштас. Отчыд кё эз повззы, мёдысь оз жё... Иван сёякыскөд да ыджыд пиыскөд, Васькөд, куим понйөн локтисны, регыдөн и туялисны да пановтисны тёдса оштё. Зъверыс омольджыка нин чотикайтис, бурдыштёма, буракё, кокыс. Шенасис лапаяснас да туплясис муас куим понйысь пикё воём зъвер. Горзис, быттё олом вылас норасис. Эргис. А мортыдды мый? Дасьтё — лый... Понъяс сы весът ставсё нин вёчисны. И век жё Ёндрейлөн кийс лыйнысё эз лыб, сёякыслы тшөктис вывтисысь ошсё нэм кежлас унмовсёдны. Со, лэптёма нин пищаль стволыс...

— Менам понйё эн веськав!— горөдіс Ёндрей. А сёякыс чургөдөм пищальнас мыйкё виччысис, виччысис...

...Кыдзкё нем вичысьтөг чилөстис Туган, Ёндрейлөн медбур ай понйыс. Кыкысь тьявкнитис, кутшөмкё гөгөрвотөм дойысь бок-выв чеччыштис. Сэсса никөстис Арго, Иван сёяклөн понйыс... И коймөд крукыль бёжаыс бара жё уйкнитис боклань. Быттё плетён швачөдісны найөс. Швуч да швач. Кыліс сёмын: чу-у-у-ш... Гөгөрвотөмтор... Вом паськөдөмөн видзөдіс став вылас Вась, весиг пищаль йывсьыс вунөдіс. Зэвтчөм чужёма, но кын чуркаөн пыр на чургөдөм стволнас сулаліс сёякыс, некыз эз и слөймы ошкыслы лыйны. А зъверыс сэк кості дугдіс равзыны, винёла песовтчис, да и воши колян वोся пөрөм пу вуж сайё. Быттё некор тан эз и вөвлы, вуджөрыс да дукуыс сёмын коли. Ош бөрся, дерт, чепөсйисны и понъяс. Вочасөн увтчөм, эргөм да никсөм шыяс ылыстчисны, вошисны...

— Мый тайё вөлі?— батыланьыс бергөдчис Вась.— Тэ аддзылін? Мыйся дивө?! Мый понъяскөд лои?

— Ласича...— гусьоникөн, шөпкигмоз шуис Ёндрей. Но Вась кыліс батысё.

— Эсійөыд? Мый тай висьталін?— быттё повзёмөн юаліс Вась.

— Да-а-а...

Балябөжсё гыжъяліс и Иван. Сійё гөгөрвоис жё Ёндрейөс.

— Да-а-а... Мися, мый и эм-а... Видзөд, төв ныр моз шыблаліс миянлысь понъястё! А збойлуныс! А лёкыс! Колё жё! Первойысь аддза! Со керкалань котөртис, колөкө, йирк вылас кайис... Абу ласича, а трасича! Муна, лья!

— Он лый!— лёкысь горөдіс сёякыслы Ёндрей.— Видлы сёмын!

...А мыр сайсянь на выло бара кыйкъяліс ласича. Эз нин сэтшөм скөра, а быттё вильышпырысь. Колөкө, таdzi кымын мөвпаліс: «Но мый, кык кокаяс, балябөжнытё гыжъяланныд? Гыжъялөй... Шуланныд тай, кыйтөм ошкыддысь пө кусё водзвыв

эн юклöй. Тадз и эм. Мед на олыштас му вылас, абу на пöрысь. Кор дзормас, пиньтöммас да гыжъясыс ныжмасны, сэк ачыс сьмертсö кутас корсьны либö гуас воштыяс. Кутшöм тi судьяяс? Мыйла дженьдöдны нэмсö? Морт вылад сэсся тайö ошкыс оз нин ырыштчы, оз зырöд, нэм кежлас наука лои, ыліті кытшов-тас... Морт яй көрсö эз удит тöдмавы, и водзö вылö биысь моз повны кутас. Олыштöй на, морт да ош. Öта-мöдтö эн пановтöй, парма-вöрас тöранныд. А ме сьölöм бурмымөн вильшасьыштi! Весиг скöрмыны эг удит. А скöрма кө... сэк некод оз сувтöд. Сэк менö вины сöмын верман. Мый тiян понъясыд? Велалöмаöсь көзяин кок косттi гартласьны... Быд вужляысь повзьöмаöсь. Абу тай важся лайкаяс кодыд, кодыясысь весиг миян ласича пöль-пöчьяс повлöмаöсь... Няرمىсны... Кокас кутчысян — кага моз нярöдчöны, никсöны. Тiрзян сьölöмъяс, сöмын ылöсас тывгыны и кужöны. Полöмысла. Вöрсö вунöдiсны. Эг нин дойдав найöс, эг дöбелькиав... Көть позьö вöлі! Да, абу көинъяс... Вот рудьяс вылад и ме первойнад ог чеччышт, оз кө нин дзикöдз жмитны, вывтiасьны мöдны... Но полöм ру абу жö. Ме вöрад некодысь ог пов, став зьверыс чужöмсяньыс тöдö, ыджыдыс и дзоляыс. Ог и ошйысь, збыль шуа. Этшöй, дерт, лёкиник, скöр-йылысь верма и йöраöс либö ошкөс чергöдны, пельöдыс юр вемöдзыс пырны. Көсья кө... Но татшöмыс менам эз на вöвлы. Гашкö, томджык на? Прöщайт, Öндрей. Тэнö ме дорйи, и ошкөс дорйи. Правдаыс öд колö олöмас? Вöрса законыд чорыд. Сiйö оз тшöкты зьверлы мортöс ловъяывысьыс сёйны. Шойсö — мöд делö... А ошкыс ырыштчис тайö законсö торкны. Оз позь... Вöрса олöмыс сэк дзикöдз гудыртчас. Тi, кык кокаяс, ассыныд гижöм законъястö син лапниттöг торкаланныд... Юръяндзим. Но, тiян делö... Олöй, кызд кужанныд. Сöмын вöрас эн ыджыдалöй, эн мешайтчöй көн оз ков, эн гартласьöй. Коркö вермам и дöзмыны...»

...Тöдса ласичаыскöд Öндрей сэсся некор эз паныдасьлыв. Вешйис, буракö, эновтiс ассыс чужанiнсö, бунтувса «карсö». Вошис помтöм парма-вöрас и тöдса ош.

...И бара кышöдчöны Öндрейлөн вөр керкаын збоймöм да этш тöдтöм шыръяс, войнас узыны оз лэдзны. Майбыр, вöля! Шыр нальк нин весиг лешакъясысь оз отсав, оз дорйы. Дорын узылыны велöдысь абу. Та вöсна корсюрö, унмысь палялöм бö-рын, Öндрей ышлолалöмөн шуывлö: «Кöні тэ, менам ласича?» Ош йылысь сiйö оз казътив. Вунöдiс нин. Но пищальсö вала лэччигъясөн öні мыш саяс шыбитлö. Код тöдас...

Мой

Иван скöр синъясөн видзöдiс мой вылö.

— Но мый, сюрин?— шöпкöдiс пищаль мушка улас кутiгөн.— Сюрин... Некытчö он воштысь... Легыштчан — юрад лыя. Ме тэд шулі, мед весасин тась? Шулі! Ме тэд шулі, мед пиянтö вöтлiн? Шулі! Ме тэд бöръя волiгас кыв сетлі, мый ад-дза кө, плешкад лыя? Сетлі. Но вот, öні эн öбижайтчы!

...Тайö пöрысь мойыс дзикöдз дöзмöдiс, пикö воштiс Иванöс.

Вит во сайын кортөг-юавтөг кысянькө горуvsянь воёдчис Ырым ю йылөдыс, веськыда Иванлөн ком кыян местасөдз, да вö-люйтчыны кутіс, быттö гортас... Аслас местаөн нин Ырым йывсö, буракö, лыддьö. Юсö регыдөн и понис, лун-вой муркөдчис, багатыр кодь плöтина вöчис, и васö дзикөдз тупкис. Сідз нин öдвa эмышт Ырым йылыс, а тас улас дзикөдз косьмис, гырысь черилөн олан гуясыс ляпкалісны, гобльöгьяс бырисны. Дерт жö, чериыд вошис, сöмын вугыр йылысь дарöвöй сам сёйысьлы, катанарлы, вöля лои.

Иван терпитіс. Коми мужичöй тöдіс: мойыд — абу вурд, сысь чериыд ёнасö оз пов. Мöд делö — вурд... Варвар. Вур-вар сёйö став веглясьысьсö, быдсяма черитö, вöтлысьмөн на бёрся вöтлысьö. Лёка олö, скöра. И чериыд вурдсьыд биысь моз полö. Но мойсьыд тай пöльзаыс ичöt жö вöлöма. Юсö поньталö, трасича бутыльыд, Паськалісны, некытчö наысь воштысьны. Мöд делö — водзын...

Водзын... Иванлөн олөмас уна грек. Петкөддöй югыд ва кодь сöстөм мортсö! Көть öтиöс. Но öти грек Иван паметысь мыйлакö öнөдз оз вушйы. Быттö эськö нинöм сэтшöмыс эз и вöв... 1976 во... Сöмын на сентябр заводитчис, баба гожöм кодь пансис. Иванлы — дас квайт. Öкмысöд классын зонмыс велөдчö. Öтчыд субöта лунö (школаас эз и ветлы) Ладимер ёртыскöд узьöмөн мөдөдчис Пырас ю вылö ком вугралыштны. Дерт, и пищальяс босьтісны, сьöла бёрся вöтлысьыштны колö жö. Серамсорөн, кокниа воёдчисны том кокнад Вэтэса местаөдз, шатинасьны босьтчисны. Иван аслас радейтана Скамья косьт вылö сувтіс, Ладимер — неуна горулөджык. Вуграсьö дас квайт арöса Вань...

Син бöжнас аддзис — косьт горулас, лыа көсаас, ыджыдкодь колода куйлö. Колода и колода. Куйлö да и куйлö... Этша али мый сэтшöмыс ю пыдöсад? «Мед вугырöй оз пысась-а...» — сöмын думыштіс Вань. А сэсся колодаыд... ва паныд вөрзис. Ваньлөн вежöрыс оз удит вöтчыны син бёрсяыс. Пыр на юрас: «Колода, колода...» А сэсся быттö нöшкөн вачкисны. Колодаыд ю паныдтö оз ветлы! Ёнасö оз и помнит, мый водзöсö сэсся лои, сэтшöм öдйö ставыс артмис. Öти здукөн кимльöскивив шыбитіс шатинсö берегас, кузь гöленя сапöгнас ува-ава чеччыштіс косьтлөн варола сялыгысь ваас (а ваыс пидзöсөдз и вöлі). «Кутшöмкö звер...» — войлаліс Вань юрын мөвп. Куим воськолөн суөдіс колодатö да чеччыштіс вылас. Кыкнан кокнас. Öтчыд, мöдысь, коймöдысь... А «колодаыд» пыр жö жуймис, лясмис, вывлань рушкуөн кыптіс. Вань төкөтö бөрөн эз пуксьы, эз усь, и кор аддзис кувсьöм зверсö (бöрыннас тыдовтчис: öти чеччыштігөн юрас веськалöма, зверöс кувмöныс дойдалöма). Но кватитіс кыммöм «колодасö» резина кодь бöжöдыс да öдвa-öдвa кыскис косьтлөн галя изъя берегөдз. Лов пытшкас — гөгөрвотөмтор. Öтарсянь быттö — радлун. Зверöс кыйис! Ачыс. Пищальтөг. Висыалан — оз эскыны. Мөдарсянь... Мыйся пемös? Жальлун чужис тöдтөм звер дорас, кытöнкö морös пытшкөсас ылькнитіс... Код тöдас, кутшöм тайö «колода»? Колөкö, некытчö туйтöм? Колөкö, прöстö сідз виöма лои?

Мый вынсьыс горөдіс Ладимерлы:

— Эй! Воы! Ме тан мыйкö кыйи!

Ладимерос кѡдж сайыс Ваньыс дзебис, та вѡсна ёртыслыс ноксьѡмсѡ да нускѡмсѡ сійѡ эз аддзыв. Воча сѡмын горзис:

— Чими али мый? Ог верит! Чимиыд тан абу!

— Воны, шуа! Видзѡдлы, сѣсся тшебрит!

Ладимер збылыс видзѡдліс, и сылѡн синмыс Вань моз жѡ кольчаасис:

— Ог-о-о!.. Мыйся дивѡ?!.. Первойыс аддза! Абу вурд, сійѡс ме тѡда, батыѡ кыйліс... А тайѡ — кутшѡмкѡ кыз рушкуа... А бѡжсѡ, бѡжсѡ видзѡд, Вань! Резина кодъ! Мутант али мый, кидѡс? А куыс ён, видзѡдлы, Вань... Васа... Колѡкѡ, тая и эм ва олысяыд? Но, воротник либѡ шапка вылѡ туяс!

Ладимер олѡмад оз вош. Сады синмѡн сы вылѡ видзѡдѡ. Ичѡтсянныс — пѡрнѡй мужик кодъ. Зіль, колыс, неуна завидь-тыс — кержак кодъ. Нырщикалыс. Став рѡдыс татшѡм. Со и ѡні мортыс медпервой — воротник йылыс... А Вань — Ладимерлѡн вуджѡрыс. Небыдик, ва кукань кодъ рам, му вылас полігтырйи на тувчѡ, абу колыс... Бѡръя гачсѡ сетас, прѡст сюв кодъ.

Дыркоды сѣки юрсѡ гыжъялісны чуймѡм зонкаяс. Медшѡр мѡвпыс: мый ѡні тайѡ дивѡыскѡд вѡчны, кытчѡ сійѡс инавны? Зьвер кутѡ тѡлкѡн кулыны сям на колѡ, ѡтиыс ни мѡдыс тайѡ уджсѡ эз тѡдлыны, няръявны вермасны...

Но торкис налыс юр гыжъялѡмсѡ мужичѡй гѡлѡс:

— Эй, мый тан вѡчанныд? Фью-у-у-у! Оп-па! Ті тай мойѡс начкѡмныд! Неважѡн на Комиѡ йывмѡдны вайлісны, кыскѡ бокыс, Канадаыс ли, мый ли, эн кывлѡй мѡй? Миянѡдз нин мойыс воѡма... Видзѡдтѡ... Дивѡ! Висьталан — оз эскыны. Да-а-а... Хана тѡнлы, зонулов! Мойтѡ кыйны оз позъ. Таыс дзескыдінѡ вермасны гартны, тюрмаѡ йѡршитны. Законыс чорыд. Да, весь-калінныд... Вот и гыжъялѡй водзѡ юртѡ!

Тайѡ мужичѡйсѡ зонъяс тѡдісны ылѡсас. Орчча посѣлокын олѡс. Бокыс локтѡм морт, вужъясьѡма сѣтчѡ. Украинеч. Быдлаті кыржуйтѡ-ветлѡ, быд розьѡ нырсѡ суйѡ. Соритас...

Ладимер эм Ладимер, пузыыс вира морт. Зьвер моз тѡдлытѡг чеччыштис мужичѡйлань, пѡлыслѡн на вурѡм кучик пуртѡсыс нетшыштис косаыс вѡчѡм пуртсѡ, ырыштчис...

— Соритан — изьведита! Пукся, но ловтѡ перъя! Менам вѡкѡй пукалѡ, ог кѡ ме — сійѡ изьведитас! Но и ме верма! Веритан?!!

— Тѣ мый... Ті мый, зонъяс... йѡйминныд али мый? — бледѡ-дѡм чужѡмѡн бокыв чепѡсйис мужичѡй. — Колантор... Мойыс... Нинѡм эг тѡдлы, нинѡм эг кывлы... Мой понда... Ёна колѡ...

И биа-борда чань моз кытчѡкѡ ризѡбтіс вѡрлань, ѡти здукѡн син сайыс саяліс. Сѡмын тручка-трачка бѡрсянныс кывліс.

— Аддзылін, кыз повзѡдѡ?! — ошйысис Ладимер. — Ёні вѡ-рас прѡсека вѡчас! Ха-ха! А гач пиас дасъ вѡлі... Мед тѡдѡ! Ёні оз вузав!

— Пуртнас нѡ мый... — кѡритис ёртсѡ Вань. — Тадз оз ков вѡлі...

— А кыз мѡд ногыс? — скѡрмис Ладимер. — Повзѡдны кѡ — повзѡдны. Сюрѡсѡдзыс, мед тірзис. А участкѡвѡйлы кѡ соритис? Шамыртісны эськѡ! Дзескыдінѡ тѣд окѡта? Мен тай абу-а...

Вась вокй гижё, нинём бурыс пё сэн абу, торйон нин «малолетка» вылын!

Шуисны мойсё гуавны. Дзебны кө, сідзкё, помёдз дзебны! Ружтөмпырысь кыскисны нем виччысьтөм шедөмторсё кузь туруна видз кузя пожөма яг заводитчанінөдз. Кокъяснас парсалісны-джудждөдісны (зыртор весиг эз вөв) кутшөмкё важөн энөвтөм, но мортөн вөчөм гу (водзын, буракё, тан көч кыйлөмаөсь), сьёкыда шмуткисны пыдөсас мой тушасё, тупкалісны яла нитшкөн, тыртісны-вевтисны му вылас куйлысь кос увъясөн да лапъясөн. Сөмын та бөрын сьөлөмыс личаліс. Долямисны быдсөн.

— Корсьөй өні!— вильыш синмөн карөзтіс Ладимер.— Мед, колөкё, зьвер луасьё, лыасыд — абу шой... Докажит! Сідз, Вань?

— Сідз,— юрнас докйөдлө Вань.— Виньдасны корсьны!

...Водзё вуграсисны зонъяс, гортас лэччөдны пуөм-жаритчөм вылө чериыс өдйөкодь өкмис. Гоз-мөд сьөлаөн морт вылө лэччигас лыйисны. Мойвиис. Бара на өникаөн* оз мунны. Öти кывйөн, кыпыд лолөн бөрсё воөдчисны.

— Вунөдам?— янсөдчигөн шуис Вань да мыччис ёртыслы кисё.

— Вунөдам! Нинём эг аддзылөй, нинём эг төдлөй!— кисё воча сетіс Ладимер.

...Кыкнанныс помөдз кывсё эз кутны. Первойя вояс Ваньёс ёнакодь шобрөдліс, вөтас сылы мойыс некымынысь уськөдчыліс. Быттё юрнас өтарө-мөдарө катлөдлө, быттё элясьё: мыйла вииньд, мыйысь? Кыз ныйлөм чеччис асывнас Вань. Сьөлөм вылас бара сьөкыд, абу бур...

Рытнас висьтасис батыслы. Олөмсё төдысь морт чөла кывзіс писё да нурбыльтіс:

— Сьөлөмнад эн усь... Вунөд. Эн төдөмөн вий мойсё, эн горшасьөм ради, пөсьвывсьыд... Вирыд корө, некытчө он воштысь. Вөралысьяс рөдысь. Овлө. Вөр пөлыс да ва пөчыс гөгөрвоасны, прөститасны...

И Ваньлы бара кокняліс. Но лун-мөд мысти виль майшөг чужис. Рытгорув Ладимеркөд пукалісны сиктдорса Миняшор дорын, и Ладимер, дыр чөв олөм бөрын, родігмоз шуис:

— Вань, көсья шуны, да польшта... Эн дивит... Ме мойтө гортө вайи... Ачым висьтала, ог дзеб... А верми и дзебны, эн эськө и төдлы...

— Кыдз вайин? Кытчө вайин? Кор?— весьөпөртчис Вань.— А төдмаласны кө?

— Коді төдмалас?— пыр жө воча ырыштчис Ладимер да сюся видзөдліс ёрт вылас.— Тэ кө он висьтавл.. Но тэ өд он висьтавл? Он висьтавл? Сідз тай вот артмис, ачым абу рад... Батьөкөд юкси мой кузя, эз терпитсьы, а сійө өтиторсё клёнгыны кутіс: пуысь вөчөмъяс пө! Йөй нисьө прөсужьяс пө! Ладнө пө нем думайттөг зьверсё изьведитінньд, но мыйла гуавнысө? Сэ-тшөм дона ку! А тэнад пө — куим чой, налы воротникыс оз ков? Либө аслыд — шапка вылө? Вот тадз... Войнас и кайлім батьөкөд, перийм гусьыд мойтө. Öдва аддзим пемыднад. Батьө кусё веськыда вөрас и кулис, да ещө яйсө на босьтіс. Кыськө

* Öника — кор мунан вөравны да нинём оз шед.

кывлӧма: чӧскыд пӧ. Пуис да, ме эг и видлы... Кыдзкӧ быттӧ абу лӧсьыд... Кезйӧдлӧ. Но ме эг ас вӧсна, ме — чойяс вӧсна, кылан, Вань! Тӧда, мый мойыс — тэнад, тэд сюри, но ачыд жӧ и сисьтыны сійӧс колин, гуавны тшӧктін! Ме, дерт, мыжа. Гӧгӧр-воа... Но тадз тай артмис. Эн скӧрмы помӧдз, эн йӧткышт менӧ. Ёртъясӧн вай колям... Воддза моз... Быдторйыс овлӧ...

— Да ладнӧ,— ӧвтыштчис сэк Вань.— Лоӧма кӧ — лоӧма... Гусьӧн вӧчӧмыд абу бур, но... Эн аслыд... Мед кӧть чойясыд воротник новлӧны, век нин пӧльза. Но вомсӧ мед кутӧны! Бабаяс... Кывяс кӧ — мянӧс топӧдасны.

— Оз, оз!— радлӧ Ладимер.— Батӧ найӧс чорыда стрӧжитіс, ӧні на бадь коръяс моз тіралӧны! Этійӧ... Вань... Колӧкӧ, яйсӧ босьтыштан, джынйыс коли на?

— Колантор!— быдсӧн кезнитӧдіс Ваньӧс.— Мойлысь яй сёйны... Абу ӧд вир тшыг!

— Кыдз кӧсьян...— сӧгласитчис Ладимер.

...Иванлы сэсся олӧм чӧжнад мойыд вель унаысь на уськӧд-чыліс вӧтас. Но сідз, эз нин повзбӧдчӧмӧн... А Ладимер... Дже-нныд нэма вӧлӧма. Армияын кувсис. Война былӧ эз веськавлы, Афганистанӧ эз пырав, а вот тай... Йӧзыс шӧпкӧдчисны — виӧ-маӧсь. Камандиръяс шуисны: машина улӧ нем виччысьтӧг весь-калӧма. Гортсӧ эз и восьтывны. Бать-мамлы — помасьтӧм шог...

А мой куыс Ладимер чойяслы эз и вичмы. Батъыс шапка вурӧдліс, ачыс, буракӧ, и новліс, коркӧ тай Вань казьявліс-а...

Иван армияын жӧ сэк вӧлі. Кор мамыс письмӧын гижис Ладимерлӧн кувсӧм йылысь, йирмӧг босьтіс, сьӧлӧмыс топавліс. Бара на дум вылас уси мойыд. Колӧкӧ, сысянь ставыс, сійӧ ёрӧ? Колӧкӧ, и Ваньӧс тшӧтш...

...И вот ӧні верстяммӧм Иван водзын — бара мой. Мутшӧса, сьӧдӧв, коркӧя кодъ жӧ... Оз тай сунышт, оз вӧрззы, мӧдар берег увсянь юрсӧ ваысь лэптӧма, Иван былӧ дзоргӧ, быттӧ висьтавлы мыйкӧ кӧсйӧ, кутшӧмкӧ гусятӧр. А колӧкӧ, дэльӧдӧ Иванӧс, аслас сьмертыскӧд ворсӧ... Колӧкӧ, шуны кӧсйӧ: «Но мый, Иванушко, дзор юрсиа морт? Лый, ви! Тэ ӧд тайӧс кужан вӧчны, тэ ӧд тайӧс вӧчлін нин, тэ ӧд менӧ вилін нин! Зьвертӧ вины кокни, торйӧн нин кык кока зьверлы... Мый кын из моз сулалан?»

А Иван сулалӧ. Неуна руалыштӧм син пыр мушка улын кутӧ чуймӧдана збой мойӧс. Пищаль стволыс тірӧ, улӧ-вылӧ катла-сьыштӧ... Нерв сӧныс пищалы мортлӧн ори, триньмуніс.

— Вош!— горӧдсис Иванлӧн.— Кылан, вош! Лыя! Изьдевайт-чан али мый?! Ачыд локтін?! Збой? Али каститчан? А ме тадзсӧ ог вермы! Тадзи оз позы! Сунышт, трасича бутылъ, кыкысь ог шу! А мӧдысь аддза — юртӧ пасьнита! Кылан? Вош, мутивӧй!

Вештіс бокӧ пищаль стволсӧ, кватитіс мусьыс кос ув вож да швучнитіс-луйис мойлань. Сӧмын та бӧрын зьверыс весьӧ-пӧртчис, ваас, берег улӧ, суніс...

Кыдзкӧ лигышмунӧмӧн (быттӧ мыр бертіс) пуксис Иван усьӧм колода былӧ, тіралан киӧн куритчан пестіс. Век на вомгорулас броткис:

— Трасича... Мутивӧй... Йывмӧдчӧмныд... Дэльӧдчӧ сэн... Мӧдысь аддза — лыя...

...Вежон мысти Иван (гортас нин) паныдасис Столя Мишкөд. Миш кыйсыны да вёравны лют, быдлаё удитлысь морт, варовитіс:

— Мёйму кайлі Ырым йылад, вуграсышті, тэнад керкаын узи. Шензи: сы мыңдалаын мойыс юсö тасалöма! Ваыс сулалö! Таб чөвтан места абу кольöма! Ыджыд семья, буракö, олö, став юсö абаритöмаöсь. Мый видзöдан? Камöд! Либö капканöн кый, велöда... Силитчисны кө, наысь бурöн сэсса он мын! Удачаыд абу? А көсьян, ме камöда?...

— Ачым тöда!— крапкис Иван.— Тэд делö! Мый менам керка дорас помся кыржуйтан, мöд места оз сюр? Юыс кузь, горув лэччы! А мойяссö эн вөрзёд!

— Нырыд вылын!— воча швучöдіс кывнас Столя Миш.— Корсянь юыс тэнад лой? Цар указ серти али мый? Ваыд — ва пöчыслöн да став йöзыслöн! Ме тэнад лэч туяд ог пыр, а ваыс...

— Видлы пырны...— пинь пырыс шуис Иван, скöрысь видзöдіс Миш вылö.

— Тыпу!..— сьöлыштіс воча Столя Миш.— Морт ногөн сёрнитны тэкöд он вермы... Мед горшад тасасясны Ырымыд да мойясыд!

...Мöд гожöмнас Иван бара ветліс Ырым йылö. Вежсьöм серпасыс шемöсмöдіс: көкъямыс плöтинаысь сöмын öти кольöма, но — медся ёныс, медся ыджыдыс. А мукöдыс мыйлакö эндöмаöсь, и олöмыс сэн бырöма... Мужичöй гөгөрвоис: мамыс, буракö, пиянсö матігөгöрсыйс швучкөдöма-вöтлöма, быттö Иванлысь кывзысьöма. Мунöй пö бурöн, местаыс тырмö... А колөкө, Столя Миш коддьöмыд и дйтшкөдісны ставсö. Абу и дыр, та вылö кө тöдöмөн петан.

Но олөмсö он бырöд! Сійö — помтöм. Колис на тан мойыс! Медся мудерыс, медся сюсьыс да вежöраыс. Кевмысьö Иван, мед буретш сылөн бур тöдсаыс татчö кольччис. Окота мыйлакö аддзысьлыны... Син на син. Воча ныр. Пищальтöг да чертöг. Сідзи. Прöстö. Аддзысьлыны... Окота бур суседъясөн лоны. Мыйкө олөмсьыс выльтор гөгөрвоны... Кутшöмкө гусятор... Кутшöмкө пыді вужъя тöдöмлун...

Эн кувсьы, мой! Ме тэнö нель кокасьыс и кык кокасьыс ачым доръя! Ме тэ дорö муна... Көні тэ, менам мойöй?



Евгений Валерианович Козлов чужис 1960 вося май 18 лу-
нө Емдін районса Эжов сиктын.

1986 воын помалис Сыктывкарса государственной универси-
тетын филология факультет. Кывбуръяс да висьтъяс йөзөдліс
«Войвыв кодзув», «Арт», «Чушканзі» да «Би кинь» журналъясын.

Петісны «Водзкыв пыдди», «Узьтөм войяс», «Кык книга»
асшөр небөгъяс. Коми кыв вылө вуджөдіс финн-йöгра да роч ги-
жысьясöс.

Ставроссияса культура фондлөн Мурманск юкөнкөд уджа-
ліс саам кывъя медводдза поэт Октябрина Вороновалысь «Ялла»
(«Олөм») небөг лэдзöмын. Книгаыс петіс 1993 воын коми, роч
да саам кыв вылын.

Театръяслы комийөдіс Федерико Гарсиа Лоркалысь «Вир паса
кöлысь», Лопе де Вегалысь «Йöкты, муслун», Миклош Дярфаш-
лысь «Садьмы да сыв», Нина Мазурлысь «Леди Капулетти»,
Н.Островскийлысь «Веськыдлуныд бур, а шудыд бурджык»,
Е.Плешаклысь «Петербургса инкогнито» пьесаяс.

Дыр кад уджаліс «Войвыв кодзув» журналын, öні «Чушкан-
зіын».

Россияса гижысь котырö пырысь.

Евгений ВАЛЕРИАН

Ю Джын

КЫВБУРЪЯС

Медводдза гöсьт

Керканым шоныдсö ньöти оз кут,
Кöдзавлö сэтшöма — дубалöм коскөн
Асывнас паляла... Тадзи тай гут
Тулыснад садьмылö öшиньяс костын.
Сы моз жö вынтöма дзизгыны дась;
Чеччыны кад, тулыс ылын на (шутка!),
Мыш вылö шыбита дöмаса пась,
Ломта көрт пач, чайник регыдджык чутка.
Шоналіс керка и чайникыд пöсь!
Кружка тыр чай, кызджык выя нянь вöча.
Гут пызан дорын пö медводдза гöсьт.
Тайон ми öткодьöсь сыкөд.
Дзик стöча!

2014

* * *

Ты весьтын еджыд руыс — тылөн югыд лов.
Му весьтын — мулөн!
Бөр инасяс кытчö колö
Али каяс енэжö?
Шулöны, каяс кө пö, сэки зэрас.

Сідзкө, коркө бөр воас аслас местаө,
Сөмын мөд мыгөрын*
Да астырын**.

Медым воны ас выяд, колө кад.

13.05.2013

* * *

Некутшөм кыв сюрөс. Некутшөм мөвп.
Кывтөны воас.
...Тувсовъя ваөн
Нуө тадз йиястө — пөльыштас төв,
Потласьө,
Ставнас кос берегө кайө.
Чегъялө пуяс, нюклялө бадь,
Берегдор визьогысь вутшъяссө нетшкө,
Төдлытөм вын
Весьөпөртө морт садь,
Зырө и зырө, и нырөмөн кретшкө:
Жугөдө пыжъяс, жугөдө став,
Вужвийөн орөдө велалөм мусө.
Видлөма!
Ёнджыка тувкнитан — сяв-в-в!
Артасян бедьяс моз киссяс,
И «у-у-у»-сө
Шуны он вевъяв — кок мыджөд оз коль,
Вөлін кө йи вылын, дзумгысян улас,
Кок увсыд палакыс разалас: голь-ль-ль...
Тулыс!

2007

* * *

Быд асыв
Садьма и аддза
Лөз енэж
Шөрас югыд шонді
Сикт гөгөр вежөдысь муяс
Горулас
Эзысьөн сералысь ты

Думышта:
Аха!
Ме тадзтө верма жө...

Босьта кабала
Мича карандашъяс
Да серпасала
Лөз-лөз енэж

* *Тані:* мыгөр — форма;

** астыр — состояние.

Шöрас югыд-югыд шонді
Сикт гөгөр вежöдысь муяс
Горулас
Эзысьöн сералысь ты
А улиас — ме!

— Но,
Кодлön серпасыс гажаджык?!

15.05.2008

* * *

Кывтöм пемöсöн
Кысся
Уя
Нырчча
Чужан пельöсö
Аслам шег кодь сиктö
Аслам вөр-ваö
(мед и кисьтöм-куртöм
чегöм-пöрлалöм)
Ош моз
Кöч моз
Гаг моз
Раскö суна
Мöда овны —
Сейны чöд да пув

...Кывтöм пемöсöн
Öд сёрнитöма уна

...И быд ув мен
Паськöм öшан тув

...Муна
Ыджыд видзö пыран лунö
Ёльысь васö юны
Пудйöс нуны
Лолавны

Öд лолöй эз на кув

1997

Гортын арся вой

Öгыр вылö плита пачö
Чöвта «Прима»
Тыртöм пачка,
Кабалаыс чукыртчас да
Лэдзас еджыд тшын.
Сиктным узьö, мама узьö.

Чискан шыён чайник пузьё.
Вой шөр бөр, и кадыс муно —
Лэбис олём джын!

Коркё пета кильчө помё,
Выль чигарка чөвта вомё,
Песта öгыралысь би да
Чайтсяс öти здук —
Пемыд енэж тырыс кодзув,
Менам кийн нöшта кодзув,
Чöж туй йитчис кок ув мукöд —
Вöтын ставыс тшук!

Киöс нюжöда и судза
Енэжыслысь йир.
Коркё лэбалöмысь мудза,
Доналöма вир.

Асьядорыс гортö пыра,
Шоньд руөн кучкас нырö.
Жаль, но ойбыртлыны колö...
Сьölём вылын нор —
Бара, бара, бара, бара
Талун асыв мунны карö,
Но ме тöда — татчö коля
Мыйкö донатор.

Киöс нюжöда и судза
Енэжыслысь йир.
Коркё лэбалöмысь мудза,
Доналöма вир.

2007—2013, сентябрь 30 лун.

«Трактатъ о музыке» книгаысь

...И öтувтчим да лэптім джуджыд йөр,
Мед öтдор йöзысь сайöдчыны сэні,
Выль олём панны, öтув ставсö венны.
...Но регыд ковмис разöдчыны бөр.
Дерт, вöлі би и вöлі шоньд лэбув,
И кöин рöдысь видзчысьны эз ков,
Но öтув йöрад дзескыд, весиг лов
Сэн тшöктытöг да индöдтöг оз лэбав,
Кор вылісянь, законөн пыртём шуд,
Көн индöны, кор йöктыны да сывны!
А коді чайтö асьсö торйён кывны,
То водзвыв тöдса сы кодъyslөн пуд.
...И пондім асьным кöинтъясö пörны,
Кор зыртласьöны ловъяс,

оз нин тörны.

14.11.2012

* * *

...А медводз киссьö кызлөн кор.
Сад йөр и кильчөдор
Виж коръяссьыс нин лои виж,
Виж кывбуръяс көть гиж.
Ар воис. Вöзйö миян ар
И ассъыс календар:
Оз лунөн кадсö артав, тшук,
А пасъялö быд здук.
Көть видлы артыштны, он су,
И «öтик» он на шу,
А со нин торъялöма мөд
Дай коймөд — видлы төд,
Кор пансис тшöтыс, бердас кор?
...И бара уси кор!
И дözмылан, и öктан мудз,
Морт вежөрөн он судз,
Мый понда недыр кежлас ар
Тадз öддзöдлö му шар...

2014, сентябрь 3 лун

* * *

Кык ю
Кык рöдлы
Сетисны
Ветлöм вылö туй
Оланін вылö берег
Сёян и юан

Кык ю
Кык рöдлысь
Сöвмöдісны аслыспöлöс кыв да вежөр

Кык ю
Бать да мам пыр
Сольнитчисны меын

Челядьлөн
Лоöны асланыс юяс
Но тайö кык юяс
Мöдасны овны и наын

2013 во, сентябрь 18 лун

* * *

Руалö... Тöлысь чöж дугдывтöг зэрö, оз пöтлы.
Керкасьыд петан да некытчö талыштны — ва!
Гуранъяс — öтиöс келан, а мөдöс нин вуджин, эн
тöдлы.
Öтгудыр ставыс — и ытшкалöм лудъяс и боръяс,
Идралöм муяс. И пом абу — трактора туй.

...Асывнас кодикö кытчöкö мунас ли келас,
Бергöдчö рытнас оз туй визьöг серти,
А ру пырыс писькöдлöм еджыд туннельöд.
Но тэн и ру!
Киссьöм йöв моз со гумлалі кöмö...
Лолышта — вомкöтш тыр йöла кисель.

2009

* * *

Югыд, югыд тöлыся вой.
Тылысь веркöссö малалö тöвру.
Абу тöвру, а... сöстöм русалка
Коркö татшöм жö тöлыся войö
Мыссис-пулькöдчис мöдлапöв дорын,
Сылөн мыссьöмөн
Вөрзьöдöм лөнныс
Пыр на воалö сералысь гыөн.

...Шонді, шуöны, коркö пö кусö,
Быть пö кусö, но уна морт нэм
Мöдас югöрыс ми дорö воны.
Тадзи вермас-ö лоны, ог тöд...
Колö эскыны.
Эскыны кольö.

06.2013

«Морт олöм» тетрадьысь

* * *

Öшинюв йөр —
Кушмöм, шогалысь сад.
Жугалöм часі моз сувтöма кад...
Тадзи быд во, сöмын миянлысь вежөр
Классикъяс сы выйöдз пöртисны, мый
Радпырысь эскам: ми нинöм ог вежöй,
Пудсьыд он мын,
Он кö кымöсад лый.
...Кöть эськö, чайта да, весигтö ном
Кутшöмкö ногөн и то гөгөрвоö:
Гожöмлы пом кö, и олöмлы пом,
Сöмын öд бара на кодикö лоö,
Мыйкö на лоö, и кадыс оз сувт,
Öти энергия мöдö кö вуджö!
...Пожöмлөн коль либö шабділөн сюв
Усясны муö
И босьтчöны уджö.

15.12.2014

❖ ❖ ❖

Турөб

ВИСЬ Т

Коймөд во муніс Ыджыд война.

Төв. Кыдзи и пыр, турөба төлыс то омлялө, то ланьтыштлө, медым выль өдөбөн тыртны пода и вөла туйяс.

Гортас школасянь локтігөныс Коля казяліс төдтөм зонкаөс. Восьлаліс сійө скөт карталянь нуөдысь туйөд налөн керкалянь. Көть и ёна турөбалө, сәті туй потасыс төдчыштө на, картаө ветлысьыд пыр эм.

Төдтөм зонка мышкыртчөмөн матыстчис. Арлыд сертиыс вөлі Коля кодь кымын жө. Сөмын сылөн мыш сайын өшаліс лёшмөм ноп, а Колялөн — книга-тетрадь тыра воыса киса. Паныдасиг сәки некод эз чолөмасьлы, сёрни пансьыліс юасьөмсянь:

— Тэ коді?

— Веня,— шогпырысь нурбыльтіс детинка.

— А кытчө мунан?

— Ог төд.

— Школасянь?

— Ме ог велөдчы.

— Мыйла?

— Шыбиті. Сочьяс тшыгъялөны, мам висьө, бать фронт вылө муніс, весиг письмө эз на воы.

— А мыйла гортсаыды он отсась? Мый шөйтан?

— Мамо мөдөдіс.

— Кытчө да мыйла?

— Милөстина корны.

— Ачыд кытысь?

— Мөжгаысь.

Коля мөвпыштіс: «Менам бать фронт вылын жө. Письмөыс во нин эз воы. Гашкө, абу нин и ловъя. Гортын кык соч, ыджыд мам дай мамлөн висьлөс сочыс. Уджалысьыс өтнас мам. Но некор и некод менө эз тшөктив ветлөдыны сиктысь сиктө да корны. Ми олам гөля дай тшыгъялөмтө төдам, но Мөжгаад, тыдалө, олөмыс нөшта на сьөкыджык...»

— Кодьясын нө көсьян узьмөдчыны?— юаліс Коля.

— Коді лэдзас. Гашкө, тіянын да?

— Миян керканым ичөт. Асьным квайтөнөсь, торъя узыланін абу.

— Ме көть нин порог дорад.

— Мамолысь юась.

— А сійө гортад?

— Скөт картаын. Локтө зэв сөрөн.

Веня вешийс Коля дорысь. Сувтовкерліс на эськө, оз-ө Коля мыйкө вөйы. Сэсся восьлаліс сикт помлань.

Коля удитіс пыртлыны пес-ва, ломтіс ичөт пач да весаліс кильчө вылысь лым. Көть эськө турөбыс эз на прамөя ланьтлы

да регыдён бөр шөтис лымсö, кызсö лои весалöма. Ыджыд мамыс вердыштис пуом картупельён да йöлөн... Асьным пö мамыд локтöм бöрын нин öтлаын ужнайтыштам.

Регыд пемдiс, ковмис ломзöдны карасина лампа. Коля пуксис лыддысьны да гортса удж гижны. Друг, кылö, кодкö кильчö öдзöссö восьтiс. Ыджыд мамыс шуö:

— Ноко, Колюк, видзöдлы, кодкö, кылö, шаръялö посводзад, керка вуг корсьысьö. Тыдалö, тöдтöм морт.

Коля чепöсйис да восьтiс. Сэни сулалiс Мöжгаса зонкайд. Лым сюръя кодь, шог чужöма. Мыжмöм гөлөсөн юалiс:

— Ме тiянö вои...

— Пыр, некод кö эз лэдз.

— Быдён шуоны, миянын пö дзескыд, ставён пö висям, а керканым тöрöканöсь, вольпасьяс лудикöсь. И вердыштны пö весиг нинöмөн. Гашкö, полöны, мый ме тойöсь. Öти тьöтка сетыштiс туй вылö кык ичöтик мезга шлап, юктöдыштiс шомйöлөн да шуис, вöйысь пö суседъясö. Со и локтi тiянö... Пемдiс дай турöбыс öддзис.

Ыджыд мамыс öлөдiс зонкаясö, Колялы моз шуис: «Öльга тьöтыдлөн лёк поводдяö лысьöмыс ёнтö. Да и нывкаяслы колö узыны, эн гораа сёрнитöй».

Мамыс локтiс, кор пöрысьяс дай дзоля чоюкъяс сьölöмсяныс нин нискисны-узисны: кодi паччöрын, кодi полатъын. Коля да Веня листалiсны библиотекаысь босьтöм книгаяс. Найö бурпöт нин варовитiсны öта-мöдныскöд, тöдмасисны: кыкнанныс нельöд класса велöдчысьяс, батьясныс война пансьöмсяныс фронт вылынöсь, Гитлерлы плешкас пушкаысь лыясны. «Дерт, эз кö пöгибнитны»,— öткодьöсь вöлины кыкнанныслөн думъясныс.

Коля сэсся мыччис Венялы картупель мезгаысь пöжалöм шлап. Виль ёртыслы, вөлөм, тöдса нин татшöм «няньыс». Весиг содтiс, мый пöжалiгас мезгаас кисьтыштöны шомйöв, сэки пöжассö позяс сёйны панялöмөн. Сöмын пö пилипызь оз ков содтыны, сы вöсна мый рушку пытшкад шмакаяс да ывлаад ветлыны он понды вермыны, сэки верман и кувны.

Гортас пырöм бöрын Матрен шензыштiскодь, мый на ордын эм кутшöмкö тöдтöм зонка, но эз лөгась. Öнiя лёк кадö ветлöдысь челядыд абу дивö, дай пöрысьяс эмöсь. Детинкаяс сёрнитiгкостi мамыс пукалiс пöсь пач водзын да сывдiс йизьöм көмкотсö, медым позис пöрччыны турдöм кокъяссьыс.

— Мамо, Венялы талун муннысö некытчö нин, мед миянын узяс, а аски кытчöкö водзö мунас. Сiйö Мöжгаысь, мамыс ыстöма милöстина корны,— юасис мамыслысь Коля.

— Мед узьмöдчас. Сöмын кытчö тöрöдчас-а?

— Ме көть и джоджад,— смелмöдчис шыгасыны Веня, медым шань тьöтыс сöмын ывлаö эз вöтлы.

— Кыдз көсьянный,— миритчис Матрен.— Кыдзи нö, Веня, татшöм ичöтсö да жебиниксö мамыд сэтшöм ылö мöдöдны убöлитiс?

Кор Веня висьталiс, мый мамыс висьö да коръяскö весиг чеччыны оз вермы, мый мöскыс вайсигас кулiс, Колялөн мамыс сэтшöма нормис, весиг синва дзолькунiс... Вешйис занавес сайö да дыр на эз вермы унмовсьны.

А зонкаяс тöрöдчисны идзас перинаа вольпасьö.

* * *

Ывлаын туроб быттьо йоймома: личодлытог шото лымнас, медым выльысь и выльысь одобтыны йожгыльтчом порысь нывбаба выло, быттьо косйо уськодны сийос кок йывсьыс либо медым сийо воштіс туй серсо. А мый эськo и шуан туйнас? Кытсюрo коскодз лым, кытсюрo омьялысь толыс вильыдодз ниртома додь сую туй визьсо. Нывбаба корсьо туй сюрессо керка мыгорьяс серти. Но и найo вошласьоны войся пемыдруд гудырас: он кыв рытъя ломтысьысь пачьяслысь тшын дук, он казяв йи-зьом ошиньясысь вижоват югор. Коть эськo оні быдон гортанысось. Дерт, лампа би улын челядь вочоны урок, дай почьяс рытсо коллялігмоз печкoны.

Нывбаба лигышмуніс сэтшoма, мый сылы ставыс лои веськодъ: и юр сюянін, и пань тыр ва, и шоныдін... Нянь кусок корсьом йылысь эз нин и мовпав. А кодi оні лышкыдасяс? Кодон сийо эм? Ветлодліс лун сьомoснас кык сиктод: некымын нывбаба мыччисны картофель, но кодзыд ва сорон кылoдом бо-рын ставыс бор петіс...

Ань oдва восьлаліс туробаломинті... Лолыс тырoма. Ачыс эз вежорт, келo-o лым пиодыс али лэбзыны дась. Мудом, висян кокьясыс сконьясисны кутшомкo тшупoдo, тыдалo, кильчo поскo. Кор кыпoдіс юрсо, казяліс слабиник югор. Весиг вомгорулас шопкoдыштіс: «Слава тебе господи, отсалін...» Сэсса узыны водом водзылын моз шопкoдіс кутшомкo молитва, но помодзыс эз и шуав, унмовсис: некыт оз доймы, кыном оз сюмав, гогор благодать...

* * *

Асывнас медводзон чеччис Марпа. Косйис восьтыны кильчo одзoссo, медым голикон коть неуна вешталыштны лымсо отарo-модарo, но эз вермы. «Туробыс, тыдалo, ена нобалoма кильчo вылас»,— думыштіс Марпа. Енджыка йоткыштіс одзoссo да кo-тодыс торoдчис-петіс кильчo выло. Аддзис лымйон нобалом ыджыд сьод екмыль да повзьомон горoдчис:

— Матрен, воы татчo!

Матрен чепoсйис кильчo выло. Копыртчис, инмoдчыліс — морт.


— Мамо, одзoссo кoстoн кутлы, ме шудтомсo посводзo кыска. Гашкo, абу на кын.

Туробыс асъядор лoнныштoма, толысьлон нэриник югор улын Матрен аддзис сыри-леткиа кoлыссo, кыкис турдом тушасo одзoс порог вомон да чуймис:

— Ойя дай ойя... Тайo тай нo Выльыбысь Клавди, кодi миянo колян вежоннас на пыраліс. Кынмалoма, коньор, сарство небесной...

Марпаос тіром бoсьтіс: «Со вед порысь мортто рoкыс кыдзи суoдo. Бур коть, торыт Мoжгаса зонкасo сибoдім, эськo и ськод мыйкo вермис лoны...»





Александр Алексеевич Лыуров (1923—1990) чужліс Сыктывдін районса Зеленеч сиктын.

1940 воын помаліс ветеринарнӧй школа, сэсся кык во уджаліс чужан сиктас. 1942 воын муніс фронт вылӧ. Война бӧрын ветеринараліс Айкатылаын. Буретш сэки заводитіс гижны. Уджавліс радиоса корреспондентӧн, «Югыд туй» газетын.

Гижис висътъяс, повесътъяс, очеркъяс. Александр Лыуров творчествоын торъя места босътӧ война тема. Фронтӧвик, сійӧ ас вывтіыс нудіс фронтвывса став сьӧкыд-лунсӧ, сьӧлӧм пырыс лэдзис став дойсӧ — окопас, и странасӧ война бӧрын лэптӧмын.

Редакция тайӧ гижӧднас вӧзйӧ казтьыштны став гижысь-фронтӧвиксӧ, Победа дорыс став бур войтырсӧ. Мудз копыр налы.

Александр ЛЫУРОВ

Менам другъяс йылысь повесть

Сиа Зеленеч сиктса менам тиӧтшъя-яслӧн да ёртъяслӧн — Анатолий да Алексей Лыуровъяслӧн, Александр Аврамовлӧн, Иван Конаковлӧн, Василий Потолицынлӧн, Александр Распутинлӧн — югыд паметълы.

Зэр шы улын

Пемыд. Пӧшти кок улын кисъмӧм ӧмидз рӧма кӧрт пач. Сы вомысь усъысь би югӧръясыс востымасьӧны-ворсӧны палатка ӧдзӧслӧн лапӧд вылын. Ымралӧ шоныд, а кокъяслы, кодъяс нюжӧдчӧмаӧсь кӧрт пач дорӧ, жар.

Лӧнь. Сӧмын корсюрӧ кывлӧ орчча нарвывсаяслӧн вӧтын сёрнитӧм, горӧдчылӧм, ымзӧм либӧ нырӧн шкоркнитлӧм. Палатка стенъясӧ быттӧ лыйлӧны уна тысяча рогаткаысь. Тайӧ зэр. Сылӧн ӧтмоза шарӧдчӧмыс быттӧ баййӧдлӧ: кывзан-кывзан, а сэсся тӧддытӧг унмовсян. Зэрыс заводитчис лун шӧр гӧгӧр. А ӧні уна-ӧ кадыс? Ме кыпӧда киӧс, медем ӧдзӧс лапӧдын ворсысь би югӧръяслӧн вуджӧрыс усис часі циферблат вылӧ. Водз на. Куим час. Сідзкӧ, асыв. Сідзкӧ, тайӧ зэрыс баййӧдлӧ нин менӧ 15 час чӧж.

Кос. Шоныд. Куйла плащ-палаткаӧн вевттӧм коз лапъяс вылын. Ок кутшӧм лӧсьыд, быттӧ гӧн вольпась улысад. А кутшӧмджык менам ёртъяслы, кодъяс колины сэтчӧ?

Ме заводита мӧвпавны ёртъяс йылысь. Син водзӧ ӧти бӧрся мӧд сувтӧны налӧн чужӧмъясыс. Но зэр баййӧдлӧ и баййӧдлӧ. Сьӧктаммӧны синлапъяс, став тушаӧй быттӧ кокняммӧ, чинӧ, а сэсся палаткаӧ пырӧ мам, пуксьӧ нар вылӧ орччӧн, сылӧн чорыд киясыс небыда инмӧдчӧны юрӧ...

И друг кодкӧ тракнитіс менсьым нарийӧс.
Дрын!

Унзіль быттё эз и вёвлы. Час куим, сідзкё, ойбыртсьылёма. Тайё зарядкасё найё век заводитёны квайт час асылын, өти здук сёрмытёг. Кокъяслы кодзыд. Пач кусёма, а лёдсавны некодлы. Палаткаын рёмыд: асья югыдыс писькёдчё неуна калькалём өдзёс лапёд костті, вевтё вёчём неыджыд розьті. Орчча наръяс вылын заводитісны вөрөшитчыны жё. Кыліс мурөстём:

— Лёдсалёй пачсё, коді матынджык!

— Коді медся том,— веськөдіс пач дорын куйлысь.

Тайё инмис меным. Но дыш чеччыны шонёд шынель улысь, ог на вөрззы, быттёкё узя, весиг шкоркнитла.

— Минута-мөд мысти сідз лёдсыштас, мый миян торпыригным оз коль,— шыасис кодкё.

— Эн урсась,— вомалісны сійёс.

— Ог и урсась. Тэ, пехота, немтор он гөгөрво, а ме артиллерист... ошыбитчыштас кё, шуам, немецкёй наводчикыс, сэк «Берта»* мөдөдас ассьыс «чемодансё» буретш миян палатка вылө.

— Эн кырлы сёлөмөс! Передөвёйын ловьяёсь колим, а тані кувныд некодлы абу окота. Одьоджык коть мед мөдөдісны тылө. И кутшөм лешак лөсьөдөма госпитальсё көрт туй станцияыскөд орччөн.

Быттёкё тайё кывъяссө вынсьөдөм могысь, көнкө станцияладорын бара усис снаряд.

Дрын!

Ииркмунісны наръяс, палаткалөн стенъясыс сырмыштісны. И сэк жё миян дінө пырис санитар, вайис пёртъясын рок, термосын чай. Сійө вөлі кыв-вортөм олома мужик. Пилоткаыс быттёкё кымынгтөм пыж, сэтшөм ыджыд, суйёма пельсөдзыс, ватнөй куртка вылас лөз халат, а обмоткиён гартөм вөсньыдик кокчөръясыс некыз эз лөсявны кузь американскөй ботинки-ясыскөд. Санитарлөн мыгөрыс и збыльысь муніс жель йылө пысалөм паренча вылө, кызди шмонитліс гажа оласнога артиллерист. Но санитар тайёс эз пукты пыдди. Мый босьтан «висьысь-яслысь». Найё өд кага кодьөсь, радейтёны кампужитчыны. Ачыс санитарыс, гашкө, вежон-мөд сайын на вөлі миян кодь жё «висьысьён».

— Эй тэ, «нянька»!— кыліс гажа артиллеристлөн гөлөс:— Яйсө бара ачыл сёйин, а меным сөмын рок? Он весьшөрө, видзөда да, лунысь-лун кыз.

— Дугды,— вомаліс артиллеристөс орччөн куйлысьыс.— Яйсө сөмын өбед дырйи сетывлөны. Мортыс вермас лөгасыны.

— А мем кутшөм мог сэтчөдз?— шыасис артиллерист.— Татшөм «шрапнельыд» оз кылав. «Нянька» оз жё гөгөрво вайны наркомовскөй сё граммсө.

И сэк друг санитар восьтіс вомсө:

— Мөдлаын кутан юны наркомовскөйсө. Завтрак бөрын тія-нөс — былыс тылө.

Гажа лои палаткаын. Кодсюрө весиг вунөдісны сёйөм йылысь. Мем вөлі гөгөрвоана налөн радлуныс: ранитчөм бөрын окопъясысь мынөм йөзлы окота өдьоджык бурдны. А медым бурдны, такөдны ассьыд парсасьөм ловтө, личөдыштны сутуга моз зэвтчөм нервъястө,— колө лөнин. А верман өмөй вөчны та-йёс сэні, көні тэнад юр весьтті быд дас кык минут мысти лэ-бёны «Берталөн» пудъя снарядъяс?

* «Берта» — ылөдз лыйлысь немецкөй орудие.

Санитар ноксьö кос пескөн. Недыр мысти пачын заводитö гажаа трачкөдчыны би. Палаткаын содтöд югыд.

Дрын!

Бара сыркмунисны наръяс, шлопнитис палатка вевт, кодкө быттö нетшыштліс сійöс да лэдзис бөр.

— Вот лешак! Вытöй дзикöдз воши. Көть эськө öдйöджык нин поездö...

— Мыччы, сідзкө, «шрапнельтö» меным,— серöктис артиллерист,— а ме поездсьыс ассьым местаöс тэныд лишöда. Ме кольчча: летучкатö öд век сетöны луннас. Ачыд тöдан...

— Талун воас водзджык,— шыасис санитар.— Пемыднас на. Öдйöджык завтракайтö.

Сійö заводитис кисьтавны чай. Кузь да вöсньыдик ускыс тöкөтö эз кöтась киссьысь чайнас. Чукурöсь да щөть кодь тошка чужöмыс зэв стрöг: зільö, медым ни öти чай войт эз веськав кружкаясысь бокö.

А со и сестра. Сійö муртса эз пөрöд пач дорö лажыньтчöм санитарöс: сэтшöм тэрыба пырис.

— Ставөн сөйинныд? Мыйөн помасяс налёт, кутам грузитчыны. Эн нюжмасьöй. Ті ставныд «кокаöсь», санитаръяс оз ковны?

— Оз. Ставнымöс эвакуируйтанныд?

— Рöд вылас колям жö,— нюмъялö сестра да индö ме вылö:— Со этійöс, зөлöта писö. Видзам сэтчöдз, кытчöдз сылөн ус-тошкыс оз мыччысь. Татшöм зонкасьыд немечыд оз жö повзъы-а...

Палатка стенъяс сырмöны серамысь. Бур, мый абу сэтшöм югыд да оз тöдчы менам гөрдöдöмöй. Окота водзöс мынтыны сестралы, но ог ышты: ме öд тайö армейскöй госпиталяс сöмын на сутки. А сестра, быттö нарошнö, оз и думайт öвсьыны:

— Кыдзи сöмын немечыслөн кыптöма кийс та вылö, зөлöта пи вылас?

Бара ызöбтис серам. Ме лöгысь видзöдлі сестра вылö... и пыр жö воши став скөрлунöй. Сійö вöлі ме кодь кымын жö арлыда. Плащ капюшон увсьыс тыдаліс гөгрөсіник чужöм, код вылын тöдчисны гырысь синъяс. Рöмыдысла сöмын оз вот тыдавыны, кутшöм рöмаöсь. Но ме зэв бура аддзи медся главнöйсö: найö эз серавны ни дэльöдны, быттö вöліны мöд мортлөн.

— Эн скөрмы. Тадзи колö,— небыдика шуис сестра да видліс бинтуйтöм пельпомöс:— Ёнтö? Сөйыштан да — пыр жö операционнöй палатаö. Санитарыс индас.

Мыйөн сестра петис палаткаысь, орччөн куйлысь сосед тувкис меным бокö, бара заводитис дзайгыны, но сідз, медым некод эз кывлы:

— Мый тэд сыысь? Ус ни тош на абу. А меным эськө кутшöма сгöдитчис.

Мыйлакö вöлі зывök видзöдны соседлөн кос тшак кодь чукурöсь чужöм вылö, кöні прамöй быдмöгыс, не кö артавыны некымын кузь сі ныр увсьыс, эз жö вöv. Но ещö на ёна эз воны сьölöм вылö синъясыс. Ичөтикöсь, пыдö вöйöмаöсь, оз видзöдны веськыда, а век кыйкъялöны öтарö-мöдарö, быттö корсьöны мыйкö сöтыштны.

— Тэнад чужöмыд ладенечлөн кодь жö,— бытшки ме.

Кор ме ранитчи, тылö кольöдігөн ёртъяс козьналісны трофейнöй бритва, көть эськө сійö колö вöлі меным сідз жö, кыдзи, шуам, муошлы öчки. Безопаснöй бритва зэв мича чехол пытш-

кын. И кор тайо пöдаркисö казяліс менам вель сусед, воштіс весиг унсö. Быд здуко долис сы йылысь. И öнi со бара.

— Мый нö сэтшöма жалитан?— шöпкöдiс сійö.— Тэ том, омöля на ранитчöмьд. Бара коркö трофейясыдла ветлан. А менö, гашкö, демобилизуйтасны. Воа гортö — и некутшöм трофей. Юр яндзим...

— Коліс гоз-мöдысь атакаö ветлыны,— скöрми ме.— Сэки эськö немецкöй окопö колин кодсöкö: юртö либö яндзимтö. Гөгöрвоин? Чöртыс мед тэнö босьтас! Гөгöрво: пöдарки.

И збыльсь, не кö тайö, гашкö, и сеті бритвасö. Мый мем сыысь? Матыстчис санитар:

— Мöдiм, пиук, операционнöйö.

Ме тайöс некудз нин эг вермы терпитны. Öтитор — сестра, томиник, гашкö, мекöд тшöтшгья ныв, и дзик мöдтор — радöвöй санитар, кодöс сiдз нин нимтöны жель йылын паренчаөн.

Некытчö туйтöм асыв! А луннас ещö мый вермас лоны?

Чечыштi нар вылысь, горöдi гөлөс ортöдз:

— Кутшöм пиук? Тiян водзын гвардияса сержант! Яснö?

Бара ызöбтіс серам. Но санитар зэв збыльсь веськöдiс, кыдзи вермис, ассыс мышкыртчöм мыгöрсö, колснитіс американскöй ботинки коклябöрнас:

— Яснö, гвардияса сержант ёрт!

Бöрынджык чорыда ковмис каитчыны таысь. Оз весьшöрö шуны: «Кывйыд абу пышкай, лэдзин кö, он кут».

Водзылын катласис-восьлаліс санитар. Ме лöгысь видзöдi сылөн ваткыльтöм вылö, пельясöдзыс вöйöм пилотка, сартас кодь вöсныдик кокъяс вылас. Ещö öд салдатөн шусьö!

И сэки жö кажитчис, быттьöкö ветласногыс зэв тöдса. Öд менам бать ветлöдлö дзик жö тадзи, öтарö-мöдарö неуна катласигтыр, быттьö сэки кокныдджык шыблавны водзö пöрысьмыштöм кокъяссö. Окота лои юавны, кымын арöс санитарлы, кытысь сійö, дыр-ö нин тані. Но вермис öмöй вöчны тайöс гвардияса сержант, кодi сöмын на здук-мöд сайын чиршöдліс водзвылын восьлалысь мортсö?!

Чатöртi юрöс. Кобöма. Кыптöм тöv чашйис кымöръяс, вöтліс налысь лестукъяссö рытыввывлань. Шувгис вөр. Пуяс увті муні-гөн лысваыс кötöдiс миянöс.

— Мед кöть эз коб лун шөр гөгöрöдзыс,— шога ышловзис санитар да ме моз жö чатöртчыліс небесалань.— Сэзьмö... Веськыд мат. Енмыс вунöдiс, буракö, миянöс.

— Окота ньöдздыны зэр улас,— дöзмöмөн шуи ме.— Веськавлін мед татшöм сiсь поводдянас передöвöйö...

— Вернö, пиук, гвардияса сержант ёрт. Но öд быдöнлөн, кыдз шуасны, аслас дөрöмыс яй бердас матынджык. Миян тані делöясыс мöд пöлөсöсь. Колö раненöйясöс тылö мöдöдны...

— Зэрыс отсалас али мый?— серöктi ме.

Но санитар сöмын дöзмöмөн öвтыштiс кинас, быттьöкö кöсйис ылöджык вештыштны мешайтчысь синтöм кычипиöс.

* * *

Операционнöй палата — брезентысь вöчöм ыджыд шалаш — дзебсьöма пожöм пуяс улö. Сэні весиг эмöсь ичөтик öшиньяс. Кöрт трубаысь вералöмөн кайö югыд тшын: ваймöдöны пачсö.

Ломтöны сöмын войын. Санитар вошис палатка öдзöс сайö, эг кольччы сыысь и ме. Порог воськовтöм бöрын веськалі ичöтик вежöсö, кöні пукалісны некымын ранитчöм боец.

Пötөлöкас öшалысь нейджыд электрической лампа дышпырысь югдöдiс вежöссö, кöні нинöм эз вöв скамья, юан ва тыра бачок да кружка кындзи. Став «висысьяслөн», тадзи шуöны ранитчöм быд мортöс госпитадын, видзöдласъясыс веськöдчисны ме вылö. Здравыйтчи, пукси тшöтш.

— Кöні кокыштiсны?— юалис орччөн пукалысь.— Перевязка вылö? Виччысьыштны ковмас: аддзан, öчередь.

Ме эг удит вочавидзны: пыдысь петiс санитар, сы бöрся сестра, но эз сийö, кодi волiс миян палаткаö. Тайö вöли стрöг чужöма олöма нывбаба. Косiник кузь тушаа, гырысь кияса. Синкымъясыс еджыдöсь, кызöсь. Нырыс ёсь да кузь. Вом доръясыс вöснийсь, кельыдöсь, сэнi эз тöдчы весиг вир чут. Син гуранъясыс лöзöсь. Сийö видзöдлiс пукалысьяс вылö, чукöстiс:

— Зарубин, ме бöрся!

Пыри пемыд вежöсö. Сийö вöли ёна ыджыджык воддзасыс. Ныртö веськыда косяліс йодоформлөн, эфирлөн да карболкалөн öтсора дук. Шöрас сулалiс клеёнкаөн вевттьöм кузь пызан. Сыкöд пöшти орччөн ещё öти, сöмын ичöтджык. Мыйыс сöмын сэнi эз вöв: клецияс, веськыд и чуля шыранъяс, пилаяс, пуртъяс, весиг стамеска. И ставныс найö кöдзыда лöсталiсны электрической лампалөн югөр улын. Синъясöс эг вермы вештыны на вылысь, öд ставсö тайöс лöсьöдöма меным. Кöнкö вежöрын чужис полöм, кодi пыр чорыджыка и чорыджыка шымыртiс менö, весиг кок кусыньясöй слабитiсны. Усины дум вылö миян палаткаса артиллеристъяслөн кывъясыс: «Докторыдлы мый? Видзöдлас писькöдöм сой вылад, кватитас пила, жик — и, видзöдан да, ловъя сойыд тазйын нин туплясьö. Оз ков ноксынылечитны. Дай налы практика. Öнi öд госпиталяд мöдöдöны ку-тшöмкö студентöс, а ми сийöс докторөн ыдждöдлам...»

Полiгтыр видзöдлi гөгөр. Но некөн вундалöм ки ни кок эз вöв. Сöмын эмалированной тазйын тыдалiсны вирöсь вата лестукъяс.

Морöсын ставыс кутiс гудрасьны, сьölöмөн уси.

— Мыйла менö первой? Сэнi öд öчередь...

— Гвардияса сержантъяслы некутшöм öчередь,— шмонитыштiс еджыд халата да сэтшöм жö шапкаа олöма мужичöй. Ме эг вермы кольны паметьö сылысь чужöмсö, помнита сöмын шоныд видзöдлас, мудзöм нюм да небыд, но ён чуньяс. А сэк костi сестра, кыв ни джын шутöг, вöчис ассыс уджсö: пöрчдöдiс ме вылысь гимнастёрка, заводитiс разявны вирөн йиджтысьöм да косьмöм бинтъяс. Кымын вöсняліс рана весьтсыс бинт слöйыс, сымын лоис сьökыджык меным. А сестралы веськодь. Разьö и разьö. Со нин бинтыс кутiс сибдавны, быд сибадлiгөн ёнтыштö сьölöм. Вежсывны кö сыкöд местаөн, ок зськö ме и кульыштi жö сестра сойысь бинттö! öдвакö эмось этийö кос воблаыслөн нервъясыд, сылысь кöть ки пöвсö со эсийö югъялысь пиланас дзижгы — оз ружöктыв.

Помасис бинт. Со нин колис сöмын тампон. Бергöдчи мöдарö, медем не аддзывны нетшыштöмсö.

И друг... пемдiс син водзын. А кор бөр югдiс, ме водзын сулалiс нин врач. Сийö виддалiс пельпомысь дойсö.

— Вот тадз. Ковмас перйыны кöрт торсö.

Сідзкө, бара мучитчыны. Бинт разьёмсө өдва терпиті, а өні, гашкө, кутасны пеславны лыясөс со эсійө клещинас.

— Оз ков, доктор, мед сэні олас. Кыдз шуасны, казгытылом былө. Сійө ньөти оз мешайт.

— Вот-вот, казгытылом вылад и ковмас перйыны. Нуан гортад, быдөнлы кутан петкөдлыны. Менө тшөтш, гашкө, казгытыштан. Сөмын вот сетны абу наркозсө? Терпитан?

И доктор сюся видзөдліс синъясө.

— Кынтыны киөс ог сет. Некутшөм наркоз оз ков. Төда ме тиянөс: кынтанныд, а сэсся пилаөн — жик!

Доктор гылыда серөктіс, эз вермы кутчысыны нюмъёвтөмысь и сестра. Сөмын ме пукалі йөрш моз щөтёс лэптөмөн.

— Но мый нө, мед лоас тэ ног,— ышловзис доктор.— Сөмын пукав лөня, эн видзөд татчө.

Сэсся дзик мөд гөлөсөн шуис:

— Фиксация.

Пыр жө кодкө чорыда шамыртіс сойөс, мөд морт кутіс мыш-сянь. Здук мысти ставыс эштіс, весиг эг удитлы ойөстны. Доктор вайліс дзик ныр улө пинцетөн топөдөм ичөтик пуля, кодлөн нырыс вөлі неуна нальсьыштөма.

— Тэнад, гвардияса сержант,— нюммуніс доктор,— почётнөй рана — пулевөй. Немецкөй автоматысь. Матын вөлід насянь?

— Орччөн. А абу өмөй быд рана өткодъ?— чуйми ме.

— Быдсямаыс овлө.

Сэки ме эг пыдди пукты тайө кывъяссө. Сёрнитігкоста менө төбисны бинтөн, доймөм киөс көрталісны кынөм бердө да кышө-дісны гимнастёркаөс. Кодкө пельпом былө плавкнитіс шынель. Доктор кисө мыськигмоз шуис:

— Кык сутки чөж куйлыны. Сестра Огнёва, кольөдөй зонсө: сійө заслужитіс тайөс.

Ме и өтнам верми зэв бура мунны. Гусьөникөн чөвтлі видзөд-ласөс менө мучитысь сестра былө. Гашкө, чайтөны, мый зэв нимкодъ меным восьлавны этійө воблаыскөд орччөн? Сэки код-кө инмөдчис дзоньвидза сойө. Бергөдчи. Вөлөмкө, дзик мөд сестра. Буретш сійө, коді асывнас воліс миян палаткаө. Доладыжык лои.

А ывлаыс прамөя нин югдөма. Асыввылын өзйис кыа. Ещө недыр, и петас шонді, заводитас ворсөдчыны пожөм йывъясын, малавны енэжті төвзысь еджыд кымөръяс.

А сынөдыс! Ыркыд, збодер, өвтө пожөм сирөн, бакамач дукөн. Тайө ягас, дерт, тшакыд абу этша. Эмөсь, төдөмысь, и дона гөбъяс, кодъясөс ме радейті өктыны Эжва бердса гулыд ягъясысь.

Кытчө кольөма сійө кадыс? Коркө бара сюрлас оз нин, ко-ми ягъясөй, восьлавны тиян кыз яла вывті, юны ёльясысь сөдз васө, лэптавны комъясөс вөр юысь? Ок и муса жө тэ, чужан муөй! Тэно некод оз вермы вежны, тэ өтнад век дум вылын. Со и өні — восьлала палаткаяс костөд чукалялысь ордымті, а мөвпъясөй ылынөсь, Эжва дорынөсь.

Водзвылын тотшсьөдө кирзөвөй сапөгъяса, шынеля да еджыд көсынkaa ныв. И кор сюсьджыка видзөдлан сы былө, то позьө веськыда шуны: тайө ныв вөснаыс косьмө сьөлөмыс оз өти зонлөн. Позьө өмөй вунөдны этатшөм сөстөм чужөмсө, лөсьыді-ник нырсө, а медсясө нин, этатшөм синъяссө? Öні ме казялі налысь рөмсө: руд нисьө лөзоватөсь, абу зэв ёсьөсь ни абу ра-мөсь. Донъявны кө менам мам ногөн: «Лы пырыс вемыс тыдалө».

А гашкӧ, и ылалі. Дай, веськыда кӧ шуны, мый меным наысь? Эжва бердса ӧти сиктын олӧ ныв, сылӧн синъясыс...

Терпитны вермытӧм дой орӧдіс мӧвпалӧмӧс. Тӧбӧм пельпомӧй заводитіс сотчыны пыр ёнджыка и ёнджыка. Быттьӧкӧ кулисны сӧтысь кучиксӧ да пуктісны горчичник. Ме сувтовкери.

— Прӧйдитас,— кыліс сестралӧн гӧлӧсыс.— Операция дыр-йиыд тэнад нервъясыд вӧліны зэвтчӧм струна кодьӧсь, налы не доймӧмӧдз вӧлі. А ӧні ланьтыштісны. ТерпITYшт.

Мыйла сійӧ кыліс менсьым дойсӧ? Гашкӧ, кельдӧді. Бара серавлыны кутасны. Но палаткаын некод эз вӧв. Тыдалӧ, ставныс нин мунӧмаӧсь санитарнӧй летучка ылӧ. Мурч курччи пиньясӧс, пукси вольпась ылӧ. А ывласянь ныв гӧлӧс:

— Эн гажтӧмтчы! Регыд воас пополнение. Кутас кӧ ёна висьны сойыд, волы перевязочнӧйӧ. Туйсӧ тӧдан...

Ме горша кывзі, но сьӧлӧм шонтысь гӧлӧс воши, сӧмын кылісны тэрыб кок шыяс, а сэсса и найӧ сылісны-разалісны чӧв-лӧняс.

Гижны гортсаяслы письмӧ? Ньюжӧді здоров киӧс вещӧвӧй мешӧклань, но сійӧ эз вӧв местаас. Эз тыдав ни ныр улын, ни ывлаын. Вот лешакыд! Тайӧ суседлӧн киподтуй. Чӧрту трофейнӧй бритваыс! Но сәні вӧліны дона йӧзлӧн фотокарточкаяс, еджыд бумага, коды доныс тані абу. Гашкӧ, летучкаыс эз на мун, гашкӧ, удайтчас аддзыны суседӧс?

Головяшкин

Неыджыд ордым петкӧдіс вӧрысь эрд ылӧ, ёма туй моз ку-тіс чукаявны-мукаявны бадь кустьяс пӧвстті. Сэсса гежаммисны и найӧ. А со и вагонъяс. Найӧс торйӧдіс меысь неыджыд веж кушин, кодӧс серӧдӧмаӧсь уна лыда гӧгрӧс тыяс. Ӧтиясын ваыс гӧрд нюйт рӧма, мӧдъясын синва кодь, кытчӧ видзӧдчӧны шочника тӧвзъысь кымӧръяс.

Сӧмын бӧрынджык гӧгӧрвои, мый тайӧ югыд тыясыс «Берта» снаряжъясысь артмӧм воронкаяс.

Кавшаси неыджыд насыпь ылӧ, матыстчи вагонлань, кодлӧн восьса ӧдзӧс дорын сулалісны некымын раненӧй да сюся дзоргисны небесаӧ.

— Головяшкин эм абу?— юалі ме.

Некод эз вочавидз.

Локті мӧд вагон дорӧ:

— Тіянкӧд оз мун Головяшкин?

Кокас сьӧкыда ранитчӧм боец скӧрысь горӧдіс:

— Регыд ставӧн гӧлӧвняяс лоам!

Кымын матыстчи состав шӧрлань, сымын тӧждысьысьджыкӧсь лоины ранитчӧм салдатъяслӧн чужӧмъясыс, кӧрт тув моз ёся видзӧдісны синъясыс. Ёрччигсор шуасисны:

— Нарошнӧ лун шӧрсӧ виччысьӧны.

— Сэки ӧд лӧсьыдджык лоӧ миянӧс пызйыны...

— Ветламӧй станцияса комендант дорас, сьовсӧ каттям...

— Ёртъяс, спокойнӧ!— горзіс вагонъяс пӧлӧн котӧртысь еджыд халата нывбаба.— Туйыс пӧчинитӧма нин, регыд вӧрзям.

— Головяшкин! Тіянкӧд абу Головяшкин?— горӧді ме да ӧдзӧді воськовъясӧс: состав юрын пошкысь паровозӧдз вӧлі ылын на. Код тӧдас, гашкӧ, сійӧ медводдза вагонас.

И сэки жö менсьым гөлөсөс вевттис уна дас вомысь горөдөм:
— Со найö!

Здук мысти насыпыс тырис вагонъясысь чеччалысь йөзөн. Öтияс кыскисны ас выланыс сьöкыда ранитчөмъясөс, мөдъяс катликтисны асьныс, коймөдъяс кыссисны бауөн, быгыльтчисны насыпъ вывсянь матөджык кустъясланъ, вөрланъ. Вагон өдзөсьяс дорын пияна курөгъяс моз öтарө-мөдарө чепсасисны санитаръяс, сестраяс:

— Ёртъяс, спокойнөя; состав санитарнөй, вылісянь бура ты-далöны гөрд крестъяс...

— Төдам ми найөс, сестра, абу первойысь. Бурджык кувны вөльнөй свет вылас.

И сөмын сэки ме кылі моторъяслысь омлялөмсö. Шонділадорсянь, вөлөм, матыстчöны «юнкерсъяс» да первойсö эз тыдавны. Первойяыс на пиысь усис син улö сөмын сэки, кор юр вежөрö воис бомбалөн сьölөмтö йиөн дорысь шүтөвтөмыс. Öти... Мөд... И пыр жö чеччыштліс муыс, быттьö көсийс тойыштны сы бердö топөдчөм йөзөс небесаын гуляйтысь смертьлы воча. Но тані вөліны опытной йөз. Со мыйла найö топыдджыка ляскысылісны му бердö.

Гырысь калибра немецкөй пулемөтъяслөн увтчөмкөд да бомбаяс потласьөм шыкөд сорлассис «дегтяревлөн» сөстөм гора гөлөсыс. Бөръя вагонлөн тормознөй площадка вывсянь лыйсисны поезд видзысь боецъяс. Дзик эшелон весьтті төвзыштіс «юнкерс», и сэк вагон стенъясысь резыштчисны весьт кузя ёсь чагъяс. «Дегтярев» ланьтіс. Но здук мысти насыпъ боксянь чепөсийсны некимын мыгөр. Тормознөй площадка вылын тыдовтчисны бинтөн төбөм вöснаыс чалмаа кодъ юра матрос да улыс дөрөма салдат. «Дегтярев» бара сетіс асьсыс гөлөссö.

Вöрас пуясыс абу öткодьöсь, а кысь нин йөзүд. Эз быдөн вермыны кутны асьнысö и öні. Шөйөвошөмъяс пиысь öткымынъяс эз кывзысьны ёртъясныслысь, уськөдчисны неылын тыдалысь вөрланъ, чайтісны спаситчыны сэні, но пыр жö веськалісны «юнкерсъясянь» киссьысь свинеч шер улö.

Öти пышйысьöс ме удиті кутны кок пөлөдыс. Сійö шмоткысис-усис, ёрччыштіс, а кор пуляясыс орччөн кутісны окавны мусö, ланьтіс. Но ме аддзи, мый ловъя. Бомбалөн быд выль взрыв дырйи сійö гартыштчыліс öти комокö, а бöрас, кор прөйдитіс пöсь сынөдлөн гыыс, малаліс-виддаліс юрсö, кокъяссö, местаасось-ö найö.

Кор «юнкерсъяс» мунісны, ме сувті да видзөдлі бурджыка орччөн куйлысь вылө. Заводитлі сувтөдны кок йылас. Но сійö эз көйи торйөдчыны муыскөд, сөмын ымзіс да гораа сыркъяліс. Муртса эг горөд шемөсмөмла: корси-корси, а со кысь аддзи! Тайö вөлі Головяшкин, мышкас кык вещөвөй мешөка. Öтиыс — менам.

— Головяшкин, чеччы! — кватиті шошаөдыс.

Палаткаса вөвлөм сусөдлөн мисьтөм чужөм вывсянь видзөдісны төлктөм синъяс, вомсьыс петіс оръясяна киргөм:

— Аддзылі ме ас синмөн: вагон стен пырыс яйыс резсьö... Бомбаыс прөйдитіс вагон пырыс. Господьöй! Мыджсис юрнас шпалас, а сэсса — би...

— Головяшкин! Вай менсьым мешөксö!

— Кутшөм мешөк? О господьöй!

Киөй лудіс чорыда, но терпиті. Сөмын нетшышті асьсым мешөкөс. Головяшкин сьöкыда чеччис, лөгысь вежыньтіс вомсö:

— Тыдалё, тэнад мешок вёсна и накажитіс менё енмыс. Этатшом страк...

Ме съовзи да вешйи.

* * *

Ог нин помнит бура, кыдзи вои полевой госпитальё, асланим палатка дорё. Сэні некод на эз вёв. Тані, гырысь пожомъяс улын, вёлі лонь, весиг эз кыв лыс лапъяслон кышкёмыс, коть найё и вёрисны. Лои мыйлакё обидно: верст джын сайын сёмын на помасис вира драма, а татчос олысьяслы быттё веськодъ.

Но збылысьсё, дерт, эз вёв тадз. Сулаліс ылог човлун: бомба потласём горё велалём пельяс съёкыда на кыйисны пыр кадся оломлысь шыяссё. Пройдитіс ещё неуна кад, и менам вежорёдз вёлисти воис пуяслон шога шувгёмыс. Од и найё эз вермыны веськодя видзодны нёсилкаясон вайом вирсермунём йёз вылё, кодъяслон оти кокыс вёлі нин ылыс тылса госпитальын... И со на пиысь уналы бөр ковмис бергёдчыны палаткаясё, медем пырысь-пыр жё бара водны клеёнкаон вевтём пызан вылё, кытысь откымынъяс, гашкё, оз и кыпёдчывны... Коді мыжа таысь? Коді?

Ме эг нин отчюд веськавлы бомбёжка улё. Но сэні вёлі передовой, и эз сэтшёма шемёсмодды вежортё, эз мучит ловтё.

Бура помнита первойя бомбитём.

Тёлысь кык сайын мяннёс, военно-пулемётной училищеса курсантъясёс, вайисны фронт вылё. Таодз фашистской самолётъясысь силуэтъяссё адзывлім сёмын училищеса стендяс вылысь. И вот передовойё вотодз на мян колонна вылё тодлытёг вувзысисны съод крестъяса кырнышъяс. Бёрыннас мян пиысь унаон интересон видзёдалісны сёмын на артём гырысь воронкаяс, кытчё йиджтысис-сёдзтысис трунда нюйтыс, видлалісны туплясьысь көрт торпыригъяс, кодъяс вёліны на посьёсь.

А кутшом збодера ми видзёдывлім ота-мод вылё, быттё көсйим ошйысьыштны: «Нёти абу страшнё вёлёма». И збылысь, сійё звукас ми нёти эг полёй: вежорёдз эз на во лоомторйыс. Од ми адзылім салдатъяслысь кулалёмсё сёмын кинокартинаяс вылысь.

И вот сэки синным зурасис нёсилка вылё, кодёс нуисны нель курсант. Нёсилкаысь чурвидзис вирёссьём бинтён төбём килутш, корсюрё воліс пельёдз коньёр гөлөс:

— Юыштны... Юны... Вокъяс, юыштны...

И мыйлакё тыра фляга мыччём пыдди ми сёмын шойёвошёмон видзёдім сы вылё.

Мод нёсилка вывсянь видзёдісны гырдем синъяс, а курсантлон зэв тёдса вижөдом чужёмыс дугдывтёг тешкодя нюкрасис. Кадысь кадё сійё овтыштіс кинас да гораа киргис:

— Зонъяс, менам воюйтсис...

И эз позь гөгөрвоны, радліс али каитчис сійё. И ещё шемёсмодіс мяннёс, мый воюйтсис училищеса медбур запевала Ильинлөн, кодлы сёмын на тырис дас өкмыс арёс. Од сійё эз на во-лы весиг передовойёдзыс.

— Сайкав, Зарубин!— кодкё ньөжйөник пуктіс съёкыд кисё пельпом вылё.

Видзөді: мян санитарным пукалё палатка бокин, мекөд орччөн. Дзормыштём кыз синкымъяс увсянь стрөг видзөдлас:

— Вöлн станцияас? Öнi вунöдлы сы йылысь! Водзöссö косöд-ны удитан на. Тадзтö он бурд: чужöмад вирсер абу. Повзи: öт-над гораа сёрнитан... Война вылад, пиукöй, быдтор овлö, торйөн нин сэки, кор тэнад вөрöгыд фашист. Пыр палаткаад, шойччышт...

Лоис яндзим. Кодi эськö менам ёртъяс пиысь кужис мöв-пыштны, мый гвардияса сержант Юра Зарубин вермас пörны ветьöкö?

Бара аддзысисны

Палаткаын мекöд öтилаян олісны выль йöз нин.

Öтияс на пиысь лöсьöдчисны ылыс тылса госпитальясö, мöдъ-яс ме моз жö лечитчисны танi, медым регыдджык бөр веськавны асланыс частьясö. Найö дугдывтöг висьтавлісны, кыдзи да кöнi ранитчöмаось, кутшöм бойясö петавлöмаось. Вöли гөгөрвоана, мый тайö йöзыс сэтшöм частьясысьсöсь, кодъяс вөлöмаось миян-кöд орччөн августовскöй наступлениеын. Вöли гөгөрвоана и сійö, мый миян фронтлөн водзö мунöмыс лаймалöма-кусöма да весиг торъя частьясöс вөрöг кытшалöма.

— Эзджык тырмы вынным,— гаралис олöма салдат.— Кылö нин вöли Ленинградскöй фронтлөн шыыс. Ещö кö эськö неуна и...

— Зато сталинградсаяслы отсалім,— дорйыштчис ёсь гөлöса сержант.— Кымын дивизия сійö татчö вайис сэтысь! Не кö тайö выль выныс, эськö дзик öтлаасим Ленинградскöй фронтыдкöд да.

— Коркö, гашкö, Сталинград дорйысьяс казътыштасны мия-нös бур кылөн...

А палатка мöд пельöсын висьтавлісны салдатскöй анекдотъяс:

— ...Скöрысла докторыд ку пиас оз төр. Кодi пö оз во пере-дöвöйысь, сійö пö и киас либö кокас ранитчöма... А öти салдат сылы и вочавидзö: «Менö, военврач ёрт, ордйöдiс зон — киня-улас орöм юрсö топöдöма. Эз шыödчыв тiян дiнö?»

— Тайötö мый, вот миян старшина...

Но мый налөн старшинаныс вöчöма, ме эг кöсйы кывзыны, петi Бойцовкöд гуляйтыштны. Бойцов — мекöд тшötшъя салдат, кыськö Ярославскöй областъысь. Ранитчöма киас жö. Ми ськöд пыр и тöдмасим: том йöзтö тай пырджык кыскö öта-мöд дiнас.

Бойцов — неыджыд тушаа, зумыд тэчаса зон. Пöшти на бы-гавтöм турунвиж пилотка увсьыс чурвидзö зу кодъ чорыд да смоль сьöд юрси. Синъясыс тэрыбöсь, сьöдöсь жö. И чужöмыс мугов. Чиган пи дай ставыс. Сöмын нырыс ярославскöй — чангыля, кöть шынельтö öшöд.

Бойцов — гажа оласнога, варов зон. Веськыда висьтала: сы-лысь рöдвужсö, керка пытшкöссö, весиг сьölöм косътысьсö ме тöдмалі кымынкö рытөн. А медся интереснöя сійö висьтавліс аслас воюйтöм йылысь:

— Мыйөн воис миян маршевöй ротаным фронт вылö, взвод-нöй меным шуö: «Красноармеец Бойцов, лоан менам ординаре-цön. Тöдан, мый сійö лоö?»

А ме сылы: «Лейтенант ёрт, Петька тожö вöли Чапаевлөн ординарецön». «Вот-вот,— шуö,— сэтшöмөн и лоан». Недыр мысти пемдiс. Немечъяс орччөнöсь. Взводнöй шуö, колö пö видз-чысьны. А ме и сiдзи видзчыся. Пукала ляпкыдик гуранторйын ськöд орччөн, а мыйөн немечладорсянь кутасны лэбны би кинь

кодъ пуляяс, пыр и лажгӧдча, весиг взводнӧйлы окопас местаыс оз коль. Войнас, кыла, вайисны походнӧй кухня. Взводнӧй шуӧ: «Ветлы супла!» Мый вӧчан, ординарецлы быть тӧждысь командир вӧснаыд, кӧть эськӧ окопсыд петныд и абу зэв окота да. Босьтӧ кык котелок, кыпӧдчи бруствер вылӧ... Кыдзи тай швачкысис орччӧн мина... Сэсся мӧд... Ог помнит, кыдзи веськалі бӧр окопӧ. Неуна сайкалі, кыла: кодкӧ ме улын вӧрӧшитчӧ. Сэсся тай кыдзи равӧстас взводнӧй: «Он аддзы али мый? ӧдва сьылі-дзирйӧс эн бергӧд». А ме сылы: «Сы вылӧ и ординарец, лейтенант ёрт, медым ас тушанас командирӧс смертьысь видзны». Серӧктис сӧмын, но супыдла бара ыстис. Кӧсий босьтны пӧртгъяс, а ӧти кийӧ оз нин уджав: мина торйыс веськалӧма. Кодӧ бара менам взводнӧйлы ӧнӧ ординарецаӧ-а?

Частӧ корлісны Бойцовӧс висътавны аслас воюйтӧм йылысь. И палаткаын быд пӧрйӧ сералісны кынӧм висъмытӧдзис. А Бойцовлы тайӧ воліс сьӧлӧм вылас.

Вӧлі сентябрь шӧр. Зэръяс бӧрын сувтіс мича поводдя. Буретш вотчан кад. Лӧсьыд татшӧм каднас вӧрын, торйӧн нин расъясын. Видзӧдан коръя пуяс вылӧ и кутшӧм сӧмын рӧм он аддзыв. Зарни ар.

Ми восьлалім ордым кузя неыджыд юлань, кытысь Бойцов кӧсйис кыйны комъясӧс. Сійӧ удитӧма нин судзӧдны вугыр. А сунисыд ӧд быд салдатлӧн пилоткаас.

— Ок и юква лоас!— нимкодясис Бойцов.— А то пыр рок. Локтігӧн тшак ватыштам и. Жаритам. Кывтӧ нбылыштан.

— А сӧ грамм йывсыс вунӧдін? Пыр и тыдалӧ — тӧрытъя колхозник...

— Босьтӧй тшӧтш!— шыасис миянлы воча чотликасьысь морт.— Ме вуграсьнытӧ кужа жӧ.

— Воанныд кӧ йир дорӧдзис,— вочавидзис Бойцов.— Сійӧ ӧд госпитальнӧй пывсян сайын на.

— Менам вӧлӧй ён,— петкӧдліс ассьыс сера бедсӧ тӧдтӧм раненӧй.— Сы отсӧгӧн луннас станцияӧдз куим рейс вӧчла.

Паныдасьысь морт вӧлі лётчик формаа. Петлицаясас нель треугольник. Но тасмаыс командирскӧй, портупея. Лӧсталысь хромӧвӧй сапӧгъяса. Та вӧсна сылӧн вӧсныдык, но винӧв тушаныс кажитчис ещӧ нин лададжыкӧн, синмӧ шыбитчанаӧн. Пемыдлӧз пилоткасӧ лэдзӧма пӧшти веськыд пель йылас, тыдӧдӧма шуйгаладорсьыс чав еджыд юрсисӧ. Синъясыс быттӧ турунвиж рӧмаӧсь, вежӧраӧсь, но корсюрӧ наянӧсь. Кысь ме аддзылі тайӧ синъяссӧ? И гӧрба нырыс тӧдса.

— Гена? Тэ?

— Эк, воканӧй!— уськӧдчис мелань лётчик старшина...— Чайті, мый вунӧдӧмыд нин.

Ми вель дыр сулалім шы ни тӧв. Гена сӧмын паськыда нюмъяліс, и тайӧ нюмыс шонтис менсьым морӧсӧс, вӧрзӧдіс сьӧлӧмӧс. Абу вежсьӧма, век на важкодъыс. Но мыйла юрсиыс татшӧм? Дзик еджыд? Краситӧма али мый?

Бойцов восьлаліс водзын. Ми вӧтчим сы бӧрся. Гена ордым кузя, ме сыкӧд орччӧн. Гена тувччаліс бедъ вылас чорыда мыджсьӧмӧн, медым вештыштны тушаыслысь сьӧктасӧ ранитчӧм шуйга кок вывсьыс. Дугдывтӧг юасис менсьым чужан сикт йылысь, тӧдсаяс йылысь, батыс йылысь, Сыктывкар йылысь. Ме гусьӧник видзӧдывлі сылӧн юрси вылӧ да сьӧлӧм топавмӧн виччыси,

юалас оз Валя йылысь. Но Гена, тыдалё, вунёдома тайё нимсё, ньётчыд эз гарышты. Гашкё, аслым заводитны? Абу лёсьыд. Колёкё, на костті котёртіс съод кань, од гортись мунём бёрын колис нин во джын.

А со и ю, сійё писькёдчө гырысь бадь кустьяс да ловпуяс костёд, ворсёдчигмоз нуё налысь уна рёма коръяссё. Ваыс сёдз. Визувинас тыдалёны нюйтён эжсьыштём колодаяс, изъяс. Кор видзёдан, ваыс кажитчө гёрдоватён, а гумовтан соддзад — кёдзыд эзысьён исковтё чуньяс косттіыд.

Ю сайын видзяс. Найё коркё, дерт, гажаа шыавлёмаёсь. А ёні оз тыдав некён покос туй. Пёрысьмём кузь туруныс ляскысьома му бердё. Сёмын кёнсюрё тыдалёны арся дзоридзяс да васё-дінъясын вежодё толич-эжёр. Нора сулалысь воймём да нёрла-сьом зорёд пиньяс казытылёны, мый коркё тан пуктысьлёмаёсь жё.

— Ок-ок-ок!— ышловзис вуграсьысь Бойцов.— Гажтёмтчө виддзыс, бёрдё кыз синваён... Но од кёзяиныс абу мыжа...

Бойцовлён съод синъясас тёдчис съёлөмтё чепольтысь шог. Тыдалё, мөвпъясыс сылён вёліны ылынось — лэбалісны чужан сиктса видзяс да ыбъяс весьтын.

— Тані неылын эм сикт,— быттё аслыс висьталіс сійё.— Йёзыс сэні зэв этша кольома. Эвакуируйтчылёмаёсь. Быть: немеч Тихвинёдз воліс. Но и бёрсё абу на ставыс чукёрмёмаёсь. Сёр-ниті ёти пёлькёд. Гёститёдіс менё сакарной свеклён. Дивё, гөгөр вёр да нюр, а сакарной свеклё быдмё... Ме чайтлі, мый вёдитёны сійёс сёмын Украинаын. Быдтор жё чужё да быдмё миян мати-му вылын! Сы вёсна и горшасьёны сы вылё. А горш мор-тыд век виньдывлё. Тадз жё и пёльыд меным шуис: помнитлы пё, пиук, ковмас и Гитлерыдлы бёр усйысьны Наполеонлы моз. Ме и чутки пёльёлы: «А он полёй? Колёкё, бара ковмас усйысьны тась: немечыд орчча». А пёльыд скормис быдён: «Воис немечыд Волга дорёдз, а ми сійёс Синявиноса нюръясын нёшалім. Сідзкё, эм на миян вынным. А тэ ещө шуан мыйкё!» Ок и видіс жё менё! Но век жё синва петмён жаль: мыйта добра весь-шөрө вошө-прёпадайтё...

А коді мыжа таысь?

Бойцов чөв усис да неуна руассём синъяснас кутіс видзёдны таб вылё. И лоис кызкё зэв нелосьыд съёлөм выланым, кётъ эськё небесаянь дзоргис шонді да гөгөр шыалісны лэбачьяс.

Эз дэбёд. Бойцов чөвтліс вугырсьё ётилаё, мёдлаё, ветліс орчча йирёдз, но чери некён эз видды.

— Старшина ёрт!— шыасис друг Бойцов Гена дінё.— Позьё юавны ётитор?

— Мый?

— Помнитанныд, вёвлі войнаёдзыс миян кинофильм? Уськёд-чисны сэн миян вылё фашистъяс. А ми тай кызз нырыштім найёс! И танкъяс, и самолётъяс — мыйыс сёмын миян абу. И ёти боец эз усь весиг миян...

— Сійё фантазия...

— Фантазия?— скормис Бойцов.— Мыйла йёзсё ылёдлыны? Ёні со ставыс мёдарё. Фашистскёй лётчик юртё оз лэдз кыпёд-ны, а миян ни ёти самолёт. И танкъяс оз тыдавын. Ёбиднё.

Гена зілис кежодны сёрнисё мёдарё, та могысь юаліс яро-славльса зонлысь, кутшөмджык участкин воюйтіс, но мёдыс, тыдалё, дзикёдз дёзмис:

— Участок! Кутшöмкö тай нюрын келалім-а, нырөн трундасö гöрим. Ме эськö, гашкö, эг на мун сэтись, да лейтенант ыстис. Пöсьвывьсыд пö оз доймы, а бöрынджык пö пöгибö воан. Но и муні. Чайті, сэтшöм пöрадокыс. А вöлөмкö, позьö и доймöм йöзлы тышкасьны...

— Эз öмöй висьтавлыны та йылысь запаснöй полкад?— чуй-мис Гена.

— Сэні тöлысьсö эг олöй. Сöмын öтчыд нуöдлісны стрельбище былö, а граната весиг киö эз сетлыны...

— Бойцов, тэысь лоö бур боец,— стрöга шуис Гена.— Кыдзи тэнö шуöны?

— Алексей.

— Алексей, ёнасö эн шыблась кывъяснад: кадыс абу сэтшöм. Гөгöрвоан?

— Дерт.

— А коді мыжа ставсьыс, тöдмалам роксö панялöм бöрын. Интереснö, мыйла тэнö та дырасö армияс эз босьтны? Тэ öд миянкöд тшöтшъя.

— Бронь. Бригадиралі колхозын. А сэсся вöзйыси: ветла, мися, да тöдмала, мыйла лэдзисны фашистöс Волга дорöдз, лöсьöда пöрадок, а то и миян сиктöдз воас. Ок-ок-ок... Кыдзи бара öні сэні метöг олöны-а?

Гена паськыда нюмдіс. Бойцов сюся видзöдліс старшина былö, юаліс:

— Тешкодь. Синкымъясыд тиян сьöдöсь, а юрсиныд еджыд...

Гена эз вочавидз, чатöртчис небесалань.

Здук мысти пельбөдз воис моторъяслөн шы, а сэсся тыдовтчисны и самолётъяс... Муніс воздушнöй бой. Сунласиг да гөгралігтыр, миянлань локтісны куим самолёт. Но эз на позь гөгöрвоны, кодъяс миян, а кодъяс налөн.

— «Харрикейнöс»* кокалöны кык «мессер»,— дрöжжитан гөлөсөн медводз шыасис Гена.— Ак, стервояс!

Öні бура нин тыдалісны куимнан самолётыс, небесаын быттö косявлісны дöра — кыліс пулемётъясысь лыйсьöм шы, тыдалісны трассирующöй пуляяслөн туйясыс. Кык «мессершмитт» чишъялісны сьöкыда лэбалысь «харрикейн» гөгöр, кокалісны сійöс быд боксянь.

И мыйла сійö оз усь? Öд «харрикейныс», дерт нин, лоис пож кодь.

Бойцовлөн калькнитöм вома чужöм вывтіыс визувтіс пöсь, быттöкö сійö ачыс пукаліс «харрикейн» кабинаын, а Гена весиг вунöдіс ранитчöм кок йывсьыс, сулаліс бедь вылас мыджсьытöг, сöмын корсюрö пыркмунлісны сылөн пельпомъясыс.

— Пилотыс опытнöй,— шуаліс Гена,— а то эськö важөн нин «мессеръяслы» вöчныс вöлі нинöм. Вокö, кутчысь! Öтиыс бöрсяньыд матыстчö...

«Харрикейнын» пукалысь лётчик быттöкö кыліс тайöс, крута шыбитіс самолётсö бокö, «мессершмитт» живкнитіс сы дінті, а сэсся, öтарö-мöдарö тешкодья шыбласигтыр, бергöдчис рытиввывлань да неокотапырысь кутіс лэччыны пыр увлань и увлань.

* *Английскöй истребитель. Найöс вайлісны Отечественнöй войналөн первой воясö Англиясысь. Тайö машинаыс вöліны ёна ньöжмыдджыкöсь да укшальöсь «мессершмиттъяс» серти.*

— Молодеч, воканё,— горзіс Гена.— Ётик эм! Видзчысь мёдсысь!..

Но ёні, тыдалё, лётчик эз кыв муыввса корректировщиклысь кывъяссё, эз удит вёчны некутшом манёвр, и мёд «мессершмит-тыс» пёшти дінсянныс лыйліс сійёс. Гёрд звездаа машина быттё шойёвошлі, сэсся веськёдчис мулань, лёк ног омлялысь моторысь тыдовтчис тшын, сэсся би... И сэк жё самолётысь торъяліс не-ыджыд ёкмыль.

— Ловъя!— горёдіс Гена.— Эк, воканё, чечышт затяжнёйон, а то кокалас...

«Мессершмитт» и збыльысь энотіс ыпъялысь «харрикейнёс» да уськёдчис лётчик бёрся, коді из моз усис мулань. Недыр мысти восьтом парашют саяліс вёр сайё.

— Оз вермы лоны, медым тайё сёкёлыс пёгибнитіс,— кыв-кёрталіс Гена.— Ас. «Харрикейн» вылын кык «мессерлы» воча.

— Да ещё ётисё уськёдіс,— радпырысь содтіс Бойцов.

— Фашист вермас на и вуджны фронт вомён. Став сертиыс тёдчё, мый сійё сёкыда ранитчис,— веськёдіс Гена.— Ветлам. Юыслён эсіё чукыль саяс усис лётчыкыс...

Медводзын котёрон-сорён муніс Бойцов. Ми восьлалім Гена-кёд орччён, кыв ни джын шутёг. Со Бойцов воис ю чукыльё, сувтовкерис, сэсся кутіс өвтчыны кинас.

Ю чукыльё воём бёрын, сэтысь, көні сулаліс госпитальён пывсяныс, аддзим йёз чукёр.

Ме некор на эг адзыв асёс. Дерт, көнкё, тайё лётчыкыс ёбликнас Чкалов либё Бабушкин кодь ён, ыджыд тушаа, дзормыны заводітём юрсиа, морёс тырыс орденъяс. А кутшёма петіс менам дивёй, кор йёз кытшті писькёдчём бёрын аддзи парашют куполлён шёвк вылын куйлысь комбинезона том мортёс. Русов юрси пратьясыс кольчаясён лясёмаёсь гожъявтёмысла еджыд плешкас, ныр улас ёдва тёдчыштё ус модаа гён, неуна лёзёдыштём синлапъясыс пёдсаёсь.

Йёз сулалісны чёв, эз вештывны синъяссё зонлён быгыд чужом вылысь, мёвпнас тэрмёдлісны пидзёсчанён ноксысь врачёс, сестраёс, кодъяс удітёмаёсь нин воны госпитальысь.

— Куим рана,— быттё аслыс моз шуис врач.— И ставыс зэв серьёзнойёсь. Дивё, кыдзи вермис шыбитчыны кабинасыс...

— И дзик му бердас восьтыны парашют,— содтіс Гена.

Лётчиклён синлапъясыс друг воссисны. Первойсё артмисны неыджыд потасъяс, кытысь тыдовтчисны чусыда югъялысь син аканьяс, сэсся миян вылё видзёдлісны дзик чёдлач кодь раминик синъяс.

Кыліс чукёрон ышловзём.

Лётчик зіліс мыйкё висътавны, но гөлёсыс вёлі сэтшём лонь, мый сестралы ковмис копыртчыны сы вом весьтё.

— Мый висъталіс?— терпитны вермытёг юаліс Гена.

— Колё пё юёртны частё, мый ставыс пёрадокын.

Да. Тані вёлі кутшёмкё тайна, кодёс том лётчик поліс нуны аскёдыс, но и эз көйы висътавны миянлы.

— А-а... мать твою!— друг горёдіс лётчик да кутіс пессыны, чужомыс ещё на кельдёдіс, шармунём синъясыс лёкысь кодзла-лісны.— Колька, веськыдладорад «мессер»... Колька, кылан, «мессер»... Сёт, Колька, сёт! Ой, мамё!..

Врач индіс госпитальлань. Здук мысти лигышмунём лётчикёс санитаръяс видзчысьёмон нуисны нин нёсилка вылын.

Пывсыны очередь виччысьсы раненёйяс вель дыр пукалісьны шемёс.

— Татшомъясыды кё доверитан техникатё, регыд нинөмтөг колям,— кыліс кодлөнкё дзуртан гөлөс. Ме видзөдлі гөгөр, и пыр жё усис син улө кос тшак моз вежыньмунөм чужома менам вөвлөм суседёй, Головяшкин. Көсийи нин вомавны сійөс, но орөдіс Гена:

— А Уралыс мый вылө? Тэ, дядя, чайтан, мый тэ сөмын воюйтан? Тылсаяслы ёнджыка вичмө: прамоя сөйтөг ни узытөг мырсьёны.

— Вернө,— шыасис гырысь сьод усьяса да бинтөн төбөм юра олөма боец,— мем гортысь письмө воис... Сьөкыд өні... Сэні и тані. Техникаыд оз тырмы и. Морякъясөс пехотаө ыстёны. Миянкөд орччөн воюйтис бригада, ставныс морякъяс.

— Ме пехотаын жё ранитчи,— шыасис Гена.— А коркө эті йө зонмыс моз жё лэбавлі...

— И сы моз жё гылавлі?— бара дзуртыштис Головяшкин.— Мамтө чуксавлі... Воякаяс!

Мыйла колө вөлі висътавны тадзисө? Гашкө, Головяшкин көсийс шмонитыштны том салдатъяс вылын, чайтис, мый тані унджыкыс олөма йөз да лооны сы дор жө. Но өд лөсявтөминад шуөм кывйыд дойдө орсысь на ёна. Сідзи и лоис. Геналөн быгаліс чужомыс, сійө кыпөдіс бедьсө:

— А тэ, сволочь, лэбавлі «харрикейн» вылас?

Ме куті Генаөс, но сійө мынтөдчис да өжгис бедьнас Головяшкины.

— Эн тышкась!— чирөстіс мөдыс.— Он лысьт, көть и старшина! Фронт вылад небось «мамө» на горзін...

Ме көсийи нин уськөдчыны Головяшкин вылө, но менө пановтіс бинтуйтөм юра сьод усьяса олөма салдат:

— А тэ аддзылін, кыдзи Мга дорын «мамө» горзсысьяс ветлісны атакаө? Эн?..

Тайө кывъяс бөрас менам вөвлөм суседёй тутіс муас. А олөма боец бергөдчис йөзлань, чышкыштис веськыд кисө гимнастёрка бөждорас, копыртчыліс:

— Прөститөй, ёртъяс! Судитөй, коді тані мыжа...

— Эз-ө нин кув трофейникыд,— серөктіс Бойцов да уськөдчис век на мыр бокын куйлысь дінө.— Но-о... видзөдтө, мешөкыс потөма.

Головяшкин звирк сувтіс кок йылас. Тайө и вузаліс сійөс. Ёсь мырйө крукасьлөм бөрын орөм мешөксьыс сывкмуніны часіяс, компасъяс, бритвеннөй приборъяс, карті колодаяс.

Тані вөліны и немецкөй штамповкаяс, и Кировскөй заводлөн, и «Павел Буре» маркаа часіяс. Но медся нин зывөкөн вөліны веж турун вылын туплясьыс трофейнөй пеж открыткаяс да карточкаяс.

Головяшкин сулаліс кулөм нисьө ловъя. Төдчис, кыдзи вочасөн вижөдө чужомыс, ёсьмө нырыс.

— Со вөлөм мыйла оз торйөдчыв мешөкыскөд!

— Мародёр!

— Кодлы война, а кодлы...

Раненёйяс, колөкө, и косявлісны Головяшкинөс, но дорйис бара жө сьод уска боецыс:

— Менө прөститід? Прөститөй и сійөс! Видзөдлам, мый шуас трибунал.

— Кысь сылы та мында часыс? Ме лыдди — кызь гөгөр,— шензис Бойцов.— И мый шуас сылы, старшина ёрт, трибуналыс?

— А шуас со мый: на тэныд өкмыс грамм дай ло сэтшөмөн жö, кодъяс мешöкысь босыталін тайö добрасö,— вочавидзис Гена.

Абу öд быдөн öткодь

Полевöй госпитальса йöз пöшти эз вешйивны палатка дорысь, кöнi вöлис операционнöй. Но немтор эз отсав,— том лётчик-истребитель кулис, кызз шуасны, хирурглөн пурт улын. Сийö жö лунас Головяшкинöс судитис трибунал. И медся лöсвятöмөн кажитчис сийö, мый найö вöлöмаöсь землякъяс — кыкнанныс Вологодскöй областысь, лётчик Жуков — Усть-Ужнаысь, Головяшкин — Грязовецыйсь.

Салдат унаысь аддзывлö кулöмтö, сы вылö сийö и воин. Но тайö кык пöлöс смертыс веськыда пузувтисны ловсö госпитальса быд олысьлысь.

— Абу весышöрö шулöмаöсь миян пöльяс: вöрын и пуяс абу öткодьöсь,— такöдис миянöс палаткаса санитар, кодöс, вöлöмкö, ыдждöдлöны Кузьмичөн.

— Ветлöдлисны öти земля-мати вывтi, лолалисны öти сынöдөн. И на тэныд. Öтиыс ассыс том сылöмсö сетис народнöй делö вöсна, сувтис кувлытöмъяс радö. Святöй морт. А мöдыс? Порсыд няйттö век нин аддзас. Куйлы лёк пон моз пемыд гуын — вевттьöд ни тупйöд, некодсянь некор бур кыв, рöдняыд весиг öткажитчас...

— Кузьмич, а мыйла Головяшкиныс сэки эз эвакуируйтчы?— юалi ме.

— Коли пö эшелонсыс. Комиссар водзын нидзув моз кысьясис, но и прöститисны. Öнiя йöз кöть и стрöгöсь да льöгöсердöсь, а оз тай со век удайтчыв ваö моз видзöдлынытö. Менö, пöрысь понйöс, тшöтш ылöдлис.

Кузьмич ланьтис. Сылөн чужöмыс кажитчис ещö нин пöрысь-джыкөн. Эз веськодя вермы видзöдны и сийö госпитальын бөръя лоöмтор вылас.

Вöли шойччан час, öбед бөр. Кузьмич, Бойцов да ме пукалим пывсянсянь неылын тшынөн ломалысь неыджыд бипур дорын, код весьтын öшалис пöрт. Сэни пусис тшак, кодöс ми Бойцовкöд чукöртiм орчча веретя вылысь.

— Вөр-ваас сы мында озырлун, а пöльзуйтчыны некоды,— ышловзис, калянсö öгырөн öзтиг, Кузьмич.— Сёйöй-юй, öзьян синъясöй, менам пьянöй, чöсмасьöй öти кока порсь яйөн. Регыд öд ковмас торйöдчыны. Тi мунанныд, а ме... Тöрыт Семёнович (госпитальса главнöй врач) сiдз и тадз видлалис менö: öтлаын пö нин ковмас тэа-меалы война кустöдзыс служитны. Позьö, дерт, и пышйыны, да ог тöд, көнöсь миян сапёръясным. Тыдалö, фронтлөн мöд участокö вуджöдöмаöсь. А веськалан кутшöмкö стрöг командир дорö — янöдас да бөр мöдöдас. А сэсся öд танi кодлыкö уджавнысö колö жö: том йöзöс он сувтöд.

— Госпитальсыс öмöй пышъялöны жö?— чуймис Бойцов.

— А тэныд, боец Бойцов,— стрöга шуис Кузьмич,— кымынь индылöма: эн лукйысь. Лудö — сiдзкö, бурдö.

Йöзасьöм Бойцов нетшыштис здоровöй кисö бинт увсыс, нурбыльтис:

— Видлы тэ терпитны! Бытьё сё той.

— А пышйылёны и татысь,— водзё нуёдіс помавтём мовпсё Кузьмич.— Неважён на ёти старшина вурыштис, а ранаясыс сёзасьтёмось на вёліны. Тёрыт сысянь воис письмё: воюйта пё важ ёртъяскөд ётлаын. Эмось и сэтшёмъяс, кодъяс мунёны төлкөн-ладён, но мырдён вёзйысьёны. Ёні со сестраныд тйан, Огнева, инас оз ёшйы — вёзйысьё жё передёвёйё. Комиссарёс пёгибё воштис. Кок шонтысьыс Надяыслён сэні али мый?

— Ми нё тані либё мыйла бовъялам?— скёрмис Бойцов.— Нывъяс и то...

— Бур вёвлён доныс оз усь...— меліа видзёдліс сы вылё Кузьмич.— Тйан, боец Бойцов, гвардияса сержант ёрткөд ранаясыд абу прёстойёсь, пуляыс лыастё тшётш горснитёма... Лечитчыны ковмас, вын-эбёс чукёртны. А передёвёйыд тйанысь оз на пышйы.

Кывсё паръяс костас топёдёмён Бойцов босьталіс булькйысь пёртыысь шактарсё. Паньыс сьлён — быдёнлён вежыс петас. Алюминийысь вёчёма, паськыд лопта, колскан кё ёшлы плешкас, и то сюр каяс. Татшём жё пань сійё козьналіс меным. Визув олас-нога, ичотсяныыс быдтор вёчны велалём тайё зонмыс эз вермы овны весь. Менё тшётш новлөдліс муяс вывті, гёститөдіс пёжалём картофелён, сахарной свеклоысь да турипувйысь пуём рокөн.

А кор ми ветлім усьём «харрикейн» дорё, сэсь Бойцов чукёр-тіс быд ногыс пергылясьём алюминий торъяс.

— Мыйла?— юалі ме.

— Аддзан регыд,— нюммуніс сійё.

А рытнас Бойцов козьналіс меным пань. Вёлёмкё, инас ёш-йывтём мортыд лёсьбөдёма госпиталь пывсян дорё лу* да вёчалё паньяссё сывдём алюминийысь.

Миян да орчча палаткаясса раненёйяс зэв пыдди пуктісны сылысь козинъяссё. Но ёні фабрикаыс сьлён сулаліс: эз вёв сырьё. И Бойцов ас кежас, төдөмысь, кевмис, мед уськөдісны ёщё ёти самолёт, сёмын, дерт, эз миянлысь, а фашистъяслысь. Сэки эськё став госпитальыс пондіс сёйны сьлён паньясён. И сёмын ёти мортлы эз ло сьёлём сертиыс сьлён козиныс.

Медбөръяён вёчём паньсё Бойцов вёзйис менам землякы — старшина Юранёвлы. Гена виддаліс сійёс гөгөрбок, весиг завод-итліс суйны вомас, сэсся найна видзёдліс мастерлён радысла ыргён таз моз лөсталысь чужём вылё да шуис:

— И татшём добрасё вёчин тэ, ки пёла инвалид?

Бойцов эз гөгөрво, ошкё али сералё сійёс старшина, но сьёлөмыс мортыдлён топавлыштис:

— Мем отсасисны банщикъяс...

— А-а... Но вот мый, тані эмось танкистъяс, налы и сет. Лётчиклы татшём груз босьтны сьёрсьыс оз позь: самолётыс оз вермы кыпөдчыны мусьыс. А танкистъяслы сгөдитчас кувалда пыдди.

Та бёрын миян мастер эз на матыстчыв Гена дінё.

— Коз пуувса яй пусис!— гораа серөктіс ёні Бойцов да босьтіс пёртсё мөтыр йылысь. Ёвтыштис сэтшём чөскыд көрөн, мый өдва верми кутны дульваёс. Да мый и дзебнысё: миянлы, том йёзлы, эз вёв тырмымён госпитальса паёкыд. Та вёсна жё и жөвьявлывлім ми Бойцовкөд муяс вывті.

* Лу — лыа ящикё вёчём форма, кытчө кисьтёны металлсё сывдём бөрас.

Терпитны вермытөг видзөдiм Кузьмич вылө, кодi кыскис гач зепсыс рузумөн гартыштөм нянь тор. Гожъялөмысла сьөд, бадь кырсь рөма кыз чуныснас сийө видзчысьөмөн юкис нянь торсө куим пельө. Сэсся перйис обмотки увсьыс Бойцовлысь бур козинсө.

— Добра!— сорвасө паньыштөм бөрын нюлыштiс вом дорьяссө да ошкис Кузьмич.

— Обмоткиыс?— быттьө эз гөгөрво, юалис серам пыр Бойцов.

— А мый көть и обмоткиыс?— дөзмис Кузьмич.— Гражданскöй дырйи ветлiм нинкөмөн. Обмоткиа ботинкиыд сэки, пиукöй, вöли веж петкөдланторйөн...

— Шуан жö!— эз öвсьы Бойцов.— Видлы асывнас ки пöвнад гартны. Тьфу! А тревога кө? Юралы лөсьыд; шурснитас сапөгтö — и ставыс. Сы ыжда страна, а салдатлы сапөг оз вермыны сетны.

— Ныр увсьыд тöд!— вомалис сийөс Кузьмич.— Көсьян гвардиякөд рөдвужасьны. Гвардияса сержант ёрт — юнкер, öнiя ног курсант. Сылөн со и петлицаясыс зарни кантьясаөсь...

Ме, дерт, гөгөрвои, мыйын делöйс. Санитар косөдiс «водзөс». И öнi меным лои яндзим Кузьмич вылын неважөн ыджыдалөмысь.

— Разь обмоткиастö, — шуи Бойцовлы да нетшыштi кокъясь еджыд дөра кодьөдз вушйөм гөленьяса кирза сапөггьясөс.— На, новлы!

Коньөр Бойцовлөн паньыс кысьыс муртса эз усь, тшак ваыс киссис гимнастёрка морөс вылас.

«Эк тэ, Алёшка, Алёшка, сөстөм лов!»— окота вöли горөдны сылы, но кутчыси.

— Төв воас да кватитчан, Алексей,— гарыштiс Кузьмич.— Видлы сапөгнад кыссыны, тырыс лым пырас. А öнi? Вескалан нюрö, нойтсö тырыс жö гумовтан. А көтасьөм кока салдатыд, ачыд төдан, абу нин боец. Обмоткинад жö майбыр: кокыд век кос да кокныдджык. Сöмын тi, гвардияса сержант ёрт, бөр сапөгасьöй.

Сэки ме мөвпыштi, мый Кузьмич, буракö, төдö нин курсантъяслөн бойö ветлөм йылысь. Мирыдлысь öд вомсö он тупкы. Весиг сөйны эз кут ковны, небыд шондiа луныс кутiс кажитчыны сьөдөн.

— Кузьмич, водзö кежлө вунөдöй менсьым кузь титулөс. Ми танi ставным висьысьяс,— шуи и эг тöд ассьым гөлөсөс. Сийö петiс быттьө кыскö гу пыткысь.

Санитар стрöга видзөдлiс ме вылө сук синкымъяс увсянныс, пунктiс паньсö му вылө да перйис тасмаас öшөдөм салдатскöй фляга, кодкөд сийö некор эз торйөдчыв.

— Та вöсна, пиукъяс, абу грек и этйöс видлыны.

Разис вевтсö, солькйөдлыштiс флягасö да кисьталiс сэтись кружкаясö, сэсся неуна сөдзөдыштiс фляга вевтас да видзөдөмөн пунктiс муас.

— Сорлавтөм. Но сийö миянлы бурджык на, а немечлы лөк, кыдз Пётр Великий шулөма.

Друт муыс миян улысь быттьө вөрзыштлiс, сэсся кутiс сырмыны, ёна сөрөнджык нин пельясөдз воис быттьө ылын гымалөм шы.

— Инас оз öшйы. Бара со бомбитö станция: полö выль вын вайөмысь. Давай, пиукöй, юам сы вöсна, медым водзö вылө тiян пияныд да внукъясыд кывлiсны сöмын сэтшөм гым, кодi вайö быдөнлы колана зэр. Ми регыд торйөдчам. Помнитöй, пиукъяс: лөк слава смертьысь омөльджык.

Бөръя тостыс кучкис меным сьолөмө, но Кузьмичлөн синъяс серти немтор эз позь гөгөрвоны, и ме босьті тшөтш ассьым кружкаос.

— А эсйөс коді юас?— Бойцов индіс фляга вевт вылө.

— Роч му вылын эм обычай,— Кузьмичлөн төдчымөн вежсис гөлөсыс, синъясыс быттьө руалісны.— Казьтыштам паметьсö Жуковлысь — миян сөкөллысь...

И пыр жö син водзö сувтіс ляк баддя нюр, кытчö колисны нэм кежлас унаөн училищеса менам ёртъяс пиысь. И ме эг коль кружкаö ни öти войт.

— А төданныд, лёк славаыд абу буртор,— друг заводитіс Бойцов.— Тэнад землякыд, Юра, командир-пилаыд, вөвлөм лётчикыд, висьталіс миян сестралы — Надялы: миянөс пö ныр вылө усьтөдз муртса эз сконъявны суседъяс. А ещö пö гвардеецъяс. Мөдім пö жмитны-дзескөдны немецөс рытывыввлань, а кватитчим да, суседным — гвардейскöй батальон — сылөма. Вөлөмкө, гвардеецъясыд повзөмаөсь да коклябөрнысö фашистлы петкөдлөмаөсь. Та вөсна командир-пилаыд аслас йөзыскөд өдва абу пленö шедөма... Ха-ха-ха...

Менам морөс пытшкын быттьө мыйкө орис, өд делөыс эз вөв сідз, эз вөв сідз... «А тэ, Алексей, эскан быд сөрөмыслы да сералан... Сералан? Код вылын? Сметанин вылын? Вагин вылын? Ротаса командир Костенко вылын? На тэныд!» Быттьө кокныда и өвтышті, а Алексей нюжөдчис бипур бокө.

Ас вуйө вои Кузьмичлөн клеци кодь чабырын, видзөдлі Бойцов вылө: сійö пукаліс нин да няйтөсь кулакнас чышкаліс синвасö.

— Эн лысьт серавны на вылын, он кө төд, кызди вөлі!— горөді ме.

— А кызди збылысьсö вөлі?— Кузьмич меліа видзөдіс синъясö.— Восьты, пиук, сьолөмтө, юксы шогнад. Кокньөдас. Измөма тэнад сьолөмыд, пиук...

Тайö кывъясыс дзикөдз лигышмунөдісны менө, но ме верми на кутчысьны, медем не бөрөдзыны кокниа петысь синваөн.

— Кыдзи вөлі збылысьсö? Тайö заводитчис сійö лунас... Ті, Кузьмич, асьныд төдад. Стөчджыка кө шуны, тавося, 1942 вося, август 28 лунө, кор ми, волховчана, первойысь видлім орөдны Ленинград гөгөр блокадасö. И медводдза радъясын мунісны курсантскöй батальонъяс. Налы усис шуд йирны немецъяслысь, кызди гижöны газетъясын, джуджыда эшелонируйтөм да бура крепитөм оборонасö. И курсантъяс вөчисны тайөс. А висьтавны кө став йывсьыс, кызди вөлі делөыс...

— Но мый нө, пиук, ми кывзам,— шуыштис Кузьмич.

Бойводзвывса вой (Зарубинлөн первой висьт)

Землянкаын гөвкъялө табак тшын. Наръяс вылын куйлөны өта-мөд дінас топөдчөмөн, пукалөны, коді кытчö веськалөма,— боецъяс. Көть найö и мудзөсь, но узьöны этшаөн. Кылө лөня варгөм, коді кадысь кадö орлө серамөн. Пызан сайын, көні лампа пыдди сотчö телефон кабель, кодсюрө гижöны письмөяс.

Кысь нө узьяс, кор дивизия сутки саяс нин вөтлө-дзескөдö

немецъясӱс рытивывлань, а мянлы эз на сюрлы ни ӱтчыдысь лыйны. Ми — мӱд эшелонынӱс. Чайтам, мый аския луныс ваяс вежсьӱмъяс. Виччысям сійӱс, сьӱлӱм оз инась местаӱ...

Окота лоис петавны ывлаӱ, лолыштны сӱстӱм сынӱдӱн. Чеччи нар вылысь, кокъяс пыр жӱ веськалісны наръяс улӱ йиджтысьӱм ваӱ. Весиг пӱрадок радейтысь немецъяс абу вермӱмаӱсь мынтӱдчыны тайӱ нюйт кодъ трунда васыс. Сӱмын на некымын час сайын тайӱ жӱ землянкаыс вӱлі налӱн юр сюянӱнӱн.

Ыркыд войся сынӱдыс кажитчис торйӱн нин чӱсқыдӱн, лӱссыда пальӱдіс юр. Орчча землянкаын, кӱні вӱлі мӱд взвод, бриньӱдчис-ворсіс гитара. Кодлӱнкӱ негора гӱлӱсыс отсасис сылы:

**В полдневный жар в долине Дагестана
С свинцом в груди лежал недвижим я,
Глубокая еще дымилась рана,
По капле кровь сочилась моя.**

Романслӱн шог кывъясыс паськалісны да вошисны сьӱкыда вугралысь пуяс пӱвстӱ, чужтісны шог мӱвпъяс, кодъяс чеплялӱны сьӱлӱмтӱ, гудралӱны ловтӱ. И, тыдалӱ, буретш та вӱсна романсыс воис кодсюрӱлы сьӱлӱм вылас. Со ӱтка гӱлӱс дӱнӱ ӱтлаасис мӱд, коймӱд, сьылӱм гораммис:

**И снился мне сияющий огнями
Вечерний пир в родимой стороне.
Меж юных жён, увенчанных цветами,
Шел разговор весёлый обо мне.**

Сьылӱмсӱ вевттис кыз гӱлӱс:

— Дугдӱй! Бара сентиментсӱ заводитісны... Мещанство!

Сьылӱм кусі, гитара бриньӱм шы улӱ кодкӱ збодера вочавидзис:

— Кысь тӱныд торйӱдны классикасӱ мещанствоысь! Тайӱ — Лермонтов.

— Сійӱ татшӱм нярганторъястӱ эз гижлы,— падъяліс кыз гӱлӱса.— «Белеет парус», «Прощай, немытая Россия», «Кинжал»...

— Ок и солдафон!— гажаа серӱктіс воддза гӱлӱсыс.— Колӱ тӱдмасьны сьылӱн став творчествоӱн, а сӱсся вӱлисти ныртӱ сьуйны.

Ме веший землянка дорысь Лермонтовӱс радейтысь гӱлӱсъяс шы улын:

И снилась ей долина Дагестана...

Неылын кодъяскӱ нума-намакылісны. Сӱсся яр кодзув моз ӱзйыліс би, кӱтъ, тыдалӱ, кодкӱ и куритчис чигаркасӱ соскас дзебӱмӱн.

— Код сӱні дурӱ?— стрӱга юалі.

— Тайӱ ме, Юра,— кыліс Сметанинлӱн гӱлӱсыс.— Вунӱдчи. Ылын на немечӱдзыд, оз аддзы. Дай быд чигарка би вылад минаыд оз вичмы, кӱтъ эськӱ сійӱ став Европасӱ грабитіс.

Сергей Сметанин — менам земляк. Эжва бокса орчча сиктысь. Училищын сьӱкӱд вӱлім ӱти взводынӱс жӱ. Сметанин неыджыд тушаа, кӱлӱб кодъ гӱгрӱс да сӱстӱм чужӱма, дженьыда шырӱм еджыд юрсиа. Веськалӱма училищӱ веськыда гортсянныс, среднӱй школа помалӱм мысти, бӱръя, тувсов призыв

дырйи. Ме пукси сы дорö. Сэн жö куйлис Вагин — баръёв кокъяса, тэрыб вöраса да зэв варов зон. Сійö эз вöв миян училищеысь, а, буракö, Куйбышевскöйысь либö Пуховическöйысь. Но тайö кык зонмыс куим сутки чöжөн, дивизияö воём бöрын нин, лоисны быттö вокъясөн. Ме весиг неуна вежöгті Сметанинöс. Найö водзö нуöдісны ассыныс орлём сёрнисö.

— А öні миян идралöны урожай,— шуис Сметанин.

— И миян тшöтш,— содтіс Вагин.

— Кольём во,— водзö нуöдіс Сергей,— ме ытшки няньсö машинаөн. Ок и мудзан лунтырнад! А рытнас мыссян, вежсян, нуръясьыштан — и гуляйтны. Асъядорнас воан гортад, сутшкысян вольпасьö...

— ...А асывнас чеччынытö!— содтіс Вагин.— Кымыныськö чуксавласны жö... Быдён скөрмылан мам вылад.

— Да,— ышловзис Сергей.— Öні кö эськö...

Миянсянь верст сайын кымын то сэнi, то танi, сап пемыдсö поткöдлігтыр, небесаö качлісны ракетаяс да, быгыд югөр койиг, ньöжйөнiк лэччылісны увлань. Быттö сыöд войсьыс повзём пон, эрыштчас немецкöй пулемёт, трассирующöй пуляяс би киньяс моз визьнитöны, сэсся сылöны-вошöны. Сэнi передöвöй. Миян дивизияса орчча полк, немецъяслысь оборонасö пузъпазь вöчём бöрын, öдйö зырис найöс луннас рытывывлö, öні шойччö муö кодйысьмөн, медым югдём бöрын писькöдчыны водзö. Сэнi миян кодь жö том зонъяс, тöдöмысь, мөвпалöны аския лун йывсьыс... Öнöдз делöйс муніс бура. Враг эз вичысь татшöм чорыда кучкөмсö да, ассыс дойяссö нюлиг, лёкысь ыршасиг да эргиг, коляліс рубеж бöрся рубеж. Ни артиллериялөн би, ни дугдывтöг дзуртысь «ишакъяс»*, ни небесаын öшалысь «мессеръяс» да «юнкерсяс» эз вермыны сувтöдны гвардейскöй значокъяса том зонъясöс, кодьяс воисны татчö страналөн пöшти быд пельöсъясянь öти мөвпөн: орöдны Ленинград голя вылысь вөрöглысь джаггөрöдсö.

Зонъяс мунісны пыр водзö и водзö, быттö эз казавлыны ни ассыныс дойяснысö, ни мудзөмсö, ни ёртъясылысь, кодьяскöд неважөн на паняисны öти пöртйысь, вошөмсö. А найö, бөръя-ясыс, аддзывтём мыджöдö крукасьём бöрын, сунлісны-усьлісны, шымыртлісны трунда сора тайö курыд мусö, кодi эз нин вöв сэтшөм лышкыдөн да меліөн, но кодi налы вöлі сэтшөм жö донаөн, коланаөн да мусаөн, кыдзи и чужан сикттөгöрсä муясыс да видзясыс. Шымыртлісны и ланьтлісны рытывыввлань юрөн, быттö тайö вöлі налы медся бур козинөн, кодöс дасьтліс олöмыс. Найö куйлісны вöрзöдчывтöг, лоөмтор вылас некодлы норасьтöг, веж рöма паськөмнас ньöти жö эз шыбитчыны синмö, кыдзи лёк бушколөн нетшыштөм да луд вылö шыблалөм коръяс, кодьяс недыр мысти лоасны муөн жö...

Медым вöтлыны тайö шог мөвпъяссö, заводитi кывзысьны ёртъяслөн сёрниö.

— Лөкторъяд бара оз ков велöдны,— надзöник батйöдліс кывъяссö Сметанин.— Со кöть этйö табаксö босьтам. Восьмина öдвa тырмö лун кeжлö.

— А ме сöмын на велöдча,— вочавидзис Вагин.— Кöть талун жö шыбита. Да табаксö жалита: старшина сетö, а кытчö воштан?

* *Немецъяслөн квайт ствола миномётъяс.*

— Тшынася сизимөд во,— ошйысьёмөн моз шуис Сметанин.— Видлы шыбитны, кор став сювъясад нин йиджөма. А велөдліс менө суседлөн пиыс. Ок, и шыш вөвліс... Батыслысь табаксө гусявліс, да сэтшөм сюся! Емөн писькөдас пыдөссө да быд восьминаысь неуна босьтө.

Ме быдми батытөг. Йөзыдлысь век куритны яндзим. Со и босьта вөлі гусьоник мамлысь деньгасө. Но сылөн өд быд көпейка лыддьөма. Ок, и сюрлывліс жө меным! Сійөн и юрсий шоч, тыдалө.

Локта школаысь либө ворсанінысь, сэки мамө меным: «Восьтив вомтө!» Восьта, ог лысьт весиг лолыштны. А сійө: «Мыйла чесноксө сейин? Чайтан, ог гөгөрво. Пызан сайын сійөс рөд вомад он босьтлы-а...» И заводитчас! Сэсся, быдмышті да, эновтчис. Сэсянь и тшынася. Но мам син водзын — енмөй видз. Вөлі локтасны другъяс, куритөны гортын, а ме ог. Мам дырйи чигарка өзтылі сөмын армияө мунігөн, да и то гажа юрөн. Со неважөн училищеө гортысь воис посылка. Ичөтик сэтшөм ящик, гартыштөма дөрабн... И мый, чайтан, сәні вөлі?

Сметанин сувтовкерліс, виччысис, мый шуас Вагин, но мөдыс чөв оліс.

— Махорка. Дас пачка. Видзөдтө, ме гижлі төдсаяслы, мый училищеын вердөны бура, но табак кузя делөыс збыльысь табак. Со и гөгөрво сэсся найөс, мамыастө...

Сметанин ланьтіс. Сійө пукаліс юрсө өшөдөмөн, вөрзъывтөг, быттьөкө поліс, мый весиг нейджыд төвру вермас разөдны сы син водзысь тайө ылыс да муса серпасъяссө.

Менам ёртъяслөн каска мыгөръясыс заводитісны төдчыны небеса фон вылын. Сідзкө, югдандор. И збыльысь, юр весьтын өшалысь кодзувъяс лоисны пыр чусыдджыкөсь и чусыдджыкөсь. Сөмын на пиысь өти, коді вөлі дзик вөртас дорас, яра пөртмасис лөзоват рөмөн. Кор видзөдан сы вылө, мукөд кодзувъясыс быттьө сылөны-вошөны, а мыйөн видзөдластө вештыштан неуна бокө, пыр жө аддзан уна мукөдөс, көть налөн югөрыс өдва-өдва писькөдчис татчөдз.

Весиг Сизима кодзувлөн көшыс өдва чусаліс, сійөс позис казавны сөмын бөжсяньыс неылын ярджыка өзйысь Войвыв кодзув серти.

Со кодзувъяс пиысь өти, ас бөрсяыс биа бөж колиг, мөдөдчис мулань и звук мысти воши. Окота төдны, кытчө сійө төвзьө, мыйла? Сэки мем дум вылө усыны пөчлөн висьтъясыс. Сы ног артмыліс: быд мортлөн — аслас кодзув, коді чужө тэкөд и кусө тэнад олөмкөд тшөтш.

И эг өтчыд, арся пемыд войясө өшинь дінын пукалігөн, либө төлын уличаын сулалігөн, ме корсылы ассьым кодзулөс. И со өні, передөвөйсянь неылын улис му вылын куйлігөн, челядьдырся моз жө зіля корсьны сійөс. Но тайөс вөчныс абу кокньыд: кодзувъяс омөля торъялісны өта-мөдсьыс. Но өд эскыны кө пөчөлы, то сійө, менам другөй, небесаас көнкө эм жө. Гашкө, этайө менам, коді тай со неуна гөрд рөма? А гашкө, эсійө өдва төдчысь кодзулыс? А колөкө, со тайө— усысысыс, бөжаыс?

— Вот эськө кыпөдчывны сэтчө,— гораа шусис менам.

— Кытчө?— чуймис Сметанин, но кор аддзис небесалань индысь киөс, пыр жө водзө нуөдіс менсьым мөвпөс:— Тэа-меа,

Юра, эг на пуксыйлӧй весиг самолётӧ. Но коркӧ век жӧ видзӧд-лам, эм абу сэнӧ, небесаас, енмыс.

— Эж, мӧвпъяс, мӧвпъяс,— ышловзис Вагин,— кытчӧ сӧмын тӧ онӧ вайӧддӧй миянӧс! А кутшӧм эськӧ гажтӧм вӧлі олӧмыс, шуам, морт кӧ эз вермы мӧвпавны, ветлыны думнас мукӧд планетаяс вылӧ. Сергей, колӧкӧ, ӧні кутшӧмкӧ ылыс планета вылын, но кӧть, шуам, со эсӧйӧ пуйывса дзирдалысь чут вылас, татшӧм жӧ вӧрын ми моз куйлӧны куим зон да виччысьӧны аския лунсӧ, медым...

Но Сметанин вомалис ассыс ёртсӧ:

— А тэ качӧдчыв сэтчӧ. Вермас лоны, мый сэнӧ коммунизм нин. Кольчан... А ми танӧ Юракӧд кутам тодмышкавны фашистъясӧс.

— А мый? И качӧдчыла!— скормис Вагин.

— Первой видзӧдлы ныр улад, мый сӧсь аддзан. Кортӧм гӧстъясӧс! Ӑні колӧ налысь сыйӧдзирсӧ бергӧдны. А Вселеннӧяд коркӧ, дерт, кыпӧдчасны...

Котӧртис асья тӧвру, шарӧдчыштис пипу коръясӧн, гылӧдіс на вылысь лысвасӧ. Ӑти войт веськаліс киӧ, ва туй колиг визувтис-усис муӧ.

Босьтис йирмӧг. Ёртъяслы, буракӧ, тшӧтш ыркыд лои. Землянка ӧдзӧс дорӧ вотӧдз Вагин друг юалис:

— А гортад письмӧястӧ гижид?

— Мыйла?— вочавидзис Сергей.— Мамъяслы шогыс и миян-тӧг тырмӧ. Мед чайтӧны, мый ми век на училищеынӧсь. Збыльвы-лас ӧд сідзи и лоӧ. Миянлы, фронт вылӧ мӧдӧдігӧн, висьталісны: пӧртаннӧд пӧ олӧмӧ командованиелысь заданиесӧ и бӧр воад, медым помавны училище. А заданиеыс абу нин сэтшӧм сӧкыд, ме думысь. Со орчча полк талун орӧдіс фашистъяслысь оборона-сӧ, зырӧ найӧс. Аски и ми ог кутӧ йӧз киӧн пуӧм роксӧ панявны. Сетан татчӧс адрес, а лун-мӧд мысти, гашкӧ, бӧр Архангельскын лоам. Мед нин сэтчӧ чукӧрмасны. Воам да ставсӧ ӧтпырӧйӧ лыддям. Сідз, Юра?

— Сергей, татшӧм делӧясад кодсюрӧ и юрсӧ воштывлӧны. Колӧ жӧ юӧртны гортад. Лӧкыс ӧд оз ло,— ме пыдди вочавидзис Вагин.

— Менам и медальонӧй тыртӧм. Он верит? Колӧкӧ, петкӧдла. Олӧмкӧд торӧйӧдчыны миянлы водз на. Колӧ на со, асьнӧд шуан-нӧд, видзӧдлыны, кыдзи олӧны-вылӧны йӧзыс мукӧд планетаяс вылын.

Тӧдіс кӧ эськӧ Сергей, мый лоас сукӧд недыр мысти...

Тайӧ вӧлі август 28 лунся рытӧ, кор ми кывлім, мый орчча полксаяс, некымын училищеысь курсантъяс, орӧдӧмаӧсь немец-кӧй обороналысь некымын визь, кодъясӧс фашистъяс, кӧнкӧ, лыддылісны жугӧдны позьтӧмӧн. А аскинас, август 29 лунӧ...

Водзӧ лоӧ на.



Ловйөн тай сэки коли...

Ыджыд война йылысь вöвлөм салдатлөн казытылöмъяс

I

Газетын да районса музейын уджалігөн унаысь гижлі вöвлөм фронтöвикъяс да тылын уджалысьяс йылысь. Очеркъяссö йöзöдлісны республикаса да Изьва районса память книгаясын, газет-журналъясын, найö юргисны радио пыр. Ас йылысь вöчлі жö кутшöмсюрö пасйöдъяс. А öні, смелмöдчи да, аслам фронтöвöй туй да кольöм война йылысь гижі дзик збыльсö. Нинöм содтавтöг да чинтавтöг. Дерт, сизимдас вонад унатор нин вуніс. Но война вылас аслам видзöдласöй коли.

...Война пансьöмсянь лун кык мысти Кипиевоö, менам чужан сикт бердö, сувтіс йöзöс новлöдлан «Республика» пароход. Унаöн чукöрмисны: пöрысьяс и томъяс, мужичöйяс и нывбабаяс, весиг челядь. Курьд шог öтувтіс быдөнöс. Пароход палуба вывсянь сёрнитысьяс висьталісны: враг шыблалö бомбаяс миян каръяс вилö, жүглö школаяс, больничаяс, виалö нем мыжтöм йöзöс. Татшöмторсö прöститны оз позь. Ми пуктам став вын, медым пасьвартны этшысь петöм вөрөгöс, а ковмас кө, и сетам ассыным олöмнымöс.

Вежон кольöм бöрын сэтшöм жö еджыд пароход нуис Кипиевоысь 21 том мужичöйöс. Пароходыс дыр тутсіс-прöщайтчис берегö кольöм бöрдысь мамъяскöд, гöтыръяскöд, чойяскöд... Регыдъя кадöн босьтісны армияö и батьöс, Кондратий Ивановичöс, да сы кодь жö арлыда мукöд мужичöйöс. Июль помланьыс, ёна сёрмöмөн, менö мөдöдісны велöдчыны Щельяурса ФЗО школаö. Гортö колис сöмын мам аслас куим нывкöд, медічöтыслы сэки вöлі нель арöс...

Школа помалöм бöрас во мында уджалі Няшабöжса судоверфын, отсалі стрöитны баржаяс. 1942 вося арын воис шог юör — войналөн сьöкыд косьясын вошöма батьö. Бöрынджык тöдмалі: татшöмторйыд тыш бöрся тышад тшöкыда вöвлöма, уна салдат-



лысь да офицерлысь туйпомсö öнi на корсьöны. Сьöкыд удж да сёян тырмытöм вöсна ме ёна омöльтчылi, черсö прамöя эг кут вермыны кутны. 1942 вося декабр помын корисны военкоматö. Нывбаба-терапевт юрнас довкйöдлiс да шуалiс: «Мыйкö, тэ, зон, вывтi коснöд, сöмын лыыд да куыд кольöма». Ёна шогöдлiс, мися, оз босьтны армияс. Но дыр мысти шуисны: «Годен к службе». Ог дзеб — зэв нимкодь лои. Вöлөгда карын выльысь видлалiсны врачьяс, менö да ме кодь коснöдъяссö индiсны бурдысьяслөн торъя батальонö. Танi пö ёнмöдчыштöй. Вердiсны сэнi бурджыка, ветлöдлiм стройон, котралiм, кыскасим, сулалiм караулын... Велöдiсны лыйсьыны 82 миллиметра миномётысь. Татшöм öружиесö Россия да Япония костын война дырйи лöсьöдлöмаось роч офицерьяс Власьев да Гобято. Винтовкаысь да миномётысь бура лыйсьöмöс менсьым казялiсны, сетiсны ефрейтор звание.

1943 вося арнас миянöс, том салдатьясöс, нуöдiсны Калинин карö (öнiя Тверö), көнi котыртiсны 26-öд стрелковöй дивизия. Ме веськалi сылөн 79-öд полкö. Мыйкöдыра велöдiсны снайперö да связистö. Ноябрь помланьыс подөн мöдöдчим фронтлань. Ржев карсянь неылын гитлеровечьяс лöсьöдлöмаось ыджыд шойна, кытчöдз синмыд судзö — крестьяс сулалöны. Уна крест вылын — немеч каскаяс. Эз пöрысьмöмла да висьöм понда мунны мöдарьюгыдас та мында фрицыс да гансыс, найöс бырöдiсны чорыд косьясын миян салдатьяс.

Подөн дыр мунöмсьыс дубалiсны кокъяс, доймисны-юкалiсны кокъяслөн да сойяслөн яйчигьясыс. Восьлалiгас тшöкыда вугыртлан, весиг усьлан. Со и Великие Луки кар. Танi шойччöдiсны кык лун, олим жуглöм керка пöдвальясын. И бара туйö. Мунiгөн тöдмаси накöд, кодьяскöд орччөн ковмас пырны тышö. Отделениеса командирыс Михаил Кочетов, 23 арöса сержант. Топыд вома, этша сёрниа, быд кыв шуас думыштöмөн. Чужлöма Красноярскöй крайын. Медся олöма салдатыс Анисим, овсö ог нин помнит. Сiйö вöлöма нин косьясын, бöрынтьчылöма Рига дорсянь. Öти тышын сяммöма петкöдны сьöкыда ранитчöм взводса командирöс. Первой кадас ме вöли быттö сылөн борд улын. Миянкöд восьлалiсны и кык узбек, öтисö шуисны Умарөн. Кыкнанныс зэв омöля сёрнитiсны рочнас. Пырджык öтлаын кутчысисны Виктор да Вася (овныс вунöма дыр каднад), кыкнанныс чужлöмаось 1925 воын. Викторлөн вöли мича гөлöс, кык во велöдчöма Ленинградса музыкальнöй училищевын. Вася радейтiс шмонитны, медсясö ас вылас, тшöкыда шульвлiс: «Мы — вятские, робята хватские». Зэв аслыссикас мортөн петкöдчис Поздняев ова салдат. Некодкöд эз сёрнит, пыр öтдортчис ёртьяссьыс. Тыдалö, олöмыс сiйöс водзын ёна дойдлöма. Вöли öти украинеч, радейтiс сьывны: «Реве да стогне Днепр широкий». Миянкöд восьлалiс и том мордвин. Öкмысöдсö шуисны Николайон, дыр кад овлöма Арменияын. Тöдчис, том кадас уна лыддысьöма. Тöдiс Пушкинлысь, Некрасовлысь, мукöд роч поэтлысь уна кывбур. Зэв лöсьыда-кыпыда висьтавлiс Армения йылысь. Көть ми ставным вöлим разнöйöсь, олим öтув, ёрта-ёртöс некор эг öтдортлöй-öбидитлöй. Мöд ног фронт вылад оз позь. Гежöда узьтöдлiсны, дерт, шоныд керкаясын. А салдатыдлөн бура шойччöм да пöттöдз сёйöм бöрын и руыс кыпыд.

Взводса командир Морошин, лейтенант, вöвлöм учитель, висьталіс, мый воим Белоруссия муö. Войсö коллялім джуджыд да паськыд ота траншеяын. Асывнас нин, югдыштöм бöрын, видзöдлі, мый жö бруствер саяс вöчсьö. Кытчöдз синмыд судзö-босьтö — тшöтшаммöс шылькнитчöма, кöнсюрö сьöд чутьяс тыдалöны, неыджыд пуяс. Водзын немеч сулалö. Некемын вой дорвыв кöдзыдаліс. Умарлөн землякыс кынтöма кокъяссö, сійöс нуöдісны медсанбатö, бöрсö ротаö сэсся эз нин волы. Кöдзыдысла медпервой кымöны киясид. Та вöсна кадысь кадö вөрöглань лыйла винтовкаысь, ствол бердас шонта чуньясöс. Öти войö помся вит-ö-квайтысь лыйи, куті мышкыртчыны, и пыр жö некемын пуля сатшкысис-веськаліс брустверас. Снайпер, тыдалö, казялöма öти местасянь лыйсьöмöс да кöсйöма шковгыны менö. Ен да мамлөн молитваясыс видзисны лёк рöксыйд...

Корсюрö мянöс вежлавлісны, öкмыс-дас километр сайö сувтöдöм палаткаасын, тыланьын, пывсьöдлісны-мыссьöдісны. Торъя палаткаын бырöдісны салдат паськöмысь той да мукöд пежгагö. Траншеяасын сулалігөн вывті öдйö вöлі тойöссян.

Тылö петöм бöрын первой, дерт, лыддян воöм письмöяс. Частöджык гижліс Анна чой, коді дас нель арöссянь дöзöбитіс колхозын куканьясöс, а некемын во мысти заводитіс уджавны вöрын. Гижис, мам пö войнас дежуритö скöтнöй двoryн, луннас вöлөн ваялö турун. Маша чой пырöма велöдчыны Мокчойса педучилищө. Медся ичöтыс, Катя, отсасьö жö мамлы, уна шеп öктöма. Картупельыс ёна бур воöма. Анна чой некор эз норасьлы сьöкыд олöм вылö. Письмöяссö пыр помавліс öти ногөн: видз асьтö, дона вокö, тэ öд öні мян и бать пыдди. Уна бур кыв гижліс тшöтш Няшабöжысь Ганя нима мича чу-жöма да кузь кöсаа ныв...

Батальонса комсорглөн корöм серти гижи шыöдчöм, мед босьтасны комсомолö. Собрание вылас ротаса командир ошкыштіс менö, примернöй боец пö. Водзö кöні кöть эг овлы, кöні эг уджавлы, а комсомолецлысь нимсö некор эг няйтöсьтлы да уськöдлы.

Тулыснас кок улад ва. Шынеляд няйтыс чунь кызта öшйöма. Öти кадö ёна висьмыліс кынöмöй, дизентерия пö. Дас лун куйлöдісны медсанбатлөн землянкаын. Снаряд гильзаысь вöчöм лампа дорын лыдди Александр Купринлысь «Поединок» повесьтсö да Николай Гогольысь драмаяс. Водзыс и бöрыс кыкнан небöгыслөн эз вöв, салдатьяс, буракö, чигарка вылö косявлöмаöсь...

Олöмыд быдöнлөн öти. Война вылö веськалöм бöрын ме не уна полышті, но некор эг сайöдчыв йöзлөн мыш сайö. 1944 вося апрель 26 лунö меным тырис 18 арöс. Та йылысь ме висьталі отделениеса командирлы, а сійö — взводөн веськöдлысь Морошинлы. Вайисны этшаник водка да отделениеса войтыркöд пасйыштім чужан лунöс.

Шулöмаöсь: ветлысь-мунысь салдат пö мукöд генералысь унджык аддзö, кылö да тöдö. Тылö ветлöм бöрын Анисим юöртіс, мый мян бöрын уна пушка да миномёт сувтöдöмаöсь. Виль землянкаасысь тшын пуркйö-петö. Регыд, тыдалö, мунам водзö. Салдатыд ныриса вöлöма, эз сорсьы. Винтовкаяс вежисны

автоматъяс вылө. Июнь 22 лунö юөртисны, аски асывнас пö пырöдчам тышö, лоö наступление. Войыс вöлі шоныд, неуна зэрышталіс. Югдігас кутісны дзользыны посни лэбачъяс. Сетіс гөлөссö көк: «Ку-ку, ку-ку...» Меным сержант серамсорөн шуалис: «Тэкөд ми, другö, дыр на олам. Кылан, мыйдыра көкө».

Водз асывнас вайисны сёян-юан, водка. Курыдторсö босьтлі сөмын вом тыр. Квайт часын грымöбтіс уна сё пушка. Бианьов моз лэбисны реактивной снарядъяс. Йиркакылөмсьыс чуналис пель, кок улын дзөрис муыс. Кор пушкаяс кутісны лыйлыны водзöджык, вөрөглөн тылö, кыліс горөдөм: «Вперёд, в атаку!» Сержант отсыштіс меным петны траншеяыс. Тайö асылö уна полк, уна дивизия босьтчисны жуглыны вөрөглыс окоп-дзотъяс. Тадзи заводитчис Белоруссия мездөм кузя Багратион нима операция.

Миян водзын танкъяс эз вöвны. Нюрсялөм да васөд муыс оз лэпты сьöкыд машинаысö. А ми котөрөн-сорөн восьлалам водзö. Кор мунім сідз шусяна нейтральной муыслыс джынсö кымын, миян вылө помся кутісны усявны немечлөн снарядъяс да минаяс. Сержант вöлі мясянь бокинджык, восков дас вит—кызь сайын. Аддза, сысянь матын гымöбтіс мина, öтпырйö усисны куимөн. Котөрті сержант дорö, сійö ойдөма вирөн, сөмын и шуис: «Эн кольччы ёртъяссьыд, другöй. Прöщай!» Менам петіс синвайö. Вөтөді Анисимөс, ськөд орччөн автоматыс лый-сиг муні водзö. Ог бура помнит, кыдзи чеччышті первой траншея вомөн. Пуляяс, осколокъяс жвучкисны-лэбзисны меыс бокигіджык. Гөгөр туплясисны шойяс, öружие, быдсикас көлуй...

Квайт-көкъямыс километр мунөм бöрын сувтім мир туй дорö. Вöлисти кывны кутіс мудзөм. Тіпкис-гупкис сьөлөмөй. Дыр мысти вайисны сёян-юан. Казытыштім сержантөс, мукөдъясөс, кодъяс усисны вөрөгкөд бөръя тышас. Миян отделениеыс раничөмаөсь Николай, томиник мордвин да Поздняев, коймөдыс сьöкыда. Шуисны, миян ротаын пö мукөд ротаяс серти воштөмъясыс ёна этшаджыкөсь. Отделениеса командирөн лейтенант индіс менö. Та дырйи шуис, регыд пö воасны сержантъяс, сэки быть вежам.

Войнас локтөмаөсь танкъяс, уна машина. Воис индөд: быд полкыс öти батальон мунас танкъяс вылын, десантын, могыс — босьтны-орөдны Минск—Москва чорыд веркөса туй. Быд татшөм машина мыш вылө пуксим квайт-сизим морт. Танкса командирыс тшөктіс топыда кутчысьны скөбаясас, сюся видзөдны, медым кутшөмкө немеч фауст-патронөн эз лый машинаас. Луннас танкъяс вылын мунім квайт-сизим час, а кажитчис, быттö быдса төлыс. Шылыд му кузя мунігад оз вöлі ёна тракйөдлы, а мылькъя-гуранаті төвзигөн көрт вöлыд то крута кыпөдчылас, сэсся быттö увлань усьö, видзчысьны лоö, мед муас не тімбыльтчыны да танк улас не сюрны.

Т-34 танк йывсьыс кывлі сөмын бур кыв. Татшөм көрт вöлыс мирса ни öти армиялөн сійö кадас эз вөв. Паськыд гусеницаыс сетö позянлун мунны няйтаинті, кыз броняыс бура видзö экипажсö, ыджыд öдыс (часнас 50 километр) — тэрыба матыстчыны прөтивник дорö, лыйлыны сы кузя 85 миллиметр калибра пушкаыс.

Блысянь тыдовтчис Минск—Москва паськыд туй, сійö вöлі тырөма быдпөлөс техникаөн, грузовöй автомашинаөн, орудиеөн.

Миян танкъяс да немечлөн орудиеяс восьтісны өта-мөд кузя би, ыпнитіс-өзйис бензовоз, съөд тшыныс вылө-вылө кыпөдчис. Туй пасьтала ставыс гудыртчис, кутшөмкө машина кузолын взорвитчисны снарядъяс, осколокъясыс лэбисны миян юр весьтти. Прөтивниклы удайтчис өзтыны өти танк, коді миянсянь муніс 15–20 воськов сайын. Регыд мысти снаряд веськавліс и миян танклөн кымөсас, машинаыс быттё сувтовкерліс. Дыр тіньгис миян пельясын. Бур, мый стальыс зэв крепыд вөлөма. Танкным выныштчөмөн чепөсйис паськыд туй вылө. Сылөн гусеница улын ратшкакыліс немечлөн көрта көлуй. Кось помасьом мысти танкистьяс петкөдлісны миянлы броня вылын артмөм нөптовсө (гурансө).

Туйсө вуджөм бөрын миянөс неуна шойччөдыштисны, сэсся мөдім водзө. Коркө воим крут берега неыджыд ю дорө. Белоруссияын посни юыс уна. Кодкө виччысьтөг горөдіс: «Воздух!» Видзөдлі енэжас, а сәні съөд креста самолётыс, гашкө, комын, гашкө, сыысь на унджык. Танкъяс өдйө кутісны разөдчыны. Бомбаяс помся гылалісны увлань, чашйисны мусө. Самолөтъяс лыйлісны и танкъяс кузя. Öти танклөн пытшкас сэтшөм ёна грымөбтіс, мый башняыс ори да куим метр сайө лэбис. А бордъя вөрөгъяс вөчасны кытш да быттё здук кежлө кынмыласны места выланыс, пикируйтөны. Миян весьтын кума-кама кылө, гөгөр бомбаяс гылалөны. Öзйис нөшта өти танк. Коркө тыдовтчисны и миян самолөтъяс, на пиысь өтияс лэбисны вөрөглөн истребительяслань, мөдъяс уськөдчисны бомбардировщикъяс вылө. Съөкыд вөлі видзөдны сынөдса кось вылө, тайө здукас быдөн, тыдалө, кевмис: «Енмөй, видз миянлысь лётчикъяссө». А миянөс, салдатъясөс, дорйис-видзис сәки юлөн крут берегыс. Но век жө ротаысь куимөн ранитчөмаөсь.

Лун кык-куим мысти дивизияса газетысь лыддим Юрий Смирнов йылысь гижөд. Сійө тышкасьома миянкөд орчча 77-өд полкын, тшөтш вөлөма танка десантын. Ранитчөма да усьома танк вывсьыс. Гитлеровецъяс пыртөмаөсь сійөс блиндажө, ёна нөйтөмаөсь, пыр юасьомаөсь, кутшөм вынъясөн муно наступлениеыс, но том салдат вөрөглы нинөм абу висьталөма. Дыр мучитөм бөрын сылысь юрсө, кияссө да кокъяссө ыджыд көрт тувъясөн тувъялөмаөсь пөвъясысь вөчөм крест вылө. Тайө подвигсыс Юрий Смирновлы вөлі сетөма Сөветскөй Союзса Геройлысь ним. 1967 воын Юрийлөн мамыс воліс Ижмаө, аддзысьліс татчөс олысьяскөд, школаясса велөдчысьяскөд, дыр сөрнитіс мекөд. Мунігас аслас пи пыдди окыштіс менө...

Оршица ю дорын немечъяс уськөдчылісны миян батальон вылө, но регыд бөрыньтчисны, воштісны уна салдатөс да. Ми пырим Орша көрт туй станцияө. 1941 вося июлын вөрөг тані первойөн төдмаліс миян «Катюша» нима реактивнөй оружиелысь вынсө. Станцияас чукөрмөм салдат да техника вылө лэбзьома-усьома 112 реактивнөй снаряд. Немечлы коvmөма кык лун идравны-гуавны усьөм салдатъяслысь шойяссө.

Белоруссияті да Литваті сәки шөйтисны вөрөглөн жуглөм полкъясысь салдатъяс да офицеръяс. Гитлеровецъяс тшөкыда усьласисны миян ротаяс, батальонъяс вылө. Öти грезд дорті мунігөн найө лыйлісны миянөс пулемётъясысь. Роталы сетісны приказ — бырөдны гитлеровецъясөс. Салдатъяс өдйө котөртис-

ны грездланыс. Ме дойдышті кокос да неуна коли ёртъясыс. Аддза, водзын, воськов 15–20 сайын, сулалё дзоля тушаа кыз немеч да пистолетыс метитчө мелань. Недыр кезлө быттё шойёвошлі. Сомын шуйга пельос сотыштөм бёрын вои ас садё, автоматыс лэдзи кузь очередь. Немечыд катовтчис да уси. Ме босьті сылыс пистолетсё да котөрөн вөтөді ассым взводос. Взводса командир видлаліс пистолетсё, шуис, мый сәні өти патрон и кольома. Со өд кызди овлө...

Көть и неуна яндзим, но висьтала мекөд мөд лоөмтор йылыс. Дыр мунөм бёрын сувтім эндөм му вылө, кодийим окопъяс. Вөрөг, буракө, казьялома батальонлыс локтөмсё да кутіс лыйлыны миномётъясыс. Минаясыс усялісны матө, өта-мөд бөрся. Кыліс ойзөм. Ёна мудзөмөйла менам чорыда унмовссьома, весиг эг и кывлы батальоныслыс мунөмсё. Садьми-палялі, гөгөр пемид, өтар-мөдарын кылө лыйсьөм шы. Ёна, дерт, повзи. Кодарө и мунны? Бөрө вешъян — дезертир-трусөн лыддясны, штрафбатө сюран. Водзө сетчан — верман вөрөг киө веськавны. Войнаыд война и эм, сылөн законъясыс зэв чорыдось. Вөчи некымын воськов, уси окопө, а сәні шой. Ньөжйөникөн муна водзө, зептын граната-лимонка, кийн автомат. Кыпөдчас кө ракета, водла му вылө. Ньылөмөй шорөнмышку кузя визувтө. Кор тэ ёртъясыдкөд өтлаын, сэки полөмыд оз сэтшөма личкы, а кор өтнад, ёна сьөкыджык. Ог помнит, дыр-ө муні, вуджи кутшөмкө шор, кылі роч сёрни. Сулалышті здук-мөд да горакодь юалі: кто там? Орччөн петкөдчисны кык салдат да нуөдісны менө водзө, кутшөмкө капитан дінө. Сійө стрөга юаліс, коді ме да мый тані вөча. Висьталі дженьыдика ас йылыс, капитан чөла кывзіс, а сөсся вак-вакөн кутіс серавны. Тшөктіс югдытөдзыс на ордын овны, весиг тшайөн юктөдны. Асывнас меным индісны, кодарө мунны. Веськөдчи водзө, ас роталань. Вөлөмкө, төрытнад менам мунсьома шуйгавывджык. Взводса салдатъяс сералыштісны ме вылын, накөд тшөтш сералі и ачым. А взводса командир ошкыштіс менө, мый эг падмы-шөйөвош.

Бөрө коли паськыд да лөнь Березина ю, көні коркө фельд-маршал Кутузов пасьвартіс Наполеонлыс армиясө. Паськыд туй бокын сулалө автомашина, гораа юргө музыка. Кыпид сьыланкывъясыс да маршъясыс кылөны уна километр сайө. Татшөм гаж улад и восьлавсьө кокныыдаджык...

1944 вося июль 3 лунө лои мездөма Минск. Белоруссиялөн юркар бердын кытшө веськалома сё сюрс гөгөр салдат. Миян разведка юөртіс: ас йөз дорө немечъяс көсийоны петны Барановичи кар бердті. Кытшсө кутысьяслы отсөг вылө веськөдчис миян дивизия, мунім тэрмасьөмөн, луннас 30–35 километр. Места вылө воөм бёрын пыр жө кутім кодийыны окопъяс. Унаыс мөвпыштілі: войнаыс, мися, не сымда лыйсьөм да атакаө мунөм, мыйта подөн ветлөм да му кодийөм.

Траншея водзө сувтісны танкъяскөд тыш нуөдыс 76 миллиметра орудиеяс, траншея бөрас — ыджыд калибра пушкаяс да миномётъяс.

Косыс пансис лун-мөд мысти. Водз асывнас немеч заводитіс лыйлыны пушкаясыс да миномётъясыс. Снаряд-минаяс гылалісны артиллеристъяс вылө, потласисны миян траншеясын да окопъясын. Гөгөр ёна gryмакыліс, шыясыс чунөдісны пель, сотчыс тшын-бусыс эз сет лаваны, сотіс синъяс.

Водзын օтпырйօ тыдовтчис некымын танк. Регыд петкօдчисны радօн-радօн локтысь сэтшօм жօ танкъяс, на бօрын восьла-ліс пехота. На вылօ видзօдігօн пօсявліс гօгօр. Ылысянь на танкъяс кутісны лыйсьыны, снаряджысыс жуглісны орудиеясыс брустверъяс, миномётъяс, виалисны-дойдалісны йօзօс. Миян 76 миллиметра пушкаяс эз жօ чօв овны. Кадысь кадօ кылісны орудиеясса командиръяслօн горօдօмъяс: «прицел...», «броневой...» Со օзйис օти танк, нօшта кык танк сувтісны, кутісны бергавны места вылас.

А вօрօглօн мукօд танкыс пыр матысмօ и матысмօ. Воштօмъясօн немечъяс быттйօ эз и лыддысьыны. Недыр кезлօ налысь туйсօ потшліс «катюшаслօн» да ыджыд калибра снаряджаслօн грымакылօмыс. Тшын-бусыс дыр кезлօ сайօдліс миянлань локтысь вօрօгօс. Би ёрасօн օзйисны танкъяс, но на пыдди косйօ пырисны выльяс. Враглօн салдатъяс матысмисны 300 метр ылнаօдз, гашкօ, матօджык на. Миян батальонса войтыр помся лыйлісны вօрօг кузя.

Орчча отделениеесь командирыс лօсьօдօма нин вօлі танкъясօс бырօдан гранатаяс. Но локтысь танкъяс виччысьтօг крута бергօдчисны да усйысисны. На бօрся и мукօд машинаыс. օдйօ кутіс бօрынтьчыны тшօтш немечлօн пехота. Ог помнит, дыр-օ муніс косыыс. Сьօлօмօй менам тіпкօмօн тіпкис, эз вермы лань-тыштны. օтар и мօдар боксянь воштօмъясыс лоины ыджыдօсь. Уси тыш дырйи миян взводса командир, уна мукօд салдат, на лыдын Анисим ёртօй. Сьօкыда доймис «вяткаса» зонка. Зэв найօ жалйօсь, мывкыд да повтօм йօз вօліны. Татшօмօн кымын колис менам вежօрօ кытшօ веськалօм вօрօгкօд медбօръя косыыс. Ротаясօн, быдса батальонъясօн немечъяс сәки сетчалісны пленօ...

Кык лун шойччօдісны миянօс кутшօмкօ ичօтик ю дорын. Купайтчим, мыскалім улыс паськօм. Полкօ воалисны выль йօз, на лыдын вօліны и би пыр мунлօм нин войтыр. Отделение-са командирօн индісны старшօй сержантօс, сы морօсын дзирдаліс Краснօй Звезда орден. Взводօн юрнуօдны кутіс томиник младшօй лейтенант, коді, тыдалօ, сօмын на помалօма училище.

Неман ю дорօ воим коркօ июль шօрас нин. Кывсис, мый ю мօдарас тышкасьօ-кутчысьօ орчча дивизияысь օти батальон. Вօрօглань дугдывтօг камгօны-луйлօны миян пушкаяс, миномётъяс, асланыс биօн найօ зільоны дорйօны батальонсօ, оз сетны вօрօглы зырыштны сійօс Неман юас. Повтօм батальонлы ёна отсасисны ИЛ-2 самолётъяс, найօ бырօдісны вօрօглысь уна орудие, миномёт да пулемёт, виалины налысь салдатъясօс.

Сапёръяс асыв кезлօ сувтօдісны-лօсьօдісны понтонъясысь Неман ю вомօн пос. Миян полкысь кык батальон медводдзаяс лыдын вуджисны ю мօдарас. Кыпօдчим кыр йылас, кодйим окопъяс. Выль местаас эз узьсьы, енэжын войбыд лօбалісны миян ПО-2 самолётъяс. Отделениеса командир юօртіс: тайօ ичօтик самолётъясыс пօ вօрօг вылօ шыблалօны гранатаяс. А нօшта шуис, мый ПО-2-ясыс тышкасьօны и танкъяскօд, мыйысь найօс торйօн оз радейтны вօрօглօн танкистъяс. Война бօрас нин, во кызь мысти, Ленинградса госпитальын волі сёрниօ нывбаба-лётчиккօд, коді татшօм самолётъяс вылас лօбалօма война чօж. Сійօ висьталіс: наступление водзын разведка

төдмалё, көні немечлөн чукөрмөмәһь танкъяс. Миян водзё пö сувтөдасны мог — сотны-жуглыны кызд позьё унджык машина. Самолётö сөвтасны кыксё сайё ичөтик кумулятивнөй бомба. Лэбам разведкаөн индөм местаөдз. Вөрөглысь танкъяссö аддзөм бөрын восьтан люк, и миян «козинъяс» асьныс гылалёны увлань. Кумулятивнөй бомбаыс кө веськалас танкё, пырас сы пыдөсөдз, быть сотас көрт вөвсö.

Неман ю пөлөн шылькнитчөмәһь ойдлана видзьяс, тані уна ты да вис. Васөдінтіыд танк оз мун. Асывнас миян артиллерия дыркодь гымөдіс немечөс. Куим батальон кыпөдчим атакаө, мунім сөмын 400 метр мында. Водзё немечлөн пулемётъяс потшины туйсö. Унакодь воштөмъяс лоины и немечьяслөн миномётъясысь. Быд сё квадратнөй метр вылас, гашкө, куим-нэль мина усьö. Вөрөглысь татшөм яра водзсасьөмсö Орша дорса косьяссянь эг нин аддзыв. Лои, дерт, бөрынтьчыны, кодыны окопъяс.

Мөд луннас миян пушкаяс дырджык лыйлісны немечлань. ИЛ-2 самолётъяс шыблалісны бомбаяс. Асывнас миян юр весьтö волісны вөрөглөн самолётъяс, шыбитісны неқымын бомба, но кор тыдовтчисны миян истребительяс, найö өдйö пышійсны. Атакаө өттшөтш кыпөдчис куим-нэль батальон, мунім 300—400 метр мында. Недыр кешлө миян наступление джөмдыліс. Сэки ИЛ-2 самолётъяс бара локтісны отсөг вылө. И выльысь кыпөдчим атакаө, нетшкысим водзё. Но тані менö ранитіс, пуляыс пырис шуйга бокö. Недыр мысти ме дінö локтіс санинструктор, 20–21 арөса ныв, тэрыба гартіс дойсö, та дырйи шуаліс: «Потерпи миленький, потерпи. Всё будет хорошо».

Өткымын йөз, кодъяс войнасö аддзылісны сөмын киноысь, быд омөльторсö шулывлөны война вылө ветлөм нывбабаяс йылысь. Ме дась быд татшөм ань водзас пидзөс вылө сувтны: уна салдат-офицерөс найö дорйисны, уна нывбаба-санинструктор пунктіс юрсö война дырйи.

Неман дорса косьясас вөліны и изьвасаяс. Кольөм нэмлөн 60-өд воясын больничаса өти палатаын куйлі ме П.Ф.Дуркин-көд, коді чужлөма-быдмылөма Изьва районса Гам грездын. Война кадö Пётр Фёдорович командуйтлөма ротаөн, вежлөма и батальонса ранитчөм командирөс. 1944 вося июльын, Гродно кар дорын, сылөн ротаыс пыжъясөн вуджөма Неман юсö, да, кызд шуласны, пиньнас и гыжнас сатшкысьөма мөдар берегас. Кор сылысь йөзсö вөрөг дзикөдз топөдөма-дзескөдөма ю бердас, командир корөма, медым на кузя лыйлісны миян өрудиеяс да миномётъяс. Юдорса муторсö ротаыс кутөма отсөг вотөдз. Фронт вылын повтөмлунысь Дуркинөс вөлі наградитөма кык Краснөй Знамя, кык Краснөй Звезда да мөд степеня Отечественнөй война орденъясөн, «За отвагу» медальөн. Гортас воис инвалидөн, война бөрас 22 во на оліс чужан муас.

Ижмаысь Полина Галай (нывдырся овыс Истомина) война кадас аслас ротакөд вуджлөма Березина да Неман юяс. Санинструкторлы повтөмлунсьыс сетөма «За отвагу» да «За боевые заслуги» медальяс. Войнаөдзыс тайö енбиа аныс вөлі колхоз-совхоз театрса артистөн, өдйö да бура лөсьöдаліс коми кыв вылын частушкаяс, ачыс жö и мичаа сьыліс.

Медсанбатын меным вөчисны операция. Хирургыс кывкөрталіс:

«Повезло тебе, солдат, позвоночник остался цел. Всё остальное врачи вылечат». Медсанбатсянь нуисны Вильнюсса госпитальё. Первой кадас палатаын бурдөдчим витөн. Нэм кезлө паметьö коли Пётр нима сержант, коді кык во велөдöма челядьöс начальнöй школаын. Войнас сійö сьöкыда лолаліс, луннас корліс менö ас дінас, дыр юасис Коми му, Печора ю, тундра, республикалөн экономика да культура йылысь. Зэв жаль, мый сылөн унджык юалöм вылө сэки эг сяммы тырвыйö да бура вочавидзны. Кутшöмкö асылö Пётрöс вевтисны прöстыняён, нуисны. Öти олöмаджык салдат корис менö гижны Пётрлөн чужан сиктас письмö (чужлöма Воронеж кар дорын). Кыдзи сямми, дерт, гижи. Письмöсö кырымалім палатаысь нельнан бурдысьыс, индiм и ассыным ним-вич-ов, адресъяс. Уна во мысти нин, Усть-Усаын уджалігөн, меным воис Пётрлөн дзoляджык воксяньыс письмö. Гижö вöлі, пöрысь мамлы пö зэв окота аддзöдлыны тэнö, медым висьталі сылөн пи йылысь. Но сэкся кадö кузь туйö петöм йылысь и сёрни эз вермы лоны. Гижи бура ыджыд письмö. А сэсся письмöасим вокыскöд уна во, ёрта-ёртлы лоим матысса йöзөн.

Муртса тöлысь и вöлі чорыд косьясын. Тайö каднас миян отделениеын ловйөн колёма гежöд морт... Госпитальын менö куйлөдісны куим тöлысь да кык лун. Кок вылө сувтöм бöрын уна кад коллялі библиотекаын. Öти бурдөдчысь велөдіс шахматасьны. Некымынысь палатаын ворсіс скрипкаён олöма нин музыкант. Ворсіс мичаа, быдторсö, тшöтш и «Прощание славянки». Та дырйи аслас синваыс петіс...



II

Война вылын тэнсьыд оз юавны, көні көсьян служитны да кодөн лоны. Госпиталь бöрын ме веськалі 1277 зенитно-артиллерийскöй полкö, көні вöліны 37 миллиметра автоматическöй пушкаяс. Индісны менö наблюдатель-дальномерщикөн Василий Православновлөн расчётö. Менам мог — ас кадö аддзыны вөрöгысь самолёт, юортны наводчикъяслы сылысь лэбан ылнасö.

Асыввыв Пруссияын миян наступление пансис 1945 вося январ 13 лунö. И нель тöлысь чöж сэнi мунісны чорыд косьяс. Дорйысьöм-водзсасьöм кезлө немеч вöлі бура лöсьöдчöма. Вöчалöма бетонысь да көртысь дотъяс, быдөнлөн выліас 3–5 метр кызта му. Ылысянь мылькъяс кодьöсь, пушка-пулемёт жергöдчöма. Гөгöрыс — танк сувтöдан кырöм. Сэсся пасьтала минаяс шöтöма, помтöм-дортöм траншеяяс кодйöма, сутшласысь сутугаяс нюзöдöма...

Асыывыв Пруссия—Германиялөн зэв нималана да тōдчана юкōн, татчō вужъясьōмаōсь озыр генералъяслөн, помещикъяслөн нэмōвōйся овмōсьясыс. Сэсянь тевтонъяс зыртчылісны Асыывылō («Дранг нах Остен»). Война воясас сэнī вōлі Гитлерлөн «Волчье логово» нима поз. Буретш танī миянлы паныд сувтїсны том нацистъясысь котыртōм фольксштурм батальонъяс.

Миян салдатъяслысь водзō мунōмсō єна падмōдісны вōрōглөн самолётъяс. Пушкаяса, пулемётъяса, реактивной снарядъяса да бомбаяса «Мессершмитт» да «Фокке-Вульф» истребительяс, «Юнкерс» да «Хейнкель» бомбардировщикъяс, «Хеншель» штурмовикъяс, отпырїō комын-ветымын кымын, лыйлісны да шыблалїсны бомбаяс водзō писькōдчысь миян частъяс былō. Видзōдлан вывлань, да быттō сьōд креста самолётъясыс вевттōмаōсь став енэжсō. Асывсянь да сёр рытōдз сынōдын муно єсь кось. Отїяс оэйōны да усьласьōны, мōдъяс тшынасьōны, энōвтōны тыш мунанїнсō.

Миян зенитной орудиеяс помся шковгōны-луйлōны вōрōглысь самолётъяссō. Инстенбург дорын Православновлөн пушкаыс отїс «Хейнкель» бомбардировщик. Прегель юсянь матын сылөн жō орудиеыс уськōдіс немечъяслысь ыджыд транспортной самолёт, кōні, вōлōмкō, лэбōны ыджыд чина офицеръяс. Тшōкыда вōрōглөн самолётъяс лыйлісны миян орудиеяс кузя, шыблалїсны бомбаяс. Февраль помланьыс реактивной снаряд усис миянсянь 6–8 метр сайō, кōрт торїйс виис первой наводчикōс. Лун мысти осколокъясысь кувсисны куим зенитчик.

Зенитной пушкалөн мōд наводчикыс тшōкыда нёрпалїс, сїйōс унаысь ме вежлывлї. Оти косьын вōрōглөн штурмовикыс кыкысь уськōдчыліс орудие былō, лыйліс миянōс. Ми первой наводчиккōд сетїм водзōс. Самолётыс заводитїс тшынавны, сэсся и энōвтїс кось мунанїнсō. Танī асьсō бура петкōдліс первой наводчик. Меным, дерт, сьōдз вōлі ылын на: эз тырмы ни тōдмлуной, ни сямōй...

Кызкō рытъявылыс сувтїм неыджыд ю дорō. Кык час воїōдз дежуритны уси меным. Одійō пемдіс. Кадысь кадō ракетаяс югдōдыштлōны му веркōссō. Дас оти час бōрас отар и мōдар боксянь кутїсны лыйсыны, пуляясыс веськалісны орудиелөн кōрт дорїōгас, сōмын бикиньяс сявкїйсны. Водї орудиелөн водз кōлеса дорас да автоматысь лэдзи кузь очередь, вежи местаōс да водзō лыйлі. Сувтыштлōмōн шыбитї кык граната. Отсōг былō локтїсны ёртъясōй. Косьыс кыссис час джынїысь этшаджык. Югдōм бōрас тыш мунан местасыс аддзим 15–17 арōса немечлысь шой, неуна водзынджык — нōшта оти шой, тыдалō, фольксштурмса том нацистъяс уськōдчылōмаōсь миян былō.

Коркō оти немеч тōкōтьō эз мōдōд менō мōдаръягыдас. Рытъявылыс сувтїм кутшōмкō хутор дорō. Орудиеса командир тшōктїс меным да ещō оти салдатлы гōгōрбок видзōдлыны, абу-ō хуторас немечъяс. Восьлала ёртысь неуна водзынджык, кийн автомат. Гараж сяма стрōйба сайысь котōрōн петїс кузь тушаа немеч, менō аддзōм бōрын чуймыштіс быттō да кутїс кыпōдны пельпом вылас фауст-патрон. Ме здук-мōдōн водзджык слōйми лыйны. Немечыс удитїс жō лыйны, но гранатаыс миянысь бокитї лэзис. Взводса командир ошкыштіс менō сюсьлунысь, висьталїс, мый фауст-патроныслөн гранатаыс уна лектор вермис вōчны...

Гумбиннен карыс эз вöв ёна жугласьöма. Ми пыралім джуджыд потшöс сайын сулалысь керкаö. Стенъясыс 70–80 сантиметр кызтайöсь. Озырлунсö татчö быттьö став мирсьыс вайöмаöсь. Öти ыджыд-паськыд жырйын уна картина, быдса выставка артмас. Мöд жырйын важ книга да альбом тыра шкапъяс. Альбомъясас — важся эзысь да ыргөн сьöм. Öти салдат босьтис мыйкö мында көрт сьöмсö, шуис, мый ловъя кö лоас, тайö бур козин инвалид-вокыслы. Меным сьöлöм вылö воисны стенса ковёр вылö öшлöм важ ружьеяс, пистолетьяс, пашкаяс. Орудие-са командирлөн кывъяс серти, тайö керкаыс карса учительлөн. Пыралім и мукöд жыръясö. Ме нинöм эг босьт, Германияыс гортö ньöти пöсылка эг мöдöдлы ни, кöть позянлуныс та могысь вöлі. Менам мам тшöкыда шулывліс: йöз добранад пö водзö он мун, сöмын льякөсьтан ассьыд нимтö.

Кымын ёнджык матысмим Кенигсберглань, сымын унджык миян самолёт кутіс лэбавны Пруссиялөн сынöдын. Овлö, 30–50 бомбардировщик öттшöтш төвзёны вөрöг карлань. Шочмисны миян да немечлөн истребительяс костын косяс. Зенитчикъяслөн «уджыс» тöдчымөн чиніс...

Мунім бура дыр, сэсся сувтім косінö, кодйим окопъяс. Окота лои аддзöдчывны орчча взводса том салдатъяскöд. Найö сулалісны миянсянь 300 метрысь неуна ылынджык. Орудиеса командир лэдзис ветлыны другъяс дінö. Тöдім, орччөн служитысьяс новлöдлöны аскöдныс книгаяс, шахмат. Книгааясö окотапырысь сетлісны лыддыны. На ордын пукалім час джын мында. Сергей нима зон петкöдліс армейскöй газетъяс, көні йöзöдöмаöсь сылысь кывбуръяс. Кор лөнъыштіс да дугдісны потласьны немечлөн минаяс, лöсьöдчи мунны аслам орудие дорö. Воськов-мöд кымын и вöчи, видзöда да, мыш сайын бара кутісны гылавны минаяс. И колö жö тадзи лоны: öти мина уси стöч сэтчö, көні ме неважөн на сулалі. Тадзи дзик виччысьтöг кувсисны том салдатъяс. Пемдыштöм бöрас найöс гуалісны. Ме дыр на видзи ас ордын Тютчевлысь вöсньыдик небöг, кодöс зонъясыс сетлісны лыддыны...

Кенигсберг вöсна тышыс муніс нель лун. «Сöветскöй Союз Великöй Отечественнöй война воясö» книгаысь лыдди, мый карсö лыйлісны вит тысяча орудиеысь, 2500 самолёт шыблалісны бомбаяс. Быттьö став ловъя ловсö бырöдісны. Карас лун и вой дөввидзис тшын да бус. И со апрель 9 лунö Кенигсберг лои босьтöма. Сійö жö рытнас ми пырим кар пельöсас да овмöдчим көрт туй станциялөн вагонъясын.

Кар шöрас дзонь керкаыс уна на кольöма. Коркö öтчид тöдмаси томиник нывбабакöд, коді войнаöдзыс велöдлöма Смоленск дорса öти сиктса школаын. Вайöдöмаöсь сійöс Кенигсбергас 1942 воын, первойсö уджалöма нянькаөн, а сэсся воспитательлөн озыр немечлөн семьяын. Бура гөгөрвоö немеч кыв. Сійö тöдмöдіс менö карыслөн историяөн, висьталіс философ Кант, öткымын мукöд учёнöй да гижысь йылысь. Рочөн и немеч кылөн лыддис Генрих Гейнелысь кывбуръяс. А вежон кык мысти нывбатö босьтисны уджавны карса комендатураö переводчикöн.

Тані и суис миянöс Победа лун. Быдөн сэки радліс. Спиртсö канистраөн вайлісны. Салдатъяс пуисны порсь да вöв яй. Сынöдö шковгисны-луйлісны, сьылісны-йöктісны...

* * *

Июль төлөсү шөрас ассыным зенитной орудиесө да автомашинасө сувтөдөм көрт туй платформа ыло. Командирьяс, дерт, эз висьтавы, кытчо мөдөдчам, но мунёгон нин салдатьяс төд-малөмаось: ставнымос нуоны Дальной Востокө.

Платформа ылас лөсөдөм ичөтик палатка, көнө позис шойччыштны-узыштны. Менам вөли Н.А.Некрасовлөн гижөдьяся нейджыд книга, дыр мунёгад уна кывбур велөдө. Ёнджыка-сө, дерт, дзорги-видзөдө туй бокын кольыс юяс да тыяс, гөраяс да степьяс, помтөма шылыкнитчөм вөр ыло. Нимкодьяси: со, мися, кутшөм паськыд-дортөм мяян странаным, мыйта сәни озырлуныс. Сөмын тай ог кужой бура овнысө...

1945 вося август 8 лунө СССР панис Япониялы паныд война. Мяян зенитно-артиллерийской полкным сэки пырис Первой Дальневосточной фронтса Первой Краснознамённой армияө, нуөдөс Япониялөн Квантунской армияса часьтьяскөд кось. Муним ми Маньчжуриятө, сәни помся гөраяс, мылыкьяс, сертөсьяс, вөрьяс да нюрьяс. Первой кык-куим луннас наступление мунис ньөжйө, японечьяс ёна водзсасисны, весиг корсюрө зырлисны мяянөс. Но некимын чорыд кось бөрын Квантунской армия быттө вынтөммис, өдйө кутис бөрынтычыны. Шоча петкөдчылисны и японской самолөтьяс, а лөбалисны кө, то ёна ылитө, мяян зенитной пушкаяс сэтшөм ылнасьыс найөс эз вермыны судзөдны. Зато мяян самолөтьяс, торйөн нин штурмовикьяс да истребительяс, тшөкыда петкөдчылисны тыш мунанинас. Төдчис, мый өнө абу нин 1941 во...

Танө, асывылын воюитөгөн, ми ёнджыкасө паныдасьлим японияса автоматчикьяскөд да пулемётчикьяскөд. Пемдыштөм бөрын найө гусьон уськөдчывлисны орудиеяс ыло, лыйлисны автоматьясыс. Дорйысим, дерт, быд ногыс, гранатаясөн тшөтш и. Туйын японечьяс сопкаясьянь лыйлисны мяян машинаяс да орудиеяс кузя, а кор вочавидзлим, пыр жө кытчөкө усьысьлисны. Тшөкыда отсөг ыло волим и асланым пехоталы. Öти ыджыд дотө пырөмаось вөли японской смертникьяс да потшөмаось пехоталы туйсө, матө некодөс оз лэдзны. Мяян зенитной орудиеяс амбразураясас лыйлисны фугасной да зажигательной снарядьясөн, лыйлисны сэтчөдз, кытчөдз эз кут петны сэтыс сьод тшын.

Муданьцзян (Маньчжуриялөн вөвлөм юркар) дорө матыстчигөн синмө шыбитчис унакодь сотчөм танк, самоходной орудие. Öти капитан висьтавлис, мый тайө «уджыс» японеч-смертникьяслөн. Муданьцзян бердын пө смертникыс зэв уна, гашкө, быдса бригада.

Ми сәсся Муданьцзян дорыс водзө эг мунөй, тыдалө, коланлуныс эз вөв. Война помасьтөдзыс тайө кар бердас и олим. Корсюрө петавлим карас. Рочыс сәни уна, окотапырыс пырөны сёрниө. Налөн асланыс театр, рестораньяс, газет. Öти салдаткөд кежалим татчөс лавкаө, вузасысьыс олома мужичөй, сылөн нейджыд магазин, пиыслөн — ворсанторьяс вөчан мастерской. Менсьым ёна юасис, кытыс ачым. Висьталө, мый вөвлөм Архангельск губернияса Печора уездьс. Вузасысьыс козьналис сёйыс вөчөм посныдык китайской салдатикьясөс. И збыль, найө зэв мичаось вөлины.

Жаль, дерт, мый кольөм война йывсьыс этшатор колис менам паметын...

III

Кадыс вочасөн ылыстө Великой Отечественной войнасө, пөр-тө историяё. Но война йывсьыс паметъыс век ловъя, сійö вынаджык кадсьыс, олö йöз вежöрын.

Ме — вöвлöм фронтöвик. Мый көть эн шу, а ме кодь салдатыс таладор югыдас колис этша нин. Ме вöчи ставсö, мый вылö тырмис сямöй да вынöй. Радлуныс коли öти — казътывны фронтöвöй туйяссö, бөрö кольöмасö. И быть казътыла чужан сиктöс, бать-мамöс, чойясöс, усьöм да кулöм ёртъясöс.



Чужи ме 1926 вося апрель 26 лунö Печора юбокса Кипиево сиктын. Армияс босьтисны 1942 вося декабр төлысьын, артмö, война вылас веськалі öттшöтшъяяс серти матö воөн водзджык. Таысь меным абу забеднö, мöдарö, сьölöмöс шонтö, мый вөрöгöс вермöмас эм и менам ичöтик пай.

Ме вöлі радöвöй салдатөн, война помас нин лои сержантөн. Быд салдат тыш дырйи пöртö олöмö командирлысь индöд, та дырйи зільö кольны ловйөн. Не сöмын командиръяс, но и пуляяс да мина-снаряд торъяс велöдисны пыдöджык кодйысьны-пырны муас, тэрыба кыскасьны, лоны збойөн. Мортлөн олöмыс öти, и көть мый эн шуöй, быдөнлы на окота аддзыны югыд аскисö...

Ас серти тöда: война вылын помтöм-дортöм сьöкылдун усьö салдатлөн пельпом вылö. Траншеяд няйт, лым сылігас ва чукöрмö, касканад ректан, а видзöдан да, бара нин пыдöсыс оз тыдав. Йиа ваас сулалöмысь кокъясöй унаысь пыктавлісны.

Вөрöг лöсьöдчö наступайтны. Снаряд-минаяс потласöны окоп-траншея водзас и бöрас. Муыс сыркйысьö кок улад. Татшöм здукъясас унаысь казътыштлан Енмöс, думсьыд коран — господь-Енмöй, видз вай менö. Коркö олöма салдат меным шуліс, окоп-траншеяын Енлы эскытöм мортыс пö оз овлы.

Война кадö пехотатö гежöда пуксьöдлісны машинаяс вылö. Калинин (öнія Тверь) карсянь аслам полккöд подöн муні Восточной Пруссия дорöдз. Войнас восьлалігөн тшöкыда вугыртлан. Коркö унйылысь петсьöма туй шöрас да муртса эг веськав машина улö. Машинаын пукалысьяс пиысь öти восьтыліс öдзöссö, петкöдліс кулаксö да лёкысь матькыштіс.

Белоруссияын 1944 вося июль шöрас вөрöг вывті öдйö бöрынтьчис. Нель сутки чöж 30–35 километрöн мунам вöлі быд лун. Миян ротаысь некымын салдат дзикöдз вынтöммылісны, коймöд лунас найöс вайöдісны машинаөн. Менам эбöсöй бырліс жö, но кутшöмкö ногөн кутчыси.

Война туйыд эз вöv быдöнлөн öткодь. Ог нин шу генералтьяс йылысь. Найö йизьöм траншеяö некор эз пыравлыны. Дерт, война вылад шогыд орччөн ветлöдлö. Наступление дырйи, дорйысигөн усьö-ранитчö уна салдат. Ме ас синмөн аддзывлі, кызди сотчöны танкъяс, накöд тшöтш и танкистьяс, аддзылі тшынасьысь да муö усьысь самолётъяс...

Война дырйи эг вöv геройөн, но и трусөн менö некод эз лыддьыв. Белоруссияысь да Литваысь вөрöгöс вöтлігөн квайтысь мунлі атакаö, орччөн восьлалі ме кодь жö салдатъяскöд. И некор эг сайöдчыв ёртлөн мыш сайö. Сöмын сизимöдысь кыпöдчигас немечлөн пуляыс кокыштіс менö. А öд уналөн медводдза атака дырйи на помасьліс не сöмын войнаыс, но и став олöмысь...

Наступлениеö мунігөн первой воськовъясыс медся сьöкыдöсь, а сэсся быттö недыр кезлö вунöдлан снаряжъяслысь gryмакылöмсö, пуляяслысь шутьялöмсö, орччөн котöртысь ёртъясылысь усьöмсö. Зілян пыр водзö и водзö восьлавны. Фронт вылын морт олöм ёна донтöммö: усис снаряд, сярöбтіс пулемёт, и мортыд мöдаръягудас, быттö абу и чужлöма. Усьöм салдат вöсна синвасö некод оз кысьт, бур, вермасны кö гуавны лючки.

Война вылад вöлі тшöтш уна лёкыс, мисьтöмыс, морттö повзёдланаыс. Белоруссияын, вөрöгöс венігөн нин, асланыс окопъяс дорын куим немеч кыпöдісны кинысö. Но пленö босьтöм пыдди миян öти салдат син водзаным куимнаннысö лыйліс автоматысь, та дырйи горзіс: это вам, гады, за моих сестёр и мать, за сожжённую деревню...

Дерт, и бурыс вöлі, и эз этша. Миян салдатъяс вөрöгöс бырöдöм ради эз жалитны ассыныс вын, весиг олöмнысö. Найö вöліны збылысь геройсөн. Йöзыс отсасисны öта-мöдлы, юксисны медбöръянас. Ми эским асланым страналы, правительство, Коммунистической партиялы. Мöд ног эз вермы и лоны.

Кор сёрни пансьылö лёк вөрöгöс вермöм йылысь, медводз казътылöны Сталинöс, маршалъясöс да генералъясöс. Кыв шутöг, Победа шедöдöмын налөн пайыс зэв ыджыд. Но пыр-ö колана ногөн тайö чина йöзыс тöждысисны асланыс салдатъяс вöсна? Ставсö-ö артыштісны косяяссö дасьтöм-панöм водзвылын? Шуöма кö, лоö шуöма нин, но öткымын маршал-генералыс салдатъяс вöсна тöждысисны омöля. Та йылысь висьталöны и лыдпасъяс: вөрöглысь öти фрицöс либö гансöс бырöдöм могысь миян нель салдат сетісны ассыныс олöмсö. Усьöмаыс лыдтöм-тшöттöм...

Вывті жаль, мый чорыд косяясын уна усис-вошис зонуловыс,

кодъяс олёмсö на эз аддзывны. Кипиевоысь пуктісны юрнысö вит вок, Каневъяс. Керканыс налөн сулаліс бать керкакöд орччөн, медся томыс, Фёдор, тшöкыда пыравліс мянö. Сійö нель класс и помаліс (войнаöдзыс мян сиктын сöмын начальнöй школа вöлі), но дзöлясянь мичаа рисуйтчис. Коркö берег дорын менам тетрадьö серпасаліс Печора юсö, баржаясөн катысь парохосö. Видзöдан да, быттö юыс гыалö. Паметсьö Енмыс вывті бурös сетлöма. Радейтіс серпасавны и нывъяслысь чужомъяссö. Менсым юалас: тöдін-ö тайö нывкасö? Кодсюрöс тöдмавлі. Художествоа училищеын велöдчöм пыдди зонка войнаöдзыс кык во новлöдліс вöлөн пошта.

Менам воча вок Николай Терентьев (чужліс Брыкаланскын) Мокчойса педучилищеын велöдчигөн редактируйтіс ки помысь лэдзан петас. Сылысь кывбуръяссö йöзöдлісны «Ордым» да «Ударник» журналъяс. Не сöмын мичаа гудöкасис, но и пондыліс гижны нотаяс. И кымын татшöм енбиа том зон усис чорыд косьясын!

Война вылысь локті 1947 воын. Морöсын коймöд степеня Слава орден, «За отвагу» да мукöд медаль. Победалы 40 во тыригкежлö сетісны первой степеня Отечественной войнa орден. Но медся ыджыд награданас лыддя, мый коли ловйөн, ки-кок дзоньöсь, верма овны тыр олёмөн. Оз ков быд здук виччысьны кодлыськö индöд, ставыс ас саяд, сöмын эн дышöдчы...

IV

Война бöрас менам олёмöй тыри уджөн да тöдöмлун перйöм-босьтöмөн. Газетö локтöдз Изьва вожын вöлі кочегарён, связьса монтёрён да плановик-экономистён, сельпоса председательöс вежысьён. 1952 воын корисны уджавны районнöй газетö кывкутысь секретарён. Уджысь ордчытöг нель во дорвыв велöдчи рытъя школаын, сэсся босьті тöдöмлунъяс партийнöй школаын. Школасö помалöм бöрын индісны удж вылö «Коми колхозник» («Югыд туй») газетö, куим во мысти лои сэні пропаганда отделөн веськöдлысьён. Сэсся матö кызь во зіли Изьва районын газетса главнöй редакторён. Заочнöя помалі Коми пединститутын историческöй факультет. Пенсия вылö петöм бöрын дас кык во веськöдлі Изьва вожса краеведческöй музейөн, сы мында кад жö — ветеранъяслөн районса сöветөн. Кольöм нэмлөн квай-тымынöд-сизимдасöд воясö татшöм сöветыс уджаліс комсомол бердын да пуктіс ыджыд пай том йöзös быдтöм-воспитайтöмö.

Газетса редакторён да музейын уджалігөн унаысь лои волыны районса сикт-грездö, аддзысьлыны школаясса велöдчысьяскöд, гражданскöй да Великöй Отечественной войнаяс вылö ветлысьяскöд, колхоз-совхозса веськöдлысьяскöд, мукöд йöзкöд. Архивъясын тöдмаси лыдтöм-тшöттöм кабалаөн. Ставыс тайö сетіс позянлун гижны да лэдзны изьваса сиктъяслөн важся да öнiя олём йылысь куим книга. Победалы 70 во тыригкежлö петас нöшта öти небöг, кытчö чукöртöма Изьваса зіль войтыр йылысь очеркъяс, пасйöма сэтшöм йöзös, кодъяс пуктісны уна сям-вын районлысь экономика да культура кыпöдöм-сöвмöдöмö.

Великöй Отечественной войнаса войтыр йылысь менам гижöдъяс петалісны тшöтш Коми Республикаса Паметь книгаын.

Изьва район лосьодіс жё ассъыс татшом небогсё. Первой юконас йёзодёма усъом, косъын вошом да госпитальясъын кулом фронтёвикъяслыс нимъяссё, а сидзжё налыс, кодъяс ловйон воисны война вылыс. Мёд юконас — фронтёвикъяс да тылын уджалысъяс йылыс очеркъяс да налон казътыломъяс. Коймёд юконсё сиома война кадся челядылы, на олёмлы да уджлы. Быд татшом небогын эмось и менам очеркъяс. Гижодъяссё дасътём да фотоснимокъяссё чукортём кузя ыджыд удж бергодісны-вочисны районлön музейса уджалысъяс.

Фронтёвикъяслыс паметъсё, книга-газетъясыс өтдор, видзёны тшотш памятникъяс да обелискъяс, а сидзжё уличаяс да школаяс, кодъяслы сетёма геройяслыс нимъяссё. Шуам, Ижмаыс Ф.И.Канев участвуйтис 1941 во ноябр 7 лунся парадын. Кык лун мысти сылön пушкаыс Москва дорса косъясъын öзтіс-сотіс вөрöглыс танк. Повтöмлунсыс морттö пасйисны «За отвагу» медальон. Усис Ф.И.Канев Украинаос мездігөн. Ижмаын, райисполкомлön вöвлöм зданиеас, коні войнаөдз уджавліс Фёдор Иванович, öшөдёма мемориальной пöв. Татшом жö пöв позьö аддзыны керка стенсыс, коні чужис да быдмис В.И.Филиппов. Война дырйиыс сійö командуйтис мотоциклета ротаон, а сесся и батальонон. Война бöрас Василий Ионикиевич помалис бронетанковой войскалыс академия, юрнуөдіс дивизияон, вöлі армияса командующойос вежысöн, военной советникон. Генерал-лейтенант В.И.Филиппов гортас волігөн кыкыс пыравліс Изьваса музейö, казътыштіс ассъыс томлунсö, ёртъяссö, фронтёвой туйсö, унатор юасис. Висьталіс и танкёвой бригадалон 1943 вося тöлын вөрöг тылö пыралöм йылыс, коні вöлі и Филипповлön ротаыс. «Кык вежон сайö дугдывтöг нуөдім косъяс,— казътыліс генерал.— Вөрöглыс бырөдім уна танк, орудие да салдатос. Вöліны, дерт, и асланым воштöмъяс. Рейдыс петкөдліс: миян салдатъяс вермöны и кужöны нöйтны пеж вөрöгос». Война бöрас нин снимайтисны уна рöма «Корпус Шубникова» кинофильм. Подулас, генераллön кывъяс серти, вöлі пуктöма танкёвой бригадалыс буретш тайö рейдсö.

2014 вося гожöмын Изьва ю берегсянь неылö пуктісны зэв ыджыд из. Буретш татчö сувтöдасны Изьва районса фронтёвикъяслы памятник, налы, кодъяс война кадö тышкасисны Карельской фронтлön көр транспорта да көра-лызя батальонъясын.

Гам сиктын быдмöны мича козъяс да пожöмъяс. Пуыс буретш сы мында, сиктсыс мыйта йöз сетісны олөмсö пеж вөрöгкөд тышын. Пуктісны пуяссö школаса велөдчысъяс да учительяс. Тадзи жö вочисны Бакурын. Садсö лосьодісны сиктса нывбабаяс А.М.Семяшкиналон веськөдлөм улын. Пуяссö мичаа потшис Е.Е.Артеев, коді колхоз-совхоз дырйи веськөдліс татчос бригадаон. Водзмöстчис и Кипиевоыс шөр школаса вöвлöм директор Н.Т.Братенков, учительяс да велөдчысъяс отсöгөн öтвылыс сувтөдісны герой-земляк А.Е.Чупровлы обелиск да садитісны пуяс.

Меным окота висътавны бур кывъяс Сизябскыс Л.С.Чупровалы. Сійö аслас пöдругаяс отсöгөн гижалис нимъяссö да чукөртіс казътыломъяс 900 сайö мортлыс, кодъяс война кадас уджалісны сиктса колхозын, сельпоын, мукөдлаын. Лидия Семёновна

чукортис сьом да Ухтаын вöчöдис обелиск, кытчö пасйöма война бöрас кулöм фронтöвикъяслысь нимъяссö. Обелисксö сувтöдисны сиктса шойна вылö...

* * *

Биджыд война вылысь локтис уна вермытöм морт, инвалид. Вöвлöм фронтöвикъяслöн эз вöв бур оланін, удж, налы эз тырмыны тöдöмлунъяс, сёян-юан, колана лекарство. Та вöсна унаöн водз мунисны олöмсьыс, торйöн нин войнабöрса первой воясас.

И век жö фронтöвикъяслöн воём бöрын Изьва вожын сиктса олöмыс кутис тöдчымöн вежсьыны. Сиктъясын босьтчисны стрö-итчыны, воысь-во содис скöтлöн юр лыдыс, вочасöн бурмисны туйяс. Видз-му овмöс сöвмöдöмö торйöн нин ыджыд пай пуктисны Сизябскса, Дюрса да Кипиеваса колхозъясысь председателъяс: К.К.Чупров, Я.А.Ануфриев, С.И.Терентьев. Йöв-яй вöчöмын ыджыд вермöмъясысь «Ижемскöй» совхозлы 1976 воын (пырисны сэтчö Сизябскса, Бакурса, Мокчойса колхозъяс) вöли сетöма КПСС ЦК-лысь, СССР-са Министръяс Сöветлысь, ВЦСПС-лысь да ВЛКСМ ЦК-лысь переходящöй Гöрд знамя. 1977 воын бур уджысь татшöм знамясö сетисны и дзоньнас Изьва районлы.

Вöвлöм фронтöвик А.Н.Артеев кызь во сайö уджаліс бульдозёр вылын, вöчис-лöсьöдис вөр кыскалан туйяс. Водзмöстчысь фронтöвикöс наградитöма «Октябрьская революция» да «Знак Почёта» орденъясöн. Вöрын жö зіля уджаліс вöвлöм фронтöвöй разведчик В.И.Филиппов.

Бакурса школа, кодöн уна во веськöдліс А.П.Филиппов, быдтис спорт кузя дас мастерöс. Школаыс нималіс аслас подсобнöй овмöсöн, челядьлöн хорöн. Ижмаысь И.Ф.Ануфриев да Мокчойысь Ф.З.Хозяинов вöліны эз сöмын бур учителясöн, а весиг восьтисны-лöсьöдисны музейяс.

Война вылö ветлысьяс тöдчана пай пуктисны культура сöвмöдöмö. Олöма йöз помнитöны на паськыд экрана уна рöма фильм, кодöс вöли сиöма сиктса художественнöй самодеятельностылы. Сэні петкöдлöма вöвлöм фронтöвик Г.В.Семяшкинöс, коді уна во веськöдліс Ижмаса ансамбльöн. Тайö жö котырас сьыліс А.Е.Истомин. Сизябскын пыр на казтылöны войнаса инвалид Т.С.Чупровöс, коді дыр кад веськöдліс сиктса клубöн. Сизябскысь вöвлöм разведчик М.И.Канев, Мокчойысь коркöя танкист М.Ф.Витязев асланыс сиктъясын кызь воысь дырджык веськöдлісны сельсöветъясöн, став сямсö да вынсö сетисны экономика да культура сöвмöдöмлы. Кыкнаннысö пасйöма сиктса почётнöй гражданин нимъясöн. Ижмаысь М.Ф.Семяшкинлысь вөрöгöн лыйöм-розьöдöм комсомольскöй билетсö öні на видзöны Изьва районса музейын. Ачыс сійö уна во веськöдліс леспрохозлöн орсöн.

Ижмаысь вöвлöм танкист П.А.Семяшкин прöст кадö радейтис рисуйтчыны. Сылысь «Мам» серпассö вылö донъялісны Москва-са художникъяс. Ижмаысь К.Г.Бабинов, А.И.Филиппов, А.Т.Хозяинов уна вын пуктисны том йöзöс велöдöмö-воспитайтöмö.

Кызди аддам, война пыр мунöм войтыр и мирнöй кадö бур боксянь петкöдлісны асьнысö.

* * *

Вылö донъялісны и менсьым войнабörся уджös, сетісны Коми Республикаса заслуженной уджалысь ним, ветеранлысь, Изьва районса да Ижма сиктса почёт олысьлысь нимъяс. Республикаса ветеранъяс совет президиумлön вöзйом серти пасйисны «Эзысь звезда-öтувъя признайтöм» гражданской орденön. 1978 воын ме лои журналистъяслön Виктор Савин нима премия лауреатön.

Кувтöдз пыр на окота вöчны мыйкö бурös, тöдчанаös да югыдös.



Снимокъяс вылын:

1. *Никон Кондратьевич Хатанзейский Анна правнучкаыскöд.*
2. *1944 во, Вильнюс, госпиталь бöрын.*
3. *Победа лунö Сыктывкарын.*
4. *«Войвыв кодзув» редакцияса уджалысьяс Никон Кондратьевич ордын гортас.*

Снимокъясыс Н.К.Хатанзейскийлön гортса архивысь.

❖ ❖ ❖

Мемориальной пөв вылысь ним

Печать керкалөн вылыс судтаясö каян послөн плöщадка вылын стенас крепитöма мичаа вöчöм мемориальной пөв. Зарнийон дзирдалысь пөв вылас чукъя шыпасъясөн гижöма Коми муывса дас кык журналистлысь, кодъяс ловнысö пуктисны Рöдинанымöс фашистъясысь дорйöмын, ним-вич-овсö:



*Габов Иван Николаевич,
Горчаков Дмитрий Семёнович,
Елькин Василий Иванович,
Ермолин Георгий Николаевич,
Зезегов Дмитрий Ильич,
Зюзов Александр Александрович,
Ильчуков Модест Иванович,
Муравьёв Иван Афанасьевич,
Размыслов Ананий Прокопьевич,
Туркин Василий Герасимович,
Ульянов Иван Егорович,
Пельмегов Александр Феофилович.*

Мöдöд мортыс сэнi — менам бать.

Корисны висътасыштны сылөн олöм да удж йывсыс, кызди да кöнi пуктис ассыс олöмсö. Дерт, жаль, вежөрö этшатор мый колис, торъя нин сылөн армияын службаыс. Но мый тöд вылö воас, висътала.

Первой категория запарса командирöс призывайтисны 1939 вося сентябр медводдза лунъясö, кор фашистскöй Германия уськöдчис Польша вылö да заводитчис Мöд мирöвöй война. Меным сэк вöли сöмын дас кык арöс...

Бать-мамöй кыкнанныс вöлины мича статьясь. Батьöй — шөркодъ тушаа ён мыгöра мужичöй, томдырсянныс тöдлiс сьöкыд крестьянскöй удж. Пашкыртчысь сьöд юрсиа плеш йылас вöли гартчыштöм чуб, а плеш öтар-мöдарас да балябöжланяс югъялис кушин.

Чайта, колö висъталыштны и сы йылысь, кызди батьöй веськалис журналисталан удж вылас. Тайöс ме тöдмалi коми журналист Пунегов Николайсянь. Кызкö республиканскöй библиотекаын ме дiнö матыстчис олöма нин морт да юалис, абу-ö

ме Горчаков Дмитрий Семёновичлөн пи. Тодмасим, и сійо висьталіс, мый 1938 воын Сыктывдінса редакцияын отлаын уджавлөма менам батькөд. Висьталіс, мый батый томдырийиис уджавлөма избачөн, милицияын, том йөзлөн общественной организациисын, и сійөс кызди абу веськодь сяма мортөс, водзмөстчысь рабселькорөс казялөма Нёбдінса Виттор. Найо тодмасьомабсь, да буретш сійо, Виктор Савин, ышөдөма батыс заводитны



уджавны газетын да вөзйөма ыстывны Кардорө, сэкся Севернөй крайлөн шөр карө, курсьяс вылө. Та йылысь да Кардорас велөдчөм йылысь Н.Пунегов гаралө и «Войвыв кодзув» журналын 1980 воо Савин йылысь петалөм гижөдын. Курсьяс бөрас батыр кад уджалөма «Вөрлэдзысь» газетын, а 1935 воын сійөс мөдөдөны главнөй редакторөн Мылдинса газетө.

Мылдинса олөмысь меным бура помнитсьө некымын вөвлөмтор.

Томдырийиис баты вөлөма мастер гудөкасьысөн, избачнад уджалігөн ёна том йөзтө гажөдлөма. И кор ме помалі первой класс, батылы окота лөома, мед эськө тшөтш велөдчи гудөкасьны. Войнаөдзыд баянтө судзөдны да ньөбны вөлі зэв сьөкыд. Но баты кызкө кужөма. Буракө, Кардорын командировкаас вөлігөн и ньөбөма. Кыпид руа баты-мам пуксьөдісны менө улөс вылө, пуктісны пидзөс вылө сьөкыдсьыс-сьөкыд, гашкө, дзонь пудъя, баян, сайсьыс муртса юрөй и тыдыштіс: «Велөдчы, Геня!» Көсья паськөдны мекъяссө, а вынөй оз тырмы. Баяныс выль, мекъясыс зэлыдөсь. Чуньясөн личкала кизьяссө, но паськөдны ог вермы. Мекъяссө небзьөдөм могысь баты ачыс босьтліс баянсө, мыйкө тай тілис жө-а. Но мед пуксьыны мекөд орччөн да велөдны — кадыс сылөн эз вөв. Мылдинын баянистыд эз жө вөв, а гудөкасьысыяслы гожся страда кадө некор вөлі ноксьыны зырымбедькөд. Баянөн велөдчөм меным эз кажитчы да и эз вынъяс серти вөв: ывла вылад ас коддьөмыдкөд ризъявны гажаджык. Баты эновтчис: ладнө пө, быдмыштас да, гашкө, кутас велөдчыны.

Коли нөшта кык во, батыс вуджөдісны Вильгортса газетө. Бара босьтчыліс ышөдны велөдчыны баян вылад, а меным мустөм, киө весиг ог босьтлы. Бурджык ёртъяскөд вильшасьны-ворсны либө корсюрө колхозса бригадир-конюкъяс сетлісны пуксьыны вөв вылө да агсасьны либө турун юръяс кыскавны. И коркө 1938 воо баянтө баты вузаліс. Но баяннас ме выльысь паныдаси сизим во мысти, чужис интерес да вөлисти мөді тілөдчыны. А сэсся ышмывлі да весиг лөсьөдлі шыладсө некымын сыланкывлы.

Мылдинын олөгөн мянөс суліс ыджыд шөг. Баты вөлі командировкаын, и кодкө уджалысьяс письыс висьталөма мамы, и

мый звонитомаось телефон пыр да юрттомаось, кольом лунъясь по Покча сикт дорын сёр рытнас откымын морт куттомаось вуджны Печора юсь. Но друг кыптома лёк тов ныр да путкыльтома пыжсь, и ставныс, кодъяс сэтон волтомаось, абу вермотомаось петны васыс да войтомаось. Мам ёна майшасис-бёрдис, и ми дзояджык Геля воккод сы динё ляскысьомон зэв дыр да шога лимзалим. Лун-мод шогалим-бёрдим, но сэсся кывсис, газетчик Горчаков по ылөдз кылалёма, но век жё петома, локтома сиктас. Кор батё воис гортё, ми бара на поттодз бёрдим, но сэк ним-кодьюйла нин.

Казьтивсьё, кызди Мылдинын олигон на батё лыддис Николай Островскийлысь «Кызди калитчис сталь» комиодом роман, да кымынкё эпизод, челядьдырсяясьё на, лыддис и меным, а сэсся сёллом вылас вооманас юксис и мамкод. А недыр мысти нин мамкод сёрнитисны да шогалисны Островскийлон кувсьом вёсна. Налон шогалом выло видзөдигон ме босьтли книгасё да воддза юконъясьё лыдди зэв ыджыд интересон, а во куим-нэль мысти лыдди и дзоньнас.

Лысьта висьтавыны, мый обича-мортсям сертиыс батёй вөлі повтом да бур сёллома мортон. Комынод воясь, кор мунис коллективизация, сиктъясад вөлі зэв шог, повзёдлана кад. Кулакъяс виавлисны сиктса активистъясьёс да коммунистъясьёс, кодъяс ышөдлисны крестьянаос котыртчыны колхозъясьё, озтылисны да сотлисны конюшняяс да скот видзан картаяс. А батёй редакцияс вошласис ёна сёр рытодз. Мукөддырйиыс эг и адзывлы, кор воывлис гортё, а мам тшөкыда сийос коритлис да пинявлис гортё вывти сёр воомысь, весиг бёрдывлис. Но батё өлөдлис да бурөдлис мамос, и колис кё, удж вылас сёрмөдчывлис дырөдз.

Вөчли кё ме кутшөмкё лектор, пакөститчи, велөдис менё эз тасмаон-ньорйон, а бур кывйон. Но кор ышмывли да сөйигон босьтчыли лыддысьны (книгаыслон зэв интересной местасыс орөдчыныс ог вөлі вермы), сәки батёй плешкё паньнас кучкылис, вөчлис меным, кызди ачыс шулис, «таразан», а книгаос мырддывлис, дзеблис да сетлис сөмын мод луннас. Но отчид сюрлис и тасмаон. Тайос висьталомыс лоо неуна кузьджыкөн. Вөлі тайё тадз.

1938 воөдз районъясса ответственной уджалысьяслы, тшөтш и районной газетса ответственной редакторъяслы, сетлисны боевой пистолет. Сы йылысь ме эг тодлы, но отчид семейной тылөсысь (сундукусь), кодос вөлі дорөсалёма көртон, ме мыйкө корси и көлуй сайсьыс, пельөссьыс, аддзи кутшөмкө картон көрөбка. Дерт, окота лои тодмавыны, мый сәні, и восьті. А сәні пистолет патронъяс. Кызь вит штука. Ме ышми, босьті куимос да дзеби. Сийё кадё батё редакторалис Сыктывдин районса газетын, а олим Вильгортын. Буретш сэк ми — вильгортса Кулига грездысь зонкаяс — «воюйтим» Съод-Яков грездса зонкаяскөд. Лыйсьывлим изъясон, жугөдлом чугун торъясон, кучкасьлим бедъясон и весиг лыйсьывлим ас вөчөм пу пистолетъясон, кытчө стволас индывлим ыргон трубка помъяс, кодъясьёс сэсся «зарядитывлим» порокон да дрөбйон.

Оти гожся рытё воюйтанмоз ми — кулигасаяс — уськөдчим асланым «врагъяс» выло да зырим найос бипур дорысь, кодос

вөлі пестöмаоь да жөдзисны сы гөгөр. А ме ёртъяслы водз-выв мыччөдлі патронъястө и шуи, мый сьөд-яковчи кө усь-көдчасны ми вылө, мед бөр вөтлыны, ставным пыр жө и пышъям, а ме бипур пиас шы-бита куимнан патронсө. Сідзи и вөчим. Пышйим бипур дор-сьыд да кутім виччысьны, мый лоө. Недыр мысти бипур пытшкад патронъясыд доналіс-ны да кызди тай пондісны швачкыны-взрывайтчыны. «Врагъяс» риздөісны-пышйис-ны коді кытчө, а ми, «ура» горзігтырйи, бөр «босьтім» пась-разалөм бипурсө.

Дерт, татшөм шмонитөмыд кывсис бать-мамъясыслы, а сэсся и районса начальстволы, кодъяс туясисны и эрдөісны боеприпасъяс омөля видзысьсө: батькөд чорыда сёрнитісны, а ме төдлі бательсы тасмасө.

Аслас уджыс понда бать эз вермы тырмымөн вичмөдны кад, велөдны менө оланногө. Пыр сылы вөлі некор — юр выв тырыс удж, вөдитчис кутшөмкө гижөдъясөн, бумагаясөн, кодъясөс новлөдліс кызкодь портпеляс. Асывнас, кор сөмын на вөлі садьма да чечча, сійө петө нин гортысь да муно редакцияс, рытнас сідз жө: ме вода узыны, а сійө сөмын на воө да портпель-сьыс бара нин перйө ки тыр бумага. Матыстчылас ме дінө, юалас жө өттор-мөдтор, да дзумгысьсө аслас бумагаясө.

Зэв коланаөн батьө лыддис менсьым книгагас лыддыны ра-дейтөмөс. Тшөкыда вайлывліс козин пыдди Маршаклысь, Чу-ковскийлысь, Лев Толстойлысь да мукөдлысь мичаа серпасалөм книгагас. Вильгортын оліг на нуөдліс менө гижсьыны Вильгорт-са библиотекаө да вочасөн велалі ветлөдлыны сэтчө. Библиоте-каыс лоис меным мөд гортөн.

Кор батьөс вуджөдісны «Вөрлэдзысь» газетө ответственной редакторөс вежысьсөн и ми семьяөн кутім овны Сыктывкарын, ме первойя жө лунъясас муни Куратов уличавывса латшкөсіник керкаө меститчөм челядь библиотекаө. Сэтчөс библиотекарьяс менө төдмөдісны приключенческой книгагасөн. Медся радейтана-өн лоисны Жюль Вернлөн, Майн Ридлөн, Вальтер Скоттлөн, Александр Беляевлөн да мукөдлөн книгагасыс. Найөс ме лыд-дывлі, позьө шуны, дугдывтөг. Сөмын кор батьөй воліс фин-скөй война вылас доймалөм бөрын некымын лун кежлө бурдөд-чанмозыс, төдмөдіс Джек Лондонлөн да Алексей Толстойлөн книгагасөн. Ышөдіс лыддыны серьёзной литература, но приклю-ченческойыд сьөлөмөс ёнджыка на кыскис. Ме батьөс нэмыс аттьөала сыысь, мый велөдіс радейтны лыддысьны. Ёти кадө весиг вөлі мөвп велөдчыны сы моз уджавны газетын, а гашкө, и гижысьсөн лоны, но олөмыс сэтшөм крута бергөдчис, мый



проклятой война вoсна медводдза мoгoн лoи, мед эськo не кувны тшыгла, кольны лoвйoн. Но тaйo зэв кузь «мoйд».

Вoлiс кo бaтьoй гортaным эз oтнaс, вeрстьo зэв пoсa вoлi сeрнитoны aслaныс тoжд-мoг йылысь, унa дa дыр сeрнитлiсны мeждунaрoднoй пoлoжeниe дa пoлитикa йылысь. Мe тшoкyдa кывзысьлi нaлoн сeрнийo, дa мeдcя тoдчaнa мeждунaрoднoй лoм-тoрнaс пыр вoлi тoдcя. Вeжoрын и сьoлoмын aчыс вoчacoн cовмис фaшистскoй Гeрмaниaйoc дa Гитлeрoс кeдзoвтoм. Кoр фaшистскoй Гeрмaниa пoндiс ыршaсьны Чeхия вылo, a миян пpaвительствo кoрис Пoльшaлысь лэдзны вoйскaнымoс стрaнa пырыс Чeхиялы oтcoг вылo, нo Пoльшa oткaжитчис, мeным пoмнитcьo, кyдзи бaть-мaм дa миянo пырaвлысь eртъясыс eрисны дa видiсны Пoльшaтo. Стaвoн видiсны дa eрисны и фaшистскoй Гeрмaниaйoc. Но дpyг!.. Дpyг кывcис Гeрмaниaкoд oтa-мoд вылo уськoдчyтoм йылысь пaкт!..

Дивo кoдь миянлы вoлi. Но кырымaлiсны кo и кырымaлiсны. Ми эским aслaным пpaвительствoлы. И Стaлинлы, и Мoлoтoвлы. Тыдaлo, cидзи кoлiс. Миян тoм юръясын вoлi зэв тoдчaнa мoрaльнo-нрaвствeннoй пpaвилo: сeтiн кыв, кoсьиcин — кyт! Мe, кyдзи и мyкoд тoм вeжoрa йoз, дивyйтчи дoгoвoрыcлы, нo кoсьиccис эскыны. Кoть yнaoн, и бaтьoй тшoтш, эз: пoръялaс пo Гитлeрыд. И збыль, нeдыр мыcти Гeрмaниa уськoдчис Пoльшa вылo, бoсьтiс Вapшaвa, a



кoр oккyпируйтiс стрaнa джынco нин, cэк миян Coветскoй пpaвительствo тшoктiс Кpacнoй Aрмия чaстьяслы пырны Бeлoруccия дa Укpaинaсa рытыввыв юкoнъяcьo, мeд нe лэдзны cэтчo фaшистскoй Гeрмaниaйoc.

1939 вoсa cентябp тoлысь-лoн мeдводдзa жo лунъяcяc, кyдзи фaшистскoй Гeрмaниa уськoдчис Пoльшa вылo, кoр Aнглиa дa Фpaнция юoртiсны Гeрмaниaкoд вoйнa йылысь, зaвoдитчис Мoд мирoвoй вoйнa. Бaтьoc мoбилизуйтiсны aрмияo пepвoй кaтeгopиязa пaсaнoй кoмaндирoн, cетiсны пoлитpук дoлжнoсть. Cийo ыcтылiс миянлы фoтoкapтoчкa. Гeжoдикa

вoлiсны cпoкoйнoй письмoяc. Ми — гoртcaяc — эгкoдь и мaйшaсьoй: эским, миян aрмия мeдcя вoнa, кoмaндиръяc мeдcя бyрoсь, мый лoac кo зык-тыш, нeкымын лунoн и пaсьвapтaм вpaгoc. Кoвмылiс кo, шкoлaын ли кyтшoмкo пиoнepскoй чyкoрт-чылoмъяc дырйи, cьoлoмcянъ дa збoдepa, oшйыcянa-збoя cьыв-лiм «Eсли зaвтpa вoйнa» cьылaнкыв.

Пoльcкoй гpaницa вуджысь aрмeйскoй чaстьяcын бaть эз вoв, нo тoв пyкcигoн письмoяcыc кyтiсны вoны Лeнингpaд дoрысь, a cэccя и ыпнитiс Финляндиякoд вoйнa. Гижнытo, тыдaлo, нeкoр вoлoм, дa oг и пoмнит, вoлiсны ли эз ли cэки письмo-

ясыс. Война помасигас нин сöмын друг воис ачыс. Доймалöм бöрас лэдзлöмаöсь некымын лун кeжлö гортö, да висътасис, кутшöм ён дорйысян сооруженияс, дотъяс да дзотъяс, вöлöмкö, вöчлöмаöсь финнъяс. Сійö дотъяс да дзотъясянныс финнъясыд шырисны миянлысь уна салдатöс. Дотъяс-дзотъяс костас лöсьöдлöмаöсь стальной рельсъясысь креставлöм «ёжъяс», кодъяс-öс миян танкъяс абу вермылöмаöсь жугöдны да талявны. Миян войска сэки воштис зэв уна йöзöс. Но та вылö видзöдтöг быть пö коліс босътны Карельскöй перешеексö, мед сöмын вештыны границасö Ленинград дорысь. Миян правительство, Сталин тыр-выйö гөгөрвоисны и тöдісны Гитлерлысь гуся планъяссö, и коліс пö дасътысьны бурджыка дорйыны Ленинград. Сэні бать и доймавлöма, да госпиталяс бурдöдчöм бöрын лэдзлöмаöсь недыр кeжлö гортö. Олыштис квайт-сизим лун, и бөр муніс.

Финскöй война помасьöм бöрын, 1940 вося гожöмнас, бать веськавліс и Прибалтикаö. Прибалтикаса олысьяс, фашистскöй Германияысь полöм да дорйысьöм могысь, корасны сэк примитны найöс СССР составö. Бать служитис сійö частъясын, кодъяс вöліны сэки Ригаын да сы гөгөрсä местаясын. Бать висътасис, мый Латвияса йöз зэв радпырысь паныдалöмаöсь миянлысь воинскöй частъяс.

Сöмын 1941 вося май тöлысьын сійö прöч демобилизуйтчö и некымын лун шойччöм бöрын сійöс индöны уджавны партия обкомса агитация-пропаганда отделö. Волісны батьöс аддзöдлыны редакцияса ёртъясыс. Сёйисны, юыштисны, и, дерт жö, медшөр сёрниыс налөн вöлі политика да международнöй положение йылысь. Помнитсьö, кыпавліс сёрни Молотовөн кырымалöм пакт йылысь, сійöс бурногөн и лёкногөн донъялöм.

Партия обкомад батьлы мойвиис уджавны сöмын öти тöлысь: юнь 22 лунö Германия висътавтöг уськöдчис миян страна вылö, и юль заводитчигөн журналист, политработник Горчаков Дмитрий Семёнович бара муніс фронт вылö.

Первойя кадас воліс жö пара дженъыдик гижöдтор, но гожöм помланьыс сэсся дыр нинöм эз вöв. Тöлысь вит-ö-квайт бöрын, а гашкö, и дырджык, мам ышöдіс менö гижны частъса командирислы да юавны, мыйла политрук Горчаков нинöм оз юöрт ас йывсыйс. Тöлысь мысьт кымын воис гижöд, көні юöртсис, мый политрук Горчаков Дмитрий Семёнович 1941 вося сентябр 12 лунö вöлі сьöкыда ранитчöма Ленинград областъса Мгинскöй районысь Вороново сикт дорын и сійöс эвакуируйтöмаöсь госпитальö.

Некымын тöлысь виччысим батьсянъ писъмö. Эз кө öд ачыс, ёртъясыс көть вермисны гижны да мöдöдны. Но терпенньöным миян орис, и мам ышöдіс шыöдчыны писъмöөн Ворошилов дорö. Ме сэк велöдчи сизимöд классын. Коркö велöдчан во помас гижі писъмötö. Кык-ö-куимысь заводитлі да черкайті, но коркö-й гижі, писъмöас пункті эскöдан могысь частъсьыс волöм гижöдсö и мöдöді.

Сэки жö, велöдчан во помас, миянöс, школьникъясöс, шуисны мобилизуйтны кер кылöдöм вылö. Миян класса ныв-зонлы вичмис мунны Улыс Максаковка запаньö. Но велöдчан во помасьтöдзыс классö воліс СССР-са наукаяс Академиялөн севернöй база-

ысь научной сотрудник Хантимер Исмаилович Сыддыкович да шуис, кодлы по окота мунны Максаковкао кылдчом пыдди Печора выло экспедицияо, мед шыдчасны. Меню да Цивилев Витя ертос енджыка кыскис экспедицияыд (мися, керьяс быгльодлом да йоткаломто адзылим и тодам, абу диво) да ыштим мунны Печора выло, Кожва районса полевой экспедицияо.

Экспедиция гожом чож собалис ворьяс-нюрьяс пыр. Гортю воим август помын, мед оти лун шойччыштом борын мунны нин школао. Но велдчан воыд сэк заводитчис сомын октябрьсянь: запаньясысь вор кылдом эз помассы и школьникьясостшоткисны уджавны борья керьяс пурьялом-кылдомодз.

Экспедицияысь воан луню жо юали мамлысь, волис эз вочакыв Ворошиловсянь. Ворошилов нимсянь кодко мянлы юртыс, мый батыным «юртыг вошомьяс» лыдын. Некушом госпитальодз, тыдалю, абу и волюма.

Сэки жо, воан луньясо, дзюляджык Фридрих вокюй висьялис, мый гожомнас, кор ме воли экспедицияын, а мамным удж вылын, мян ордю пыравлома доймавлем фронтювик, роднас по батлюн жо чужан Поел сиктысь, да кодкод, вольмко, воюйтомаось оти частын. Дзюляджык Геля воклы сэки висьясьюма, кыдзи усьюма батыным. Мян красноармеечьяс вольм зев дыр да чорыда дорьясьюмаось Вороново сиктбердса корт туй насып полоныс. Кор фашистьяс горзюмон уськодчюмаось на выло и зев нин матю воюмаось, политрук Горчаков по сувтыс насып вылас да горюдис красноармеечьяслы: «За Родину! За Сталина! Вперёд! В атаку!» Ачыс уськодчюма фашистьяслы паныд, муртса вомюналюма насыпсю и модар покятас по и усис. Атакасю по борынтим да бор муним насып саяс, а Горчаковтю по нуисны кытчюко госпиталью. Висьялома тайос и муноюма. Ним ни ов абу висьялома воклы, а модыс, нель ароса на и воли да, гашко, и вунюдис. Ми корко ышмылим корсьны сию мортсю Поельсь, но эг адзюй. Гашко, сэк кешлю и кувсис нин.

Аслам дзюляджык вок Горчаков Фридрих Дмитриевичкод некумынысь сёрнитчылим ветлыны сятчю, кони воли ранитюмаось батюс, но сидз отитор да модтор понда эг и кыпавлюй ветлыны Вороново сикт местаас. Бюрынджык тодмавлим: сиктсю фашистьяс некумынысь босьяломаось, и мян армия некумынысь бор мездылома, а они сиктыслон весиг местаыс нин абу кольюма.

Тайос тодмавтюдз на сьоломюй ышюдис гижны батылы сиюм кывбур, кодос сесся йозюдлысны «Войвыв кодзувлон» 1983 вося модюд номерын.

Гимнастёрка

Шкапын онюдз видза
Батылысь гимнастёрка,
Финской вылысь гортю
Мыйон волис корко.
Юмидз рома петличасю
Доралюма сьюдон,
Да эмаля кубикьяс

Сярвидзисны сэтён.
Сосъяс шёрас — шёвкысь
Мича гёрд звездаяс,
Война вылад медводдзаён
Кыпöдлісны найö.
Политруклөн формаыс
Татшөм вöлі коркö.
...Дас лун батьöй шойччис
Ранитчылөм бöрас,
Меным сэки вöлі
Медся долыд пöра.
Школаысь сэк гортö
Локта вöлі скачөн,
Война йывсьыс висътасьöмсö,
Кывзыштны мед батьöс.
Журналистъяс-ёртъясыс
Волывлісны гортö
Фронтöвиккöд сёрнитны
Öткөн да и котырөн.
...Öдйö, öдйö колисны
Менам шуда лунъяс —
Война вылö батьöлы
Бара ковмис мунны.
— Казьтылантор пиыдлы
Коль кöть,— мамöй долис.
Вывсьыс гимнастёркасö
Бать сэк меным колис.
Шуд да мездлун дорйыны
Врагысь вöлі колö —
Уна сюрс морт жалиттöг
Сетіс ассьыс олөм!
...Ленинград каргөгöрсä
Вөр-ва, муяс, висъталöй!
Кöні батьөн медбөръяысь
Вирсö лои кисьтöма?..
Сöмын муяс, вөр-ваыс
Вочакыв эз сетны.
Быттö гусятөрйöс,
Тайöс колö видзны.
...Öнөдз видза бательысь
Дона гимнастёрка,
Финскöй вылысь кодөн
Воліс коркö гортö.

Коркö сэсся волісны ме ордö Дьяконовскöй музейса уджалысьяс, аддзисны бательысь стенö индөм гимнастёркасö да корисны экспонируйтны сійöс Победалөн годовщина кежлö дасьтөм экспозицияын, а сэсся корисны дзикöдз сетны музейс. Сеті.

Кökъямысдасöд вояс помын ньöблi «Великая Отечественная война» (1985 во) энциклопедия. Сэні эм öткымын битва-сражениелөн схемаяс, и кызкö юрö воис видзöдлыны Ленинград да Тихвин дорса битваяслысь схемаяссö. Аддзи «Тихвинскöй оборо-

нительной» да «Тихвинской наступательной» операцияс йылысь статьяс. Схемаяс пасйома, мый фронт визыс вёлома буретш Вороново сикт бердын и 1941 арнас, и 1943 вося январнас, кор фронтсö и Ленинградсö кытшаломыс вöлі орöдома. Гөгөрвоана, мый Вороново сиктыс водзö, асывывланьыс фашистьясöс мян абу нин лэдзöмаöсь. Тайö сиктыс орччöн буретш нималана Синявинской нюръяскöд.

И кöть сиктыс öнi абу нин, но меным сийö местаыс дона кызди батъ йылысь память. Кызди память мян Рöдина вöсна олöмнысö сетысь салдатъяс йылысь...

Ставлы налы — куслытöм слава!

Снимокъяс вылын:

1. Печать керкаын мемориальной пöв.
 2. Бать-мамыс, Дмитрий Семёнович да Ольга Алексеевна.
 3. Мылдинын олгöн. Гений Дмитриевич (пукалö шуйгаладорас) бать-мамыскöд да дзюлджык Гелий вокыскöд.
 4. Дмитрий Семёнович Горчаков.
- Снимокъясыс Г.Д.Горчаковлөн гортса архивысь.



Номерсö печатьö кырымалiс И.Кичигин.

ПЫДДИ ПУКТАНА АВТОРЪЯС!

Редакцияö гижöдъяснытö ыстигöн быть колö юöртны:

1. Ассыныд ним, вич, ов; кор да кöнi чужломныд (лун, тöлысь, во).
2. Паспорт юöръяс: номер, серия, кор да кöнi сетисны, гортса адрес (прописка серти).
3. Индивидуальной налогöвой номер — ИНН (кодлөн эм).
4. Страховой свидетельство номер.
5. Банкын счёт реквизитъяс.

Тайöс юöрттöг редакция гонорар оз вешты.

*Журналын йöзöдтöм гижöдъяс
редакция оз рецензируют и авторысь найöс оз мöдöд.
Редакция оз век во öти кывйö авторъяскöд.*

Компьютерный набор **Н.Кузнецова.** Корректор **Н.Габова.**

Учредители: Агентство Республики Коми по печати и массовым коммуникациям, «Союз писателей Республики Коми» — региональное отделение общероссийской организации «Союз писателей России».

Издатель: АУ РК «Издательский дом Коми». Директор: Попов В.В.

Адрес издателя: 167982. ГСП-2, г. Сыктывкар, ул. Карла Маркса, д. 229, Дом печати.

Адрес редакции: 167982. ГСП-2, г. Сыктывкар, ул. Карла Маркса, д. 229, Дом печати.

Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).

E-mail: kodzuv@mail.ru; Сайт: www.komimu.com

Подписано к печати 15.05.2015. Формат 70х108¹/₁₆. Печать офсетная. Усл. печ. л. 7; усл. кр.-отг. 8,4; учётно-изд. л. 7,54. Тираж 567. Заказ № 3344. Регистр. ПИ № ФС 3 - 0226 от 20.01.2006 г. выдано Беломорским управлением Федеральной службы по надзору за соблюдением законодательства в сфере массовых коммуникаций и охране культурного наследия. Публикация материалов, направленных на освещение реализации социально значимых проектов, осуществляется при государственной поддержке в форме субсидии Агентством Республики Коми по печати и массовым коммуникациям. Отпечатано в ООО «Коми республиканская типография», 167610, г. Сыктывкар, ул. В.Савина, д. 81. Цена свободная.